

जय नानेश

जय महावीराय नम

जय रामेश

स्वाध्याय माला

संकलन-संपादन
श्रीमती असलेखा सोनावत

:: प्रकाशक ::

श्रीमती चाँद देवी बोथरा

बोथरा चौक,

गगाशहर (बीकानेर)

फोन : 09461203251

- पुस्तक : स्वाध्याय माला
- सकलन-संपादन : श्रीमती असलेखा सोनावत
गंगाशहर (बीकानेर)
फोन 0151-2271418
- प्रकाशक : श्रीमती चोंदादेवी बोथरा
बोथरा चौक, गंगाशहर (बीकानेर)
फोन . 09461203251
- लेजर सेटिंग : चैनरूप भूरा
फोन : 0151-2272964
मो 9414230675
- मुद्रित प्रतियाँ : 100ⁿ
- प्रथम अनावरण : मई, _
- मुद्रक : सुराणा उद्योग, बीकानेर

प्राप्ति स्थान : *श्रीमती चाँदादेवी बोथरा*
बोथरा चौक, गंगाशहर (बीकानेर)
फोन : 09461203251

: *श्रीमती असलेखा सोनावत*
रोशनीघर के पीछे
गंगाशहर (बीकानेर)
फोन : 0151-2271418

प्रकाशकीय परिचय

युगद्रष्टा युगपुरुष दादागुरु पूज्य जवाहराचार्य की पावनधरा गंगाशहर के धार्मिकता से ओतप्रोत श्रेष्ठि स्व. रावतमलजी बोथरा के घर माता बाइयादेवी की कुक्षि से स्व भंवरलालजी बोथरा का जन्म हुआ। युवावस्था को प्राप्त करते ही आपका पाणिग्रहण स्व मूलचन्दजी धर्मपत्नी स्व. भूरीदेवी लूणिया परिवार की धर्मशीला बहिन श्रीमती चॉदादेवी जिनका जन्म फाल्गुन सुदी 3 सम्वत् 1987 को हुआ, के साथ सम्पन्न हुआ। आपने जीवन में पुरुषार्थ से अनेक सफलताओं को वरा, साथ ही पारिवारिक दायित्वों के निर्वहन के साथ समाज सेवा में भी अग्रणी रहे। स्व. भंवरलालजी बोथरा पर फक्कड महात्मा पूरणबाबा की विशेष कृपा थी। जीवधडा का एक-एक खुला बोल आपको कण्ठस्थ था। धर्म पर आपकी विशेष रुचि थी। जीवनपर्यन्त सामायिक का बधा था। 20 वर्ष तक चउदस का उपवास भी कर लिया। बोल थोकडो का विशेष ज्ञान था। 24 तीर्थकरो का लेखा और श्रावक की 10 ढाल, जीवधडा आदि भी कण्ठस्थ था। आपश्री ने साधना को अपनाया तो पाया कि जीवन का आनन्द तो इसी में है। अन्त समय में अपने देह का परित्याग सथारे सहित सजग रहते हुए किया।

आपकी धर्मसाहिका श्रीमती चॉदादेवी का जीवन भी अत्यन्त ही सरल है। बचपन से ही आपश्री की धर्म पर विशेष श्रद्धा रही है। आपने चार आचार्यों के दर्शन का लाभ प्राप्त किया है। आपश्री को चालीस वर्षों से चौविहार, 25 वर्षों से सचित का त्याग है तो जमीकद का त्याग भी बचपन से ही कर रखा है। आपश्री दशवैकालिक, नन्दी सूत्र, सुखविपाक, णमिपव्वज्जा, वीर स्तुति (पुच्छिस्सुण) का स्वाध्याय पुस्तक पर करती हैं। खण्ड योजन, गुणस्थान द्वार, नक्षत्रों का थोकडा, 20 थोकडो का ज्ञान, भक्तामर, कल्याणमन्दिर, दस राणियों का तप, तथा 24 तीर्थकरो का लेखा ज्ञान है तो तपस्या में भी आप अग्रणीय

है। तपस्या में 1 से लेकर 8 तक की लड़ी, 15 की तपस्या, मासखामण, 24 तीर्थकरो की ओली, गणधरो की ओली, एकान्तर तप, 2 बरसी तप कर रखा है। इन सारी तपस्याओं के साथ उपवास से छोटा पखवाडा भी किया। 15 आयम्बिल ओली, 3 मासखामण आयम्बिल से 45 आयम्बिल का 16-17 विहरमान की ओली, 400 आयम्बिल 250 पचक्खान, सोलिया एकासना का कर्मचूर, 3 खद, सामायिक का मासखामण, एक वर्ष में 2000-2500 सामायिक आदि कर रखी है। हमेशा एक हजार गाथा की स्वाध्याय करते हैं।

आपके दो पुत्र अभयकुमार धर्मपत्नी इन्द्रादेवी, स्व सुरेन्द्रकुमार धर्मपत्नी विमलादेवी तथा चार पुत्री—1 पुष्पा धर्मपत्नी श्री शुभकरणजी चौपडा, 2 चन्द्रकला धर्मपत्नी श्री गुलाबचन्दजी सेठिया, 3 उर्मिला धर्मपत्नी अशोककुमारजी सेठिया, 4 असलेखा धर्मपत्नी धर्मचन्दजी सोनावत हैं। आपके दो पोत्र श्री मोहितकुमार एवं गौतमकुमार तथा एक पोत्री प्रवीणा धर्मपत्नी आसीसकुमारजी दुगड हैं। आप सभी की गुरुभक्ति श्रद्धा समर्पणा प्रेरणादायक है। पूरा परिवार धार्मिक भावना से भरपूर है।

धार्मिक भावना से प्रेरित होकर आपने वीतराग प्रभु महावीर की जनकल्याणकारी वाणी को जन-जन तक पहुँचाने व मुमुक्षु आत्माओं की साधना को सबल बनाने में सहायक के रूप में 'स्वाध्याय माला' के प्रकाशन को संभव बनाने हेतु उदार सबल प्रदान करते हुए आर्थिक सहयोग दिल खोलकर दिया तथा गुरुचरणों में श्रद्धा-समर्पणा रूपी भेट दी।

धन्य है बोधरा परिवार जिन्होंने ऐसा महान् कार्य किया है। आप सभी साधुवाद के पात्र हैं।

सादर जयजिनेन्द्र।

मयक सोनावत

अनुक्रमणिका

1. वीर स्तुति : (पुच्छिस्सुण)	7
2. सिद्ध-स्वरूप दर्शन : (उववाई सूत्र-बावीस गाथाएँ)	9
3. श्री सुखविपाक सूत्रम्	11
4. श्री अनुत्तरोववाइयदशांग सूत्रम्	41
5. दशवैकालिक सूत्रम् (5 अध्ययन)	60
6. उत्तराध्ययन सूत्र के कतिपय अध्ययन णवमं णमिपव्वज्जा णामज्झयण	83
हरीएसिज्जं-बारह-अज्झयणं	88
महाणियण्ठिज्जं-वीसइमं-अज्झयणं	92
रहणेमिज्जं-वावीसइमं-अज्झयणं	97
जीवाजीवविभत्ती-छत्तीसइमं-अज्झयण	101
7. सिरि नन्दी सूतं	122
8. श्री ऋषभदेव भगवान शिलोका	160
9. गौतम रास	164
10. चौबीसी	172
11. पंच परमेष्ठि	173
12. मेरी भावना	174

: वीर स्तुति :

(पुच्छिसुण)

पुच्छिसुण समणा माहणा य, अगारिणो या परतित्थिया य ।
से केइ णेगत-हिय धम्ममाहु, अणेलिस साहु समिक्खयाए ॥1॥
कहं च णाण कह दंसण से, सील कह णायसुयस्स आसी ।
जाणासि ण भिक्खु ! जहा तहेण, अहासुय बूहि जहा णिसन्तं ॥2॥
खेयण्णए से कुसले महेसी, अणत-णाणी य अणत-दसी ।
जसन्सिणो चक्खु-पहे ठियस्स, जाणाहि धम्म च धिइ च पेहि ॥3॥
उड्ड अहेयं तिरिय दिसासु, तसा य जे थावर जे य पाणा ।
से णिच्च-णिच्चेहि समिक्ख-पण्णे, दीवेव धम्म समिय उदाहु ॥4॥
से सव्वदसी अभिभूय णाणी, णिराम-गंधे धिइम ठियप्पा ।
अणुत्तरे सव्व जगसि विज्ज, गथा अईए अभए अणाऊ ॥5॥
से भूइपण्णे अणिए अचारी, ओहतरे धीरे अणत-चक्खू ।
अणुत्तर तप्पइ सूरिए वा, वइरोय-णिन्देव तम पगासे ॥6॥
अणुत्तर धम्ममिण जिणाण, णेया मुणी कासव आसुपण्णे ।
इन्देव देवाण महाणुभावे, सहस्स णेया दिविण विसिद्धे ॥7॥
से पण्णया अक्खय सागरे वा, महोदही वावि अणन्त-पारे ।
अणाइले वा अकसाइ मुक्के, सक्केव देवाहिवई जुइम ॥8॥
से वीरिएण पडिपुण्ण वीरिए, सुदन्सणे वा णग सव्व सेट्ठे ।
सुरालए वासि-मुदागरे से, विरायए णेग-गुणोव-वेए ॥9॥
सय सहस्साण उ जोयणाण, तिकण्डगे पण्डग वेजयते ।
से जोयणे णव-णवइ सहस्से, उद्धुस्सित्तो हेट्ट सहस्स-मेग ॥10॥
पुट्ठे णभे चिट्ठइ भूमिवट्ठिए, ज सूरिया अणुपरि-वट्ठयति ।
से हेमवण्णे बहु-णन्दणे य, जसि रइ वेदयति महिदा ॥11॥

से पव्वए सद्द-महप्पगासे, विरायई कंचण-मड्डवण्णे ।
 अणुत्तरे गिरिसु य पव्वदुग्गे, गिरिवरे से जलिएव भोमे ॥12॥
 महीए मज्झमि ठिए णगिन्दे, पण्णायते सूरिए सुद्धलेसे ।
 एवं सिरिए उ स भूरिवण्णे, मणोरमे जोयइ अच्चिमाली ॥13॥
 सुदंसणस्सेव जसो गिरिस्स, पवुच्चई महत्तो पव्वयस्स ।
 एत्तोवमे समणे णायपुत्ते, जाइ जसो दंसण-णाण-सीले ॥14॥
 गिरिवरे वा निसहाययाणं, रुयएव सेट्ठे वलयायताणं ।
 तओवमे से जग भूइपण्णे, मुणीण मज्झे तमुदाहु पण्णे ॥15॥
 अणुत्तरं धम्ममुई रइत्ता, अणुत्तरं ज्ञाणवरं झियाइ ।
 सुसुक्क-सुक्क अपगण्ड-सुक्कं, संखिन्दु-एगंतव-दात-सुक्कं ॥16॥
 अणुत्तरगं परम महेसी, असेस-कम्मं स विसोहइत्ता ।
 सिद्धि गई साइ-मणन्त पत्ते, णाणेण सीलेण य दसणेण ॥17॥
 रुक्खेसु णाए जह सामली वा, जंसि रइ वेदयति सुवण्णा ।
 वणेसु वा णन्दण-माहु सेट्ठं, णाणेण सीलेण य भूइपण्णे ॥18॥
 थणियं व सद्दाण अणुत्तरे उ, चंदोव-ताराण महाणुभावे ।
 गन्धेसु वा चंदणमाहु सेट्ठं, एवं मुणीणं अपडिण्ण-माहु ॥19॥
 जहा सयम्भू उदहीण सेट्ठे, नागेसु वा धरणिन्दमाहु सेट्ठे ।
 खोओदए वा रस-वेजयन्ते, तवोवहाणे मुणि वेजयते ॥20॥
 हत्थीसु एरावणमाहु णाए, सीहो मियाणं सलिलाण-गगा ।
 पक्खीसु वा गरुले वेणुदेवे, णिव्वाण-वादीणिह णायपुत्ते ॥21॥
 जोहेसु णाए जह वीससेणे, पुप्फेसु वा जह अरविन्दमाहु ।
 खत्तीण सेट्ठे जह दन्तवक्के, इसीण सेट्ठे तह वद्धमाणे ॥22॥
 दाणाण सेट्ठं अभय-प्पयाण, सच्च्वेसु वा अणवज्जं वयति ।
 तवेसु वा उत्तमं बम्भचेरं, लोगुत्तमे समणे णायपुत्ते ॥23॥
 ठिईण सेट्ठा लवसत्तमा वा, सभा सुहम्मा व सभाण सेट्ठा ।
 णिव्वाण-सेट्ठा जह सव्व धम्मा, ण णायपुत्ता परमत्थि णाणी ॥24॥

चत्तारि य रयणीओ, रयणि-त्ति भागूणिया य बोधव्वा ।
 एसा खलु सिद्धाण, मज्झिम ओगाहणा भणिया ॥6॥
 एक्का य होइ रयणी, साहीया अगुलाइ अट्ट-भवे ।
 एसा खलु सिद्धाण, जहण्ण ओगाहणा भणिया ॥7॥
 ओगाहणाए सिद्धा, भव-त्ति भागेण होइ परिहीणा ।
 सठाण-मणित्थ-त्थं, जरा-मरण विप्प-मुक्काणं ॥8॥
 जत्थ य एगो सिद्धो, तत्थ अणता भवक्खय-विमुक्का ।
 अण्णोण्ण समोवगाढा, पुट्ठा सव्वे य लोगन्ते ॥9॥
 फुसइ अणते सिद्धे, सव्व पएसेहि णियमसो सिद्धो ।
 ते वि असखेज्ज गुणा, देस-पएसेहि जे पुट्ठा ॥10॥
 असरीरा जीव-घणा, उवउत्ता दंसणे य णाणे य ।
 सागार-मणागार, लक्खण-मेयं तु सिद्धाण ॥11॥
 केवल णाणुव-उत्ता, जाणति सव्वभाव गुण भावे ।
 पासति सव्वओ खलु, केवल दिट्ठी अणन्ताहि ॥12॥
 णवि-अत्थि-मणुसाण, तं सोक्खं-णवि य सव्व-देवाण ।
 ज सिद्धाण सोक्ख, अव्वाबाह उवगयाण ॥13॥
 जं देवाण सोक्खं, सव्वद्धा पिण्डियं अणन्तगुण ।
 ण य पावइ मुत्तिसुहं, -णताहि वग्ग-वग्गूहि ॥14॥
 सिद्धस्स सुहो-रासी, सव्वद्धा पिण्डओ जइ हवेज्जा ।
 सोऽणत वग्ग भइओ, सव्वागासे ण माएज्जा ॥15॥
 जहा-णाम कोइ मिच्छो, णयर-गुणे बहुविहे वियाणन्तो ।
 ण चएइ परि-कहेउं, उवमाए तहिं असन्तीए ॥16॥
 इय सिद्धाणं सोक्खं, अणोवमं णत्थि तस्स ओवम्म ।
 किचि विसेसे-णेतो, ओवम्म-मिण सुणह वोच्छ ॥17॥
 जह सव्व काम-गुणिय, पुरिसो भोत्तूण भोयणं कोई ।
 तण्हा छुहा विमुक्को, अच्छेज्ज जहा अमियति तो ॥18॥

पुत्रिं चरमाणे, गामाणुगामं दूइज्जमाणे, सुहंसुहेण विहरमाणे जेणेव रायगिहे णयरे जेणेव गुणसीले चेइए तेणेव उवागच्छइ, उवागच्छित्ता अहा पडिरूव उग्गहं उगिण्हित्ता संजमेणं तवसा अप्पाण भावेमाणे विहरइ । तए ण रायगिहे णयरे जाव परिसा णिग्गया, धम्मो कहिओ, परिसा जामेव दिस पाउब्भूया, तामेव दिसं पडिगया ।

तेण कालेण तेणं समएणं अज्ज-सुहुमस्स अणगारस्स जेहे अतेवासी अज्ज जम्बू ! णाम अणगारे कासव-गोत्तेणं सत्तुस्सेहे सम-चउरंस-संठाण-संठिए वज्जरिसह-नाराय-संघयणे, कणय-पुलयणिहस-पम्हगोरे जाव ऊछूढ-सरीरे सखित्त-विउल-तेउलेसे, चउदस-पुव्वी, चउ-णाणोवगए सव्वक्खर-सण्णिवाई । अज्ज-सुहम्मस्स ! थेरस्स अदूर-सामन्ते उड्डं-जाणू अहो-सिरे ज्ञाण-कोड्डोवगए संजमेणं तवसा अप्पाण भावमाणे विहरइ ।

तएणं से अज्ज-जम्बू ! णामं अणगारे जाए-सड्डे जाव समुप्पण्ण-सड्डे, समुप्पण्ण-संसए, समुप्पण्ण-कोउहल्ले उट्टाए उट्टेइ, उट्टाए उट्टित्ता जेणामेव अज्ज-सुहम्मे थेरे तेणामेव उवागच्छइ उवागच्छित्ता अज्ज-सुहम्मे ! थेरे वदइ णमसइ अज्ज-सुहम्मस्स थेरस्स णच्चासण्णे णाइदूरे सुस्सूसमाणे-णमंसमाणे अभिमुहे पजलिउडे विणएण पज्जुवासमाणे एवं वयासी—

जइ णं भते ! समणेण भगवया महावीरेणं जाव संपत्तेण दुह-विवागाण अयमहे पण्णत्ते ? सुह-विवागाणं भंते ! समणेण भगवया महावीरेणं जाव संपत्तेण के अहे पण्णत्ते ?

तएण से सुहम्मे अणगारे जम्बू अणगार एवं वयासी, एवं खलु जम्बू ! समणेणं भगवया महावीरेणं जाव सम्पत्तेणं सुह-विवागाण दस अज्झयणा पण्णत्ता । तजहा—

सुबाहू भद्दणंदी य, सुजाए, सुवासवे, तहेव जिणदासे ।

धणवई, य महब्बलो, भद्दणन्दी, महचंदे वरदत्ते ।।

जइ ण भन्ते ! समणेण भगवया महावीरेण जाव सपत्तेण सुह-विवागाण दस-अज्झयणा पण्णत्ता । पढमस्स ण भते ! अज्झयणस्स सुह-विवागाण समणेण भगवया महावीरेण जाव सपत्तेण के अट्ठे पण्णत्ते ?

तएण से सुहम्मे अणगारे जम्बू अणगार एव वयासी । एव खलु जम्बू ! तेण कालेण तेण समएण हत्थिसीसे णाम णयरे होत्था । रिद्धित्थिमिय-समिद्धे । तत्थण हत्थि-सीसस्स-णयरस्स बहिया उत्तर-पुरत्थिमे-दिसीभाए एत्थण पुप्फ-करण्डए णाम उज्जाणे होत्था । सव्वोउ य पुप्फ-फल-समिद्धे, रम्मे-णदणवण-प्पगासे, पासाइए-दरिसणिज्जे, अभिरूवे, पडिरूवे । तत्थ ण कयवण-माल-पियस्स-जक्खस्स जक्खाययणे होत्था, दिव्वे ।

तस्स ण वणसण्डस्स बहुमज्झ देसभागे एत्थ ण मह एकके असोगवर-पायवे पण्णत्ते-कुस-विकुस-विसुद्ध रुक्ख-मूले जाव अणेग रह-जाण-जुग-सिविय-पविमोयणा सुरम्मा पासादीया दरिसणिज्जा अभिरूवा पडिरूवा ।

तस्स ण असोग वर पायवस्स हेट्ठा ईसि खध समल्लीणे एत्थ ण मह एकके पुढवि सिलापट्टए पण्णत्ते-विक्खभाया-मउस्सेहसु-प्पमाणे जाव णिद्धघणे अट्टसिरे आयसय तलोवमे सुरम्मे जाव सीहासण-सण्ठिए पासाइए दरिसणिज्जे अभिरूवे पडिरूवे ।

तत्थ ण हत्थिसीसे णयरे अदीणसत्तू णाम राया होत्था । महया हिमवते, तस्स ण अदीणसत्तुस्स रण्णो धारिणी पामोक्ख देवी-सहस्स ओरोहे यावि होत्था ।

तए ण सा धारिणी देवी अण्णया कयाइ तसि तारिसगसि वास-भवणसि सयणोवयार कलिए अद्धरत्त-काल-समयसि सुत्तजागरा ओहीरमाणी-2 अयमेयारूव उराल कल्लाण सिव-धण्ण मगल्ल सस्सिरीय महासुमिण पासित्ताण पडिबुद्धा । हट्ट तुट्ट जाव हियया ।

त सुमिणं ओगिण्हइ ओगिण्हित्ता सयणिज्जाओ अब्भुद्धेइ, रायहस-
सरिसीए-गईए जेणेव अदीणसत्तुस्स-रण्णो सयणिज्जे तेणेव उवागच्छइ
उवागच्छित्ता अदीणसत्तु रायन्ताहि इट्ठाहि जाव मिय-महुर-मंजुलाहि-
गिराहि संलवमाणी-2 पडिबोहेइ, 2 ता जाव एवं वयासी-एव खलु
अहं देवाणुप्पिया ! अज्ज तंसि तारिसगसि सयणिज्जंसि सालिगण-
वट्टिए तं चेव जाव णियगवयण-मइ वयत तं सीहं सुविणे पासित्ताणं
पडिबुद्धा । तण्णं देवाणुप्पिया ! एयस्स उरालस्स जाव महासुमिणस्स
के मन्ने कल्लाणे फलवित्ति-विसेसे भविस्सइ ?

तए ण से अदीणसत्तू-राया धारिणीए-देवीए अतिय एयमट्ठ
सोच्चा णिसम्म जाव तस्स सुविणस्स अत्थोग्गहणं करित्ता धारिणी-
देवी ताहिं इट्ठाहि जाव सस्सिरीयाहि गिराहिं संलवमाणे-2 एवं
वयासी-

उराले णं तुमे देवी ! सुविणे दिट्ठे, जाव मंगल्ल-कारे णं
मंने दिट्ठे, अत्थलाभो भोगलाभो पुत्तलाभो रज्जलाभो देवाणुप्पिए !
एवं खलु तुम देवाणुप्पिए ! णवण्हं मासाणं बहु-पडिपुण्णाणं अद्धद्वमाण-
राइदियाण विइक्कताणं अहं कुलकेउ कुलदीव जाव कुल-विवद्वणकरं
सुकुमाल-पाणिपाय अहीण-पडिपुण्ण जाव सुरुवं देवकुमार समप्पभं
दारगं पयाहिसि ।

तए णं सा धारिणी देवी अदीण सत्तुस्स रण्णो अंतियं भद्दा
सणाओ अब्भुद्धेइ जाव जेणेव सए सयणिज्जे तेणेव उवागच्छइ ।
उवागच्छित्ता सयणिज्जंसि णिसीयइ णिसीइत्ता एवं वयासी-मामे
से उत्तमे पहाणे मंगल्ले सुविणे अण्णेहि पाव-सुविणेहि पडिहम्मिस्सइ
त्ति कट्ठु देव-गुरु-जण सम्बद्धाहि पसत्थाहि मंगल्लाहि धम्मियाहि
कहाहिं सुविण-जागरिय पडिजागरमाणी-2 विहरइ ।

तए णं से अदीणसत्तू राया कल्ल पाउप्पभायाए जाव बाहिरिया
उवट्टसाला तेणेव उवागच्छइ-2 ता सीहासणवर पुरत्थाभिमुहे

सण्णिसण्णे । तए ण से अदीणसत्तु राया अप्पणो अदूरमासते उत्तर-
पुरत्थिमे दिसिभागे अट्ठ-भद्दासणाइ सेयवत्थ-पच्चुत्थुयाइं जाव कणग-
पवर-पेरत देसभाग अब्भितरिय जवणिय अछावेइ-2 ता जाव धारिणीए
देवीए भद्दासण रयावेइ-2 ता कोडुम्बिय पुरिसे सद्दावेइ-2 ता ।

एव वयासी-खिप्पामेव भो देवाणुप्पिया ! अट्ठग महाणिमित्त
सुत्तत्थ-पाढए विविह-सत्थ-कुसले सुमिण-पाढए सद्दावेह-2 ता
एयमाणत्तिय खिप्पामेव पच्चप्पिणह । तए ण ते कोडुम्बिय पुरिसा
जाव सुमिण पाढए सद्दावेत्ति । तएण ते सुमिणपाढगा जेणेव अदीणसत्तु
राया तेणेव उवागच्छइ-2 ता राय जएण विजएणं वद्धावेन्ति जाव
पत्तेयं पत्तेय पुव्वुन्नत्थेसु भद्दासणेसु णिसीयति ।

तए णं से अदीणसत्तू राया जवणिय-तरिय धारिणि देवि ठवेइ
ठवेत्ता पुप्फ-फल-पडिपुण्हत्थे विणएण ते सुमिणपाढए एव वयासी-
एव खलु देवाणुप्पिया ! धारिणीदेवी अज्जतसि-तारिसगसि
सयणिज्जसि जाव महासुमिण पासित्ताण पडिबुद्धा । त एयस्स ण
देवाणुप्पिया ! उरालस्स जाव सरिस्सरीयस्स महासुमिणस्स के मन्ने-
कल्लाणे-फलवित्ति विसेसे भविस्सइ ।

तए ण ते सुमिण पाढगा अदीणसत्तुस्स रण्णो अतिए एयमट्ठ
सोच्चा णिसम्म त सुमिण सम्म ओगिण्हति-2त्ता इह अणुपविसति,
अणुपविसित्ता । अण्ण-मण्णेण-सद्धि सचालेइ-2त्ता तस्स सुमिणस्स
लद्धट्ठा गहियट्ठा पुच्छियट्ठा विणिच्छियट्ठा अभिगयट्ठा अदीणसत्तुस्स
रण्णो पुरओ सुमिण-सत्थाइं उच्चारेमाणे-2 एव वयासी-एव खलु
अम्ह सामी ! सुमिण सत्थसि बायालीस सुमिणा, तीसं महासुमिणा
बावत्तरि सव्व-सुमिणा दिट्ठा ।

तत्थ ण सामी अरिहत-मायरोवा, चक्कवट्ठि-मायरोवा, अरिहंतसि
वा, चक्कवट्ठिसि वा गब्भ वक्कम-माणसि एएसि तीसाए महासुमिणाणं
इमे चउदस महासुमिणे पासित्ता ण पडिबुज्झति, तंजहा-

गय-उसभ-सीह-अभिसेय-दाम-ससि-दिणयरं झयं कुम्भं ।

पउमसर सागर विमाण भवण रयणुच्चयसिहिं य ॥

वासुदेव-मायरो वा वासुदेवसि गब्भ वक्कममाणसि एएसि चउदसण्हं महासुमिणाणं अण्णयरे सत्त वा । बलदेव-मायरो वा बलदेवसि गब्भ वक्कममाणसि एएसि चउदसण्ह महासुमिणाणं अण्णयरे चत्तारि महासुमिणे पासित्ताणं पडिबुज्झंति ।

मण्डलिय-मायरो वा मण्डलियसि गब्भ वक्कम-माणंसि एएसि चउदसण्हं महासुमिणाणं अण्णयर एगं महासुमिण पासित्ताणं पडिबुज्झंति ।

इमे य ण सामी ! धारिणीए देवीए एगे महासुमिणे दिट्ठे । तं उरालेण सामी ! धारिणीए देवीए जाव आरोग्ग-तुट्ठि दीहाउ-कल्लाण-मंगल्ल-कारेण सामी । धारिणीए देवीए सुमिणे दिट्ठे । अत्थलाभो सामी ! सोक्खलाभो सामी ! भोगलाभो सामी !, पुत्तलाभो , एवं खलु सामी । धारिणीदेवी णवण्हं मासाण बहुपडिपुण्णाण जाव दारगं पयाहिसि ।

से वि य णं दारए उम्मुक्क बाल-भावे विण्णाय परिणय-मित्ते जोव्वणग-मणुपत्ते सूरे-वीरे-विक्कन्ते-वित्थिण्ण-विपुलबल-वाहणे रज्जवइ-राजा भविस्सइ, अणगारे वा भावियप्पा, तं उराले ण सामी । धारिणीए देवीए सुमिणे दिट्ठेत्ति कट्टु भुज्जो भुज्जो अणुबूहन्ति । तए ण अदीणसत्तू राया ते सुमिण पाढए-सक्कारेत्ता सम्माणेत्ता विउल जीवियारिह पीइदाणं दलयइ 2-त्ता पडिविसज्जेइ ।

तए ण सा धारिणी देवी त सुमिण सम्म पडिच्छइ-पडिच्छइत्ता जेणेव सए वासघरे तणेव उवागच्छइ उवागच्छित्ता सयं भवण अणुपविट्ठा । जाव ज तस्स गब्भस्स हित मिय पत्थ गब्भपोसण त देसे य काले य आहार-माहरेमाणी जाव ववगय रोग-मोह-भय-परित्तासा तं गब्भं सुह सुहेण परिवहइ ।

तए णं सा धारिणी देवी णवण्हं मासाण बहु-पडिपुण्णाणं,
अद्धड्डमाण-राइन्दियाणं विइक्कंताण सुकुमाल पाणिपाय अहीण
पडिपुण्ण पचिदिय सरीरं लक्खण-वज्जण गुणोववेय जाव ससि
सोमाकार कतं पियदसण सुरूव दारगं पयाया ।

तएणं से अदीणसत्तू राया बाहिरियाए उवट्टण-सालाए
सीहासण-वरगए पुरत्थाभिमुहे सण्णिसण्णे सइएहि य साहस्सिएहि
सय-साहस्सिएहि य जाएहि दाएहि भोगेहि दलमाणे-2 पडिच्छेमाणे-2
एवं च ण विहरइ ।

तएण तस्स अम्मापियरो जाव सुइजात-कम्मकरणे सपते बारसाहे
दिवसे विउल असणं पाण खाइमं साइम उवक्खडावेन्ति 2-त्ता जाव
आसाएमाणा, विसाएमाण, परिभाएमाणा, परिभुंजमाणा एवं च ण
विहरंति ।

जिमिय भुत्ततरागया वि य ण समाणा आयता चोक्खा परम-
सूइभूया त मित्त-णाइ-णियग-सयण-सबधि-परियण गण-णायग.
विउलेणं पुप्फ-वत्थ-गधमल्ला-लकारेण सक्कारेति सम्माणेति, 2-त्ता
एवं वयासी-अम्हं इमस्स दारगस्स णामेणं सुबाहुकुमारे ! तस्स
दारगस्स अम्मापियरो अयमेयारूवे गोण्ण गुण-णिप्फण्ण णामधेज्जं
करेन्ति सुबाहु त्ति ।

तए ण से सुबाहुकुमारे पच-धाइ परिग्गहिए । तंजहा-खीर
धाईए मडण-धाईए मज्जण-धाईए कीलावण-धाईए, अंक-धाईए
अण्णाहि यं बहूहि खुज्जाहि चिलाइयाहि । इगिय, चिन्तिय पत्थिय
वियाणियाहि सदेसणे वत्थगहित वेसाहि णिउण कुसलाहि विणीयाहि
चेडिया-चक्कवाल-वरिसधर कचुइज्ज महयरगवंद परिकिखत्ते हत्थाओ-
हत्थ साहरिज्जमाणे अंकाओ-अकं परिभुज्जमाणे, परिगिज्जमाणे
जाव णिव्वाय णिव्वाधायसि गिरि कदर-मल्लीणेव चम्पग-पायवे
सुह सुहेण वड्डइ ।

तए णं तं सुबाहुकुमार अम्मापिअरो सातिरेग अट्टवास जातग
 चेव गब्भट्टमे-वासे सोहणंसि तिहिकरण मुहुत्तंसि कलायरियस्स
 उवणेति । तए णं से कलायरिए सुबाहुकुमारं—

लेहं¹ गणिय² रूवं³ णट्ट⁴ गीय⁵ वाइय⁶ सरगय⁷ पोक्खरगयं⁸
 समतालं⁹ जूयं¹⁰ जणवायं¹¹ पासय¹² अट्टावयं¹³ पोरेकवच्चं¹⁴ दगमट्टियं¹⁵
 अण्णविहिं¹⁶ पाणविहिं¹⁷ वत्थविहिं¹⁸ विलेवणविहिं¹⁹ सयणविहिं²⁰
 अज्ज²¹ पहेलियं²² मागहियं²³ गाह²⁴ गीइय²⁵ सिलोय²⁶ हरिण्ण-
 जुत्ति²⁷ सुवण्ण-जुत्ति²⁸ चुण्ण-जुत्ति²⁹ आभरण-विहिं³⁰ तरुणी पडिकम्मं³¹
 इत्थि-लक्खणं³² पुरिस-लक्खणं³³ हय-लक्खणं³⁴ गय-लक्खणं³⁵
 गोण-लक्खणं³⁶ कुक्कुड-लक्खणं³⁷ छत्त-लक्खणं³⁸ डण्ड-लक्खणं³⁹
 असि-लक्खणं⁴⁰ मणि-लक्खणं⁴¹ कागणि-लक्खणं⁴² वत्थुविज्जं⁴³
 खंधारमाणं⁴⁴ णगरमाणं⁴⁵ वूहं⁴⁶ पडिवूहं⁴⁷ चारं⁴⁸ पडिचारं⁴⁹ चक्कवूहं⁵⁰
 गरूलवूहं⁵¹ सगडबूहं⁵² जुद्धं⁵³ णिजुद्धं⁵⁴ जुद्धाइजुद्धं⁵⁵ अट्टिजुद्धं⁵⁶
 मुट्टिजुद्धं⁵⁷ बाहुजुद्धं⁵⁸ लयाजुद्धं⁵⁹ ईसत्थं⁶⁰ छुरुप्पवायं⁶¹ धणुव्वेयं⁶²
 हरिण्णपागं⁶³ सुवण्णपागं⁶⁴ सुत्तखेडं⁶⁵ वट्टखेडं⁶⁶ णालियाखेडं⁶⁷
 पत्तच्छेज्जं⁶⁸ कडगच्छेज्जं⁶⁹ सज्जीवं⁷⁰ णिज्जीवं⁷¹ सउणरूयं⁷² मित्ति ।
 बावत्तरि कलाओ सुत्तओ य अत्थओ य करणओ य सेहावइ सिक्खावइ-2
 ता अम्मा पिऊणं उवणेइ ।

तए णं सुबाहु कुमारस्स अम्मापिअरो तं कलायरियं महुरेहि
 वयणेहि विउलेण वत्थ-गंध मल्लालंकारेण सक्कारेति सम्माणेति
 सक्कारेत्ता सम्माणेत्ता विउल जीवियारिह पीइदाणं दलयंति-2त्ता
 पडिविसज्जेति ।

तए णं तस्स सुबाहुकुमारस्स अम्मापिअरो सुबाहुकुमारं बावत्तरि
 कला-पण्डिए णवंग सुत्त-पडिबोहिए अट्टारस्स विहिप्पगार देसी-भासा
 विसारए गीयरई, गधव्व णट-कुसले, हयजोही, गयजोही, रयजोही
 बाहुजोही बाहुप्पमदी अलंभोग समत्थे साहसिए वियाल-चारी जाए

जाणति, जाणित्ता अम्मापिअरो पच पासाय वडिसग सयांइ करेति
अब्भुग्गय-मूसिय-पसिय विव भवण ।

तए णं तं सुबाहु कुमारं अम्मापिअरो अण्णया कयावि सोभणंसि
तिहि-करण-दिवस-णक्खत्त-मुहुत्तसि जाव पुप्फ-चूला पामोक्खाहि
पंच सयाहि रायवर कण्णयाहि सद्धि एग-दिवसेणं पाणि गिण्हावेइ ।

तए णं तस्स सुबाहु कुमारस्स अम्मापिअरो अयमेवारूवं पीइदाणं
दलयन्ति, तंजहा-पंचसय हिरण्ण-कोडीओ, पंचसय-सुवण्ण-कोडीओ
पंचसय-मउडे-मउडप्पवरे, पंचसय कुण्डल-जुए, कुण्डल जुएप्पवरे
जाव अण्णं वा सुबहुं हिरण्णं वा सुवण्णं वा कस वा दूसं वा विउल
धण-कणग-रयण-मणि-मोत्तिय-संख-सिलप्पवाल-वालरत्त रयण सत्त
सार सावइज्जं अलाहि जाव आसत्तमाओ कुल वसाओ पकाम दाउं,
पकाम परिभोतुं पकाम-परिभाएउं ।

तए णं से सुबाहुकुमारे एगमेगाए भारियाए एगमेग हिरण्ण
कोडि दलयइ, एगमेगं सुवण्ण कोडि दलयइ, एगमेगं मउडं दलयइ
एवं चेव सव्व जाव एगमेग पेसणकारि दलयइ । अण्णं य सुबहु
हिरण्ण जाव परिभाएउ । जाव उप्पि-पासाय-वरगए फुट्टमाणेहि मुइग
मत्थएहि जाव विहरइ ।

तेणं कालेणं तेण समएणं समणे भगव महावीरे आइगरे तित्थयरे
सयं-सम्बुद्धे, पुरिसुत्तमे, पुरिससीहे, पुरिसवर-पुण्डरीए, पुरिसवर-गंध
हत्थीए, लोगुत्तमे, लोगनाहे, लोगहिए, लोगपइवे, लोग-पज्जोयगरे,
अभयदए, चक्खुदए, मग्गदए, सरणदए, जीवदए, बोहिदए, धम्मदए,
धम्मदेसए, धम्मणायगे, धम्म-सारही, धम्मवर चाउरंत-चक्क-वट्टिणा
अप्पडि-हय-वर णाण-दसण-धरे, विअट्ट-छउमे जिणे-जावए, तिण्णे-
तारए, मुत्ते-मोयए, बुद्धे-बोहए सव्वण्णू सव्वदरिसी सिव-मयल मरूअ-
मणंत-मक्खय-मव्वाबाह-मपुणरा-वत्तिअ सिद्धिगइ णामधेज्ज ठाण
सम्पाविउ-कामे अरहा, जिणे, केवली सत्त-हत्थुस्सहे, सम-चउरस

संठाण-सण्ठिए, वज्ज-रिसह-णाराय-संघयणे, अणुलोम-वाउवेगे कक-
 गहणी, कवोय-परिणामे, सउणि-पोस पिडुंतरोरू-परिणए, पउमुप्पल-
 गंध सरिस गिस्सास-सुरभि वयणे छबी, णिरायक-उत्तम-पसत्थ-
 अइसेय गिरूवमपले-जल्ल-मल्ल-कलक-सेय-रय-दोस वज्जिय
 सरीर-णिरूवलेवे, छाया-उज्जोइ-अंगमगे जाव अड्ड-सहस्स वर
 पुरिस-लक्खणधरे णग-णगर-मगर-सागर-चक्क-कवरक मगलकिय
 चलणे विसिद्धरूवे हुयवह णिद्धूम जलिय तडितडिय तरुण रवि-किरण
 सरिसतेए अणासवे, अममे, अकिचणे, छिण्णसोए, गिरूवलेवे, ववगय
 पेम-राग-दोस मोहे, णिगंगंथस्स-पवयण-देसए, सत्थ-णायगे, पइट्टावए
 समणग-पई, समणगविद परिअट्टए चउत्तीस बुद्ध-वयणाति-सेसपत्ते,
 पणत्तीस-सच्च-वयणाति-सेसपत्ते । आगास- गएण चक्केण, आगास
 गएणं-छत्तेणं, आगास-गयाहि सेयवर-चामराहि, आगास-फलिह-मएण,
 सपाय-पीढेणं सीहासणेणं धम्मज्झएण पुरओ पक्कट्टिज्ज-माणेण
 सद्धि सम्परिवुडे पुव्वाणु-पुव्विं चरमाणे, गामाणुगाम दूइज्जमाणे,
 सुहंसुहेणं विहरमाणे हत्थिसीसे णयरे पुप्फकरण्डे उज्जाणे पुढवी
 सिलापट्टए वण्णओ ।

तेण कालेण तेणं समएण समणे भगव महावीरे समोसडे ।
 परिसा निग्गया । अदीणसत्तू जहा कूणिओ तहेव णिग्गओ । सुबाहु
 वि-जहा जमाली, तहा रहेणं णिग्गए । (समणस्स भगवओ महावीरस्स
 छत्ताइ-च्छत्त पडागाइ-पडागं विज्जा-चारणे जम्मए य देवे ओवयमाणे
 उप्पयमाणे य पासइ पासित्ता चाउग्घंटाओ आस रहाओ पच्चारूहइ,
 पच्चारूहित्ता पुप्फ तंबोला उहमादिय वाणहाओ य विसज्जेइ ।
 विसज्जित्ता एगसाडिय उत्तरासंगं करेइ, करित्ता आयते चोक्खे
 परमसुइभूए अंजलि मउलिय हत्थे जेणेव समण भगवं महावीरे
 तेणेव उवागच्छइ । उवागच्छित्ता महावीर वदइ) जाव तिविहाए
 पज्जुवासइ । धम्मो कहिओ, राया परिसा पडिगया ।

तए णं से सुबाहुकुमारे समणस्स भगवओ महावीरस्स अतिए
घम्म सोच्चा णिसम्म हट्ट-तुट्टे हियए समण भगव महावीरं वंदइ
णमसइ एव वयासी-सद्दहामि ण भंते ! णिग्गथ पावयण, पत्तियामि
णं भंते ! णिग्गथ पावयणं, रोएमि ण भत्ते ! णिग्गथ पावयणं,
अब्भुट्टेमि णं भत्ते ! णिग्गथ पावयण, एवमेयं भत्ते ! तहमेय भत्ते !
अवितहमेयं भत्ते ! असदिद्ध-मेयं भंते ! इच्छियमेय भत्ते ! पडिच्छियमेयं
भंते । इच्छिय-पडिच्छियमेयं भंते ! जेणं तुब्भे वदह त्ति कट्टु एव
वयासी-जहा ण देवाणुप्पियाणं अतिए बहवे राईसर-सत्थवाह-पभइओ
मुण्डे भवित्ता अगाराओ अणगारिय पव्वइया । णो खलु अह तहा
सचाएमि मुण्डे भवित्ता अगाराओ अणगारियं पव्वइत्तए । अह ण
देवाणु-प्पियाणं अतिए पचाणुव्वयाइ सत्तसिक्खा-वयाइ दुवालसविह
गिहिधम्म पडिवज्जिस्सामि । अहासुहं देवाणुप्पिया ! मा पडिबध
करेह ।

। तए णं से सुबाहुकुमारे समणस्स भगवओ महावीरस्स अतिए
पंचाणु-व्वयाइं, सत्तसिक्खा-व्वयाइं दुवालस-विहं गिहिधम्म पडिवज्जइ
पडिवज्जित्ता, तमेव चाउग्घण्ट आसरहं दुरुहइ दुरुहित्ता जामेव
'दिसिं पाउब्भूए तामेव दिसि पडिगए ।

तेणं कालेणं तेण समएणं समणस्स भगवओ महावीरस्स जेट्टे
अंतेवासी इंदभूर्इ णाम अणगारे जाव पज्जुवासमाणे एवं वयासी ।

अहो णं भंते ! सुबाहुकुमारे इट्टे-इट्टरूवे, कत्ते कंतरूवे, पिये-
पियरूवे, मणुण्णे-मणुण्णरूवे, मणामे-मणामरूवे, सोमे सुभगे पिय-
दंसणे सुरूवे, बहुजणस्स वि य णं भत्ते ! सुबाहुकुमारे इट्टे इट्टरूवे-
5 सोमे जाव सुरूवे । साहु जणस्स वि य ण भत्ते ! सुबाहुकुमारे इट्टे
जाव सुरूवे । सुबाहुणा भत्ते ! कुमारेण इमा एयारूवा उराला
माणुस्सरिद्धी किण्णा-लद्धा ? किण्णापत्ता ? किण्णा अभिसमण्णागया?
को वा एस आसी पुव्वभवे ? कि णामए वा ? किं गोत्तए वा ?

कयरसि गामंसि वा ? सण्णिवेसंसि वा ? किं वा दच्चा ? कि वा भोच्चा ? कि वा किच्चा ? किं वा समायरित्ता ? कस्स वा तथा-रूवस्स समणस्स वा माहणस्स वा अंतिए एगमवि आयरिय धम्मियं सुवयणं सोच्चा णिसम्म सुबाहुकुमारेणं इमेयारूवा उराला माणुरस्स-रिद्धी-लद्धा, पत्ता, अभिसमण्णागया ?

एवं खलु गोयमा ! तेण कालेणं तेण समएणं इहेव जम्बूदीवे दीवे भारहेवासे हत्थिणाउरे णाम णयरे होत्था, रिद्धित्थि-मिय समिद्धे वण्णओ । तत्थ णं हत्थिणाउरे णयरे, सुमुहे णाम गाहावई परिवसइ, अड्ढे दित्ते जाव अपरिभूए ।

तेणं कालेण तेणं समएणं धम्मघोसे णाम थेरे जाइ-सपण्णे कुल संपण्णे जाव पचहि समण-सएहि सद्धि संपरिवुडे पुव्वाणुपुव्वि चरमाणे गामाणुगाम दूइज्जमाणे जेणेव हत्थिणाउरे णयरे जेणेव सहस्सम्ब वणे-उज्जाणे तेणेव उवागच्छइ उवागच्छित्ता, अहा पडिरूव उग्गह उगिण्हइ उगिण्हित्ता सजमेणं तवसा अप्पाण भावेमाणे विहरइ ।

तेण कालेण तेण समएणं धम्म-घोसाणं थेराणं अतेवासी सुदत्ते णामं अणगारे उराले जाव सखित्त तेउलेस्से मास-मासेण खममाणे विहरइ । तए ण से सुदत्ते अणगारे मासक्खमण-पारणगसि पढमाए पोरिसीए सज्झाय करेइ । बीयए पोरिसीए झाणं-झियाएइ । जहा गोयम सामी तहेव धम्मघोसं थेर आपुच्छइ आपुच्छित्ता धम्मघोस-थेरस्स अब्भणुण्णाए समाणे धम्मघोस थेरस्स अंतियाओ सुदत्ते अणगारे पडिणिक्खमइ हत्थिणाउरे णयरे उच्च-णीय-मज्झिम-कुलाइं अडमाणे सुमुहस्स गाहावइस्स गिहं अणुपविट्ठे ।

तए ण से सुमुहे-गाहावई सुदत्तं अणगारं एज्जमाणं पासेइ, पासित्ता हट्टुट्ठे आसणाओ अब्भुट्ठेइ, अब्भुट्ठित्ता पाय-पीढाओ पच्चोरुहइ, पच्चोरुहित्ता पाउयाओ ओमुयइ, ओमुइत्ता एगसाडियं-उत्तरासगा

करेइ, करित्ता सुदत्त-अणगार सत्तइ-पयाइ अणुगच्छइ अणुगच्छित्ता
 तिक्खुत्तो आयाहिण पयाहिण करेइ, करित्ता वदइ, णमसइ वदित्ता,
 णमसित्ता जेणेव भत्तघरे तेणेव उवागच्छइ उवागच्छित्ता सयहत्येण
 विउलेण असणं पाण खाइम साइमं पडिलाभिस्सामि त्ति कट्टु तुट्ठे,
 पडिलाभेमाणे वि तुट्ठे, पडिलाभिए वि तुट्ठे ।

तए ण तस्स सुमुहस्स गाहावइस्स तेण दव्व-सुद्धेण, दायग-
 सुद्धेण, पडिग्गाहग-सुद्धेणं तिविहेणं तिकरण-सुद्धेण सुदत्ते अणगारे
 पडिलाभिए समाणे संसारे परित्तीकए । मणुस्सारुए णिबद्धे । गिहसि
 य से इमाइ पंच दिव्वाइं पाउब्भूयाइं । तजहा—1. वसुहारा वुट्ठा,
 2 दसद्ध-वण्णे कुसुमे णिवाइए, 3. चेलुक्खेवे कए 4 आहयाओ देव
 दुदुहीओ 5 अतरा वि य णं आगासंसि अहोदाण अहोदाण घुट्ठे य ।

तए णं हत्थिणाउरे णयरे महापहेसु-बहुज्जणो अण्ण-मण्णस्स
 एव-माइक्खइ, एव भासइ, एवं पण्णवेइ एवं परूवेइ 4 त धण्णे णं
 देवाणुप्पिया ! सुमुहे गाहावई, [कयत्ये ण, कयपुण्णे णं, कय-लक्खणे
 कया ण लोया सुलद्धे णं माणुस्सए जम्म-जीविय फले सुमुहस्स
 गाहावईस्स, जस्स ण गिहसि तहारूवे समणे, समण-रूवे पडिलाभिए
 समाणे इमाइ पच दिव्वाइं पाउब्भूयाइं ।

तए णं से सुमुहे गाहावई बहूहि वाससयाइ आउय पालेइ,
 पालित्ता कालमासे काल किच्चा इहेव हत्थिसीसे णयरे अदीण
 सत्तुस्स रण्णो धारिणीए देवीए कुच्छिसि पुत्तत्ताए उववण्णे । तए ण
 सा धारिणीदेवी सयणिज्जसि सुत्तजागरा-ओहीरमाणी-ओहीरमाणी
 तहेव सीह पासेइ । सेस त चेव जाव उप्पि-पासाए य वरगए विहरइ ।
 एवं खलु गोयमा ! सुबाहुणा इमा एयारूवा माणुस्सरिद्धि लद्धा पत्ता
 अभिसमण्णागया ।

पभू ण भन्ते ! सुबाहुकुमारे देवाणुप्पियाण अतिए मुण्डे भवित्ता
 अगाराओ अणगारिय पव्वइत्तए ? हत्ता, पभू ! तए ण से भगव गोयमे

समण भगवं महावीरं वंदइ णमंसइ-वंदित्ता-णमसित्ता सजमेणं तवसा
अप्पाण भावेमाणे विहरइ ।

तए णं से समणे भगवं महावीरे अण्णया कयाइं हत्थि सीसाओ
णयराओ पुप्फ-करण्डाओ-उज्जाणाओ कयवण-माल-प्पियस्स
जक्खस्स जक्खाय-यणाओ पडिणिक्खमइ पडिणिक्खमित्ता बहिया
जणवय विहारं विहरइ ।

तए णं से सुबाहुकुमारे समणोवासए जाए अभिगय जीवाजीवे
(उवलद्ध पुण्ण-पावे, आसव-संवर-णिज्जर-किरियाहिगरण-बन्ध-
मोक्ख-कुसले, असहेज्ज देवतासुराइएहि देवगणेहि णिग्गथाओ
पावयणाओ अणइक्क-मणिज्जे, णिग्गंथे पावयणे णिस्सकिए
णिक्कंखिए णिव्विइ-गिच्छे लद्धट्ठे, गहियट्ठे पुच्छियट्ठे अहियट्ठे,
विणिच्छियट्ठे अट्ठि-मिज-पेमाणुरागरत्ते अयमाउसो ! णिग्गंथे-पावयणे
अट्ठे, अय परमट्ठे, सेसे अणट्ठे, उसिय-फलहे, अवगुय-दुवारे, चियत्ततेउर
घरप्पवेसे बहूहि सीलव्वयगुण वेरमण पच्चक्खाण पोसहोप-वासेहि
चाउ-दसट्ठ-मुद्धिट्ठ-पुण्ण-मासिणीसु पडिपुण्णं पोसह सम्मं अणुपालेमाणे
समणे णिग्गंथे फासु-एसणिज्जेण असणं जाव ओसह भेसज्जेण य
पडिलाभेमाणे अहा परिग्गहिएहि तवोकम्मेहि अप्पाण भावेमाणे विहरइ ।

तए ण से सुबाहुकुमारे अण्णया कयाइ चाउ-दसट्ठ-मुद्धिट्ठ
पुण्ण-मासिणीसु जेणेव पोसहसाला तेणेव उवागच्छइ, उवागच्छित्ता
पोसहसाल पमज्जइ, पमज्जित्ता, उच्चार-पासवण भूमि पडिलेहेइ,
पडिलेहित्ता, दब्भ-संथारग सथरेइ, संथरित्ता, दब्भ-सथारग दुरुहइ,
दुरुहित्ता, अट्ठम-भत्त पगिण्हइ पगिण्हित्ता पोसहसालाए पोसहिए
अट्ठम-भत्तिए पोसहं पडिजागरमाणे विहरइ ।

तए णं तरस्स सुबाहुस्स कुमारस्स पुव्वरत्ता-वरत्त काल-समयसि
धम्मजागरियं जागरमाणस्स इमे एयारूवे अज्झत्थिए चिंतिए, कप्पिए,
पत्थिए मणोगए सकप्पे समुप्पज्जित्था धण्णा ण ! ते गामागर, जाव
सण्णिवेसा जत्थ ण समणे भगवं महावीरे विहरइ ।

धण्णा ण ते राईसर-तलवर-माडम्बिय कोडुम्बिय-इब्भ सेट्ठी सेणावइ सत्थवाह पभइओ। जे ण समणस्स भगवओ महावीरस्स अंतिए मुंडे भवित्ता अगाराओ अणगारिय पव्वयति।

धण्णां ते राईसर जाव सत्थवाह पभइओ जे णं समणस्स भगवओ महावीरस्स अतिए धम्मं पडिसुणेन्ति। त जइ ण समणे भगवं महावीरे पुव्वाणुपुव्वि चरमाणे गामाणुगामं दूइज्जमाणे-इह-मागच्छेज्जा जाव विहरेज्जा। तए ण अह समणस्स भगवओ महावीरस्स अतिए मुंडे भवित्ता अगाराओ अणगारियं पव्वएज्जा।

तए ण समणे भगव महावीरे सुबाहुस्स कुमारस्स इम एयारूवं अज्झत्थियं, चिन्तियं, कप्पिय, पत्थियं मणोगय सकप्पं वियाणित्ता, पुव्वाणुपुव्वि-चरमाणे गामाणुगाम दूइज्जमाणे, जेणेव हत्थीसीसे णयरे, जेणेव पु-करण्डे-उज्जाणे, जेणेव कयवणमाल पियस्स जक्खरस्स जक्खाययणे, तेणेव उवागच्छइ उवागच्छित्ता अहा पडिरूव उग्गह उगिण्हित्ता सजमेण तवसा अप्पाण भावेमाणे विहरइ। परिसा, णिग्गया राया वि णिग्गओ। तए ण तस्स सुबाहु कुमारस्स तं महया जहा पढम तहा णिग्गओ। धम्मो कहिओ। परिसा पडिगया राया वि पडिगओ।

तए णं से सुबाहु कुमारे समणस्स भगवओ महावीरस्स अतिए धम्म सोच्चा णिसम्म हट्ट-तुट्टे समण भगव महावीर वदइ णमसइ एवं वयासी-सद्दहामि ण भंते ! णिग्गथ पावयणं एव पत्तियामि ण, रोएमि ण, अब्भुट्टेमि ण भंते। णिग्गथ पावयण एवमेय, तहमेय, अवितहमेय असदिग्घमेय भंते णिग्गथ पावयण इच्छिय-पडिच्छियमेय भंते ! से जहेव त तुब्भे वदह। ज णवरं देवाणुप्पिया ! अम्मापिअरो आपुच्छामि तओ पच्छा देवाणुप्पियाण अतिए मुण्डे भवित्ताण अगाराओ अणगारिय पव्वइस्सामि। अहासुह देवाणुप्पिया ! मा पडिबन्ध करेह।

तए ण से सुबाहुकुमारे समण भगव महावीर वदित्ता णमसित्ता

जाव जेणामेव सए भवणे तेणामेव उवागच्छइ जेणेव अम्मापियरो तेणेव उवागच्छिता अम्मापिरुण पायवडणं करेइ, करित्ता एव वयासी— एवं खलु अम्मयाओ ! मए समणस्स भगवओ महावीरस्स अतिए धम्मे णिसते, से वि य धम्मे से इच्छिए पडिच्छिए अभिरुइए।

तए णं तस्स सुबाहु-कुमारस्स अम्मापियरो सबाहुकुमार एव वयासी—धण्णोसि णं तुम जाया सपुण्णो. कयत्थो. कय लक्खणोसि तुमं जाया, जे ण तुमे समणस्स भगवओ महावीरस्स अतिए धम्मे णिसंते से वि य ते धम्मे इच्छिए पडिच्छिए अभिरुइए।

तए णं से सुबाहुकुमारे अम्मापियरो दोच्चपि तच्चपि एवं वयासी— इच्छामि ण अम्मयाओ ! तुब्भेहि अब्भणुण्णाए समाणे समणस्स भगवओ महावीरस्स अतिए मुण्डे भवित्ताण अगाराओ अणगारिय पव्वइत्तए।

तए णं धारिणी देवी त अणिट्ठं जाव अस्सुय पुव्वं फरुस गिर सोच्चा णिसम्म इमेण एया-रूवेण जाव विलवमाणी। सुबाहुकुमार एवं वयासी—तुहंसि ण जाया अम्ह एगे पुत्ते जाव णो खलु जाया अम्हे इच्छामो खणमवि विप्पओग सहित्तए, त भुञ्जाहि ताव जाया ! विउले माणुस्सए कामभोगे जाव, ताव वयं जीवामो। ताओ पच्छा अम्हेहिं कालगएहि, परिणयवए वड्डिय-कुलवस तन्तु-कज्जम्मि णिरावयक्खे समणस्स भगवओ महावीरस्स अंतिए मुण्डे भवित्ता अगाराओ अणगारिय पव्वइस्ससि।

तए णं से सुबाहुकुमारे अम्मा-पिरुहि एव वुत्ते—एवं खलु अम्मयाओ माणुस्सए भवे अधुवे, अणियए असासए वसणस-उवदवाभिभूए विज्जुलया चंचले, अणिच्चे जलबुब्बुय-समाणे, कुसग्ग-जलबिदु सण्णिभे, सझ्झ-रागसरिसे, सुविण दसणोवमे सडण-पडण विद्वंसण धम्मे पच्छापु च ण अवस्स विप्पजहणिज्जे, से के ण जाणंति अम्मयाओ ! के पुव्विं गमणाए, के पच्छा गमणाए। त

इच्छामि णं अम्मयाओ ! तुब्भेहि अब्भणुणाए समाणे समणस्स भगवओ महावीरस्स जाव पव्वइत्तए ।

तए णं तं सुबाहुकुमार अम्मापिअरो एव वयासी—इमाओ ते जाया । सरिसियाओ, जाव राय-कुलेहितो आणिल्लियाओ भारियाओ तं भुञ्जाहि ण जाया ! एताहि सद्धि विउले माणुस्सए कामभोगे तओ पच्छा भुत्तभोगे समणस्स भगवओ महावीरस्स जाव पव्वइस्ससि ?

तए णं से सुबाहुकुमारे अम्मापियर एव वयासी—एव खलु अम्मयाओ । माणुस्सगा कामभोगा असुई, जाव सुक्कसोणिय संभवा, अधुवा-अणितिया-असासया-सडण-पडण-विद्धसण धम्मा, पच्छा पुर च णं अवरस्स विप्पजहणिज्जा जाव त इच्छामि णं अम्मायाओ । जाव पव्वइत्तए ।

तए णं तं सुबाहुकुमार अम्मापिअरो एवं वयासी—इमे य ते जाया । अज्जय पज्जय पिउपज्जयागए सुबहुहिरण्णे य जाव पगाम परिभाएउं तं अणुहोहित्ति ताव जाव जाया विउल माणुस्सग इद्धिसक्कार-समुदय, तओ पच्छा अणुभूय-कल्लाणे समणस्स भगवओ महावीरस्स जाव पव्वइस्ससि ?

तए णं से सुबाहुकुमारे अम्मापिअर एव वयासी—हिरण्णे य, सुवण्णे य जाव सावइज्जे अग्गि-साहिए, चोर-साहिए, राय-साहिए, दाइय-साहिए, मच्चु-साहिए, अग्गि-सामण्णे जाव मच्चु-सामण्णे सडण-पडण विद्धसण धम्मे पच्छा पुर च ण अवरस्स विप्पजहणिज्जे । से के णं जाणइ अम्मयाओ । के पुव्वि, के पच्छा गमणाए । त इच्छामि ण अमायाओ तुब्भेहि अब्भणुणाए समाणे समणस्स भगवओ महावीरस्स अतिए जाव पवइत्तए ।

तए ण तरस्स सुबाहु कुमारस्स अम्मापियरो जाहे णो सचाएति, सुबाहुकुमार बहुहि विसयाणु-लोमाहि वा ताहे विसय-पडिकूलाहि सजम भउव्वेय कारियाहि पण्ण-वणाहि य पण्ण-वेमाणा एव वयासी—

एस णं जाया । णिग्गथे पावयणे सच्चे अणुत्तरे केवलिए, पडिपुण्णे, पेयाउए, ससुद्धे, सल्लगत्तणे, सिद्धि-मग्गे, मुत्ति-मग्गे, णिज्जाण-मग्गे, णिव्वाण-मग्गे, सव्व-दुक्ख-पहीण-मग्गे, अहीव एगतदिट्ठीए, खुरो इव एगंतधाराए, लोहमया इव जवा चाबेयव्वा, बालुया-कवले इव गिरस्साए, गंगाइव-महाणइ पडिसोय-गमणाए, महासमुद्धो इव भूयाहिंदुत्तरे, तिक्खं चकमियव्व, गरुय, लम्बेयव्वं, असिधारेव्व संचरियव्वं ।

णो खलु कप्पइ जाया । समणाणं णिगथाणं आहाकम्मिए वा, उद्देसिए वा, कीयगडे वा, ठविए वा, रइए वा, दुब्भिक्खभत्ते वा, कतार-भत्ते वा, वद्दलिया-भत्ते वा, गिलाण-भत्ते वा, मूलभोयणे वा, कदभोयणे वा, फलभोयणे वा, बीयभोयणे वा, हरियभोयणे वा, भोत्तए वा, पायए वा ।

तुम य ण जाया । सुह-समुचिए णो चेव ण दुहसमुचिए, णाल सीय, णाल उण्हं, णाल खुहा, णालं पिवास, णाल वाइयं-पित्तिय णि-सण्णिवाइय विविहे रोगायंके उच्चावए गामकण्टए बीवासं णो-सग्गे उदिण्णे सम्म अहियासित्तए, भुञ्जाहि ताव जाया ! णो-सग्गे कामभोगे तओ पच्छा भुत्तभोगी समणस्स जाव पव्वइस्ससि ?

तए ण से सुबाहु कुमारे अम्मा पिऊहि एव वुत्ते-एवं खलु अम्मयाओ णिग्गथे पावयणे कीवाणं, कापुरिसाण, इहलोग पडिबद्धाण परलोग-णिप्पिवासाणं दुरणुचरे, पायय जणस्स णो चेव णं धीरस्स णिच्छियव-वसियस्स एत्थ कि दुक्कर करणयाए । त इच्छामि णं अम्मयाओ । तुब्भेहि अब्भणुण्णाए समाणे समणस्स जाव पव्वइत्तए ।

तए ण त सुबाहु कुमारं अम्मापिअरो जाहे णो संचाएइ बहूहि विसयाणु-लोमाहि य, विसय-पडिकूलाहि य, ताहे अकामए चेव सुबाहुकुमारं एवं वयासी-इच्छामो ताव जाया । एगदिवसमवि ते रायसिरि पासित्तए । तए ण से सुबाहुकुमारे अम्मापिअर-मणुवत्तमाणे

तुसिणीए संचिद्धइ । तए ण से अदीणसत्तु राया कोडुम्बिय पुरिसे सद्दावेइ सद्दावित्ता एवं वयासी—खिप्पामेव भो देवाणुप्पिया ! सुबाहु कुमारस्स महत्थ महग्घ महरिह विउलं रायाभिसेय उवट्टवेह । तए ण ते कोडुम्बिय पुरिसा जाव ते वि तहेव उवट्टवेन्ति ।

तए ण से अदीणसत्तू राया बहूहि गणणायग-दण्डणायगेहि य जाव सपरिवुडे सुबाहुकुमार अट्टसएण सोवण्णियाण कलसाण^१ एवं रूप्पमयाण कलसाण^२ सुवण्ण-रूप्पमयाण कलसाण^३ मणिमयाण कलसाण^४ सुवण्ण मणिमयाणं कलसाण^५ रूप्पमणिमयाण कलसाणं^६ सुवण्ण-रूप्प-मणि-मयाण कलसाणं^७ भोमेज्जाणं कलसाणं^८ सव्वोदएहि सव्व-मट्टियाहि सव्व-पुप्फेहि सव्व-गंधेहि सव्व-मल्लेहि सव्वोसहिहि य सिद्धत्थएहि य सव्विद्धीए सव्व-जुतीए सव्व-बलेण जाव दुंदुभि-निग्घोसणादि-तरवेण महया महया रायाभिसेएण अभिसिचइ, अभिसिचित्ता करयल जाव कट्टु एव वयासी—

जय जय नन्दा ! जय जय भद्दा ! जय नन्दा ! भद्द ते, अजिय जिणाहि, जाव विहराहि त्ति कट्टु जय जय सद्द पउजति ।

तए णं से सुबाहुकुमारे राया जाए, महया जाव विहरइ, तए ण तस्स सुबाहुस्स रण्णो अम्मापियरो एवं वयासी—भण जाया ! किं दलयामो, किं पयच्छामो, किं वा ते हियइच्छिए सामत्थे (मते) ?

तए ण से सुबाहूराया अम्मापियरो एव वयासी—इच्छामि ण अम्मयाओ ! कुत्तिया-वणाओ रयहरण पडिग्गहग च आणियं, कासवयं च सद्दावेउं ।

तए ण से अदीणसत्तू राया कोडुम्बिय पुरिसे सद्दावेइ, सद्दावेत्ता एव वयासी—गच्छह णं तुब्भे देवाणुप्पिया ! सिरिघराओ तिण्णि सयसहस्साइ गहाय दोहि सयसहस्सेहि कुत्तियावणाओ रयहरण पडिग्गहग च उवणेह, सयसहस्सेण कासवय सद्दावेह ।

तए ण ते कोडुम्बिय पुरिसा अदीणसत्तुणा रण्णा एव वुत्ता

समाणा हृद्द तुड्डा सिरि घराओ तिन्नि सयसहस्साइं गहाय, कुत्तिया वण्णाओ दोहिं सयसहस्सेहिं रयहरणं पडिग्गहं च उवणेन्ति । सय-सहस्सेण कासवयं सद्दावेति ।

तए णं से कासवए हृद्द तुड्ड हियए ण्हाए मंगल-पायच्छित्ते सुद्ध-प्पावेसाइं वत्थाइं मगलाइं पवर-परिहिए अप्प महग्घाभरणालकिय सरीरे जेणेव अदीणसत्तू राया तेणेव उवागच्छइ, उवागच्छित्ता अदीणसत्तुं रायं करयल-मंजलिं कट्टु एवं वयासी-सदिसह णं देवाणुप्पिया ! जं मए करणिज्ज ?

तए णं से अदीणसत्तू राया कासवयं एवं वयासी-गच्छाहि ण तुमं देवाणुप्पिया ! सुरभिणा गधोदएण णिक्के हत्थपाए पक्खालेह । सेयाए चउप्फालाए पोत्तीए मुहं बधित्ता सुबाहुस्स कुमारस्स चउरगुल वज्जे णिक्कमण पाउग्गे अग्गकेसे कप्पेहि ।

तए णं से कासवए सुरभिणा-गधोदएण हत्थपाए पक्खालेइ पक्खालेत्ता सुद्ध वत्थेण मुहं बधित्ता परेणं जत्तेणं सुबाहुस्स कुमारस्स -वज्जे निक्खमण पाउग्गे अग्गकेसे कप्पेइ ।

तए णं तस्स सुबाहुस्स कुमारस्स माया महरिहेणं हसलक्खणेण पडसाडएणं अग्गकेसे पडिच्छइ । जाव विलवमाणी एवं वयासी-एस णं अम्ह सुबाहुस्स कुमारस्स अब्भुदएसु य, उस्सवेसु य, पसवेसु य, तिहीसु य, छणेसु य, जन्नेसु य, पव्वणीसु य अपच्छिमे दरिसणे भविस्सइ त्ति कट्टु ऊसीसामूले ठवेइ ।

तए णं तस्स सुबाहुस्स कुमारस्स अम्मापियरो उत्तराव-क्कमण सीहासणं रयावेन्ति, रयावेत्ता सुबाहुकुमार दोच्चपि तच्चंपि सेय पीयएहि कलसेहि ण्हावेन्ति, जाव गंथि-मवेढिम पूरिम संघाइमेण चउव्विहेणं मल्लेण कप्प-रुक्खग पि व अलंकिय विभूसियं करेति ।

तए णं से अदीणसत्तू राया कोड्डुम्बिय पुरिसे सद्दावेइ, सद्दावेत्ता एव वयासी-खिप्पामेव भो देवाणुप्पिया ! अणेगखम्भ सय सन्निविड्ड

सुहृदास सस्मिरीय रूवं सिग्धं तुरिय चवल पुरिस-सहस्स वाहिणी
सीय उवड्वेह । तए णं ते कोडुम्बिय पुरिसा हट्ट तुड्ड जाव उवड्डावेन्ति ।

तए णं से सुबाहुकुमारे सीयं दुरुहइ, दुरुहिन्ता सीहासण
वरगए पुरत्थाभिमुहे सन्निसन्ने । तए णं तस्स सुबाहुकुमारस्स माया
ण्हाया कयवलि-कम्मा जाव अप्पमहग्घा-भरणा-लकिय-सरीरा सीय
दुरुहइ, दुरुहिन्ता, सुबाहुकुमारस्स दाहिणे पासे भद्दासणंसि णिसीयइ ।

तए णं तस्स सुबाहुस्स कुमारस्स अम्ब धाई रयहरणं पडिग्गहगं
च गहाय सुबाहुस्स कुमारस्स वामे पासे भद्दासणंसि निसीयइ । तए
णं तस्स सुबाहुस्स कुमारस्स पिड्डओ एगा वरतरुणी ।

तए ण तस्स सुबाहुस्स कुमारस्स पिड्डओ एगा वरतरुणी
सिगारागार चारुवेसा जाव हिमरयय कुंदेन्दु पगासं सकोरट मल्ल-दाम
धवलं आयवत्त गहाय सलील ओहारेमाणी चिड्डइ ।

तए णं तस्स सुबाहुस्स कुमारस्स दुवे वर तरुणीओ सिंगारागार
चारुवेसाओ जाव कुसलाओ सुबाहुस्स कुमारस्स उभओ पासं सुहुमवर
दीहवालाओ सख-कुंद-दग-रयअमय-महिय फेणपुञ्ज सन्निगासाओ
चामराओ गहाय सलीलं ओहारेमाणीओ-2 चिड्डन्ति ।

तए ण एगा वरतरुणी सुबाहुस्स कुमारस्स पुरओ पुरत्थिमेण
चन्द-प्पभव-इरवेरुलिय विमलदण्ड तालियण्टं गहाय चिड्डइ ।

तए ण तस्स एगा वरतरुणी सुबाहुस्स कुमारस्स पुव्व-दक्खिणेण
सेय रययामय विमल-सलिल-पुत्रं मत्तगय महामुहा किति समाण
भिगार गहाय चिड्डइ ।

तए ण तस्स सुबाहुकुमारस्स पिया कोडुम्बिय पुरिसे सद्दावेत्ता
एवं वयासी-खिप्पामेव भो देवाणुप्पिया । सरिसयाणं जाव एगा
भरणं गहिय निज्जोयाण कोडुम्बिय वर तरुणाण सहस्स सद्दावेन्ति,
जाव तेणामेव उवागच्छिन्ता । अदीणसत्तु राय एवं वयासी-सदि
सहण देवाणुप्पिया । जण्णं अम्हेहि करणिज्ज । तए ण से अदीणसत्तु

राया तं एवं वयासी—गच्छह णं देवाणुप्पिया ! सुबाहुस्स कुमारस्स पुरिस-सहस्स-वाहिणिं सीयं परिवहेह । तए णं तं कोडुम्बिय वरतरुण सहस्सं हड्डतुडं सुबाहुस्स कुमारस्स पुरिस सहस्सवाहिणि सीयं परिवहइ ।

तए णं सुबाहुस्स कुमारस्स पुरिस-सहस्स वाहिणि सीय दुरुढस्स समाणस्स इमे अट्टट्ट मंगलयात प्पढमयाए पुरओ अहाणु-पुव्वीए सम्पत्थिया । तं जहा—1 सोत्थिय 2. सिरीवच्छ 3 णदियावत्त 4. वद्धमाणग 5 भद्दासन 6. कलस 7. मच्छ 8 दप्पण 8, जाव वहवे अत्थत्थिया जाव ताहि इट्ठाहिं जाव अणवरय मगल जय जय सद्दं पउंजंति ।

तए ण सुबाहुकुमारे हत्थिसीसस्स णगरस्स मज्झं-मज्झेणं णिग्गच्छइ । जेणेव पुप्फ करण्डे उज्जाणे तेणेव उवागच्छइ, पुरिस सहस्स वाहिणीओ सीयाओ पच्चोरुहइ ।

तए णं तस्स सुबाहुस्स कुमारस्स अम्मापियरो सुबाहु कुमारं पुरओ कट्टु जेणामेव समणे भगव महावीरे तेणामेव उवागच्छइ, समणं भगवं महावीरं वदन्ति णमंसति, एवं वयासी—

एस णं देवाणुप्पिया ! सुबाहु कुमारे अहं एगे पुत्ते, इट्ठे, कंते पिये जाव संसार भउव्विग्गे, भीए जम्मण-जरा-मरणाणं, इच्छइ देवाणुप्पियाणं अन्तिए मुण्डे-भविता आगाराओ अणगारिय पव्वइत्तए । अह्हे ण देवाणुप्पियाणं सिस्स-भिक्षं दलयामो । पडिच्छतु णं तुम्हे देवाणुप्पिया ! सिस्स भिक्षं ।

तए णं समणे भगव महावीरे सुबाहुस्स कुमारस्स अम्मा पिऊहिं एव वुत्ते समाणे एयमड्डं सम्मं पडिसुणेइ । तए णं से सुबाहुकुमारे समणस्स भगवओ महावीरस्स अन्तियाओ उत्तर-पुरत्थिम दिसीभागं अवक्कमइ, अवक्कमिता सयमेव आभरण मल्लालकार उम्मुयइ ।

तए णं से सुबाहुकुमारस्स माया हंस लक्खणेणं पडगसाडएणं

आभरण मल्लालंकारं पडिच्छइ, जाव विलवमाणी एवं वयासी-
जइयव्वं जाया ! घडियव्वं जाया ! परिक्कामियव्व जाया ! अस्सि
च णं अट्ठे णो पमाएयव्वं। अम्हं पि ण 'एवमेव मग्गे भवउ' त्ति
कट्टु।

तए णं से सुबाहुकुमारे पंच मुट्टिय लोय करेइ, समण भगव
महावीर वदइ नमंसइ, एव वयासी-आलित्तेण भंते ! लोए, पलित्तेणं
भते ! लोए, आलित्त-पलित्ते ण भते ! लोए, जराए मरणेण य। से
जहा णामए कोइ गाहावई अगारंसि झियाय माणसि जे तत्थ भण्डे
भवइ, अप्पभारे मोल्ल-गरुए तं गहाय आयाए एगत अवक्कमइ, एस
मे णित्थारिए समाणे पच्छा पुराहियाए, सुहाए, खेमाए णिस्सेसाए
अणुगामियताए भविस्सइ एवामेव मम वि एगे आया भण्डे इट्ठे कंते
पिए मणुण्णे मणामे एस मे णिच्छारिए समाणे ससार-वोच्छेय-करे
भविस्सइ। त इच्छामि णं देवाणुप्पिएहि सयमेव पव्वाइय, सयमेव
मुण्डावियं, सेहावियं सिक्खा-विय सयमेव आयार-गोयर-विणय-
वेणइय-चरण-करण जाया-माया-वत्तिय धम्म-माइक्खिय।

तए ण समणे भगवं महावीरे सुबाहुकुमार सयमेव पव्वावेइ,
सयमेव मुण्डावेइ, सयमेव आयार जाव धम्ममाइक्खइ। एव
देवाणुप्पिया ! गतव्वं चिट्टियव्व णिसीयव्व तुयट्टियव्व भुञ्जियव्व भासियव्व
एवं उट्ठाए उट्ठाय पाणेहि भूतेहि जीवेहि सत्तेहि सज्जमेण सज्जमियव्वं
अस्सि च ण अट्ठे णो पमायेयव्व।

तए ण से सुबाहुकुमारे समणस्स भगवओ महावीरस्स अन्तिए
इम एयारूव धम्मियं उवएसं णिसम्म सम्म पडिवज्जइ। तमाणाए
तह गच्छह, तह चिट्टइ जाव उट्ठाए उट्ठाय पाणेहि भूएहि जीवेहिं
सत्तेहि सज्जमेइ।

तए णं सुबाहुकुमार अणगारे जाए इरिया-समिए (भासा-समिए,
एसणा-समिए, आयाण-भण्ड-मत्त-णिक्खेवणा-समिए, उच्चार-

पासवण-खेल-जल्ल-सिघाण परिद्धावणिया समिए, मण-समिए, वय-समिए, काय-समिए, मणगुत्तिए, वयगुत्तिए, कायगुत्तिए, गुत्ते, गुत्तिदिए,) गुत्त-बंधयारी ।

तए णं से सुबाहु अणगारे समणस्स भगवओ महावीरस्स तहा रूवाणं-थेराणं अंतिए सामाइय-माइयाइ एक्कारस-अगाइ अहिज्जइ, अहिज्जित्ता बहूहिं चउत्थ-छट्ठम् दसम्-दुवालसेहि मासद्ध-मास-खमणेहि विचित्तेहि तवोविहाणेहि अप्पाणं भावित्ता, बहूइ वासाइ सामण्ण परियागं पाउणित्ता मासियाए सलेहणाए अप्पाण झूसित्ता सट्ठि भत्ताइं अणसणाइ छेदित्ता-आलोइय-पडिक्कते समाहिपत्ते-कालमासे-काल किच्चा सोहम्मे कप्पे देवताए उववण्णे ।

से ण ताओ देव लोगाओ आउक्खएणं भवक्खएणं टिईक्खएणं अणतरं चयं चइत्ता माणुस्स विग्गहं लभिहिइ लभिहित्ता केवल बोहि बुज्झिहिइ बुज्झिहित्ता तहा रूवाणं थेराणं अतिए मुडे भवित्ता अणगारियं पव्वइस्सइ । से णं तत्थ बहूइं वासाइ सामण्णं परियाग पाउणिहिइ पाउणिहित्ता आलोइय पडिक्कते समाहिपत्ते कालमासे कालं किच्चा सणकुमारे कप्पे देवत्ताए उववज्जिहिइ ।

से णं ताओ देवलोगाओ माणुस्सं जाव पव्वज्जा, बभलोए । तओ माणुस्सं । महासुक्के । तओ माणुस्सं । आणए देवे । तओ माणुस्सं । तओ आरणे । तओ माणुस्सं सव्वड्ड-सिद्धे ।

से णं देवलोगाओ अणंतरं चयं चइत्ता कहि गच्छिहिइ ? कहि उववज्जिहिइ ?

गोयमा ! महाविदेह वासे जाइं इमाइ कुलाहिं भवंति, अट्टाइ, दित्ताइं वित्ताइं विच्छिण्ण-विउल भवण-सयणासण-जाण-वाहणाइं बहु-धण, बहु जाय रूव रययाइं, आओग-पओग सम्पउत्ताइ, विच्छड्डिय पउर-भत्त पाणाइ, बहु दासी-दास, गो-महिस, गवेलग-प्पभूयाइं बहु जणस्स अपरि-भूयाइ, तहप्प-गारेसु कुलेसु पुत्तताए पच्चायाहिइ ।

तए ण तस्स दारगस्स माया णवण्ह मासाण बहु पडिपुण्णाण
सुरूवं दारयं पयाहिइ, जहेव पुव्वं, तहेव णेयव्व जाव भोय रएणं
णोवलिप्पइ तहेव मित्त-णाइ णियग सम्बंधि परिजणेणं, से ण तहा
रूवाणं थेराण अन्तिए केवलं बोहि बुज्झिहिइ । केवल मुण्डे भवित्ता
अगाराओ अणगारियं पव्वइस्सइ ।

से णं अणगारे भविस्सइ, इरिया समिए जाव सुहुय-हुयासणो
इवं तेयसा जलंते । तस्स ण भगवओ अणुत्तरेण णाणेण एवं दंसणेणं
चरित्तेणं आलएणं विहारेणं अज्जवेण, मद्वेण लाघवेणं खतिए गुत्तीए
मुत्तीए अणुत्तरेण सव्व-सज्जम, तवसु-चरिय-फल-णिव्वाण मग्गेण
अप्पाणं भावे-माणस्स अणन्ते अणुत्तरे कसिणे पडिपुण्णे णिरावरणे
णिव्वाघाए केवल वर णाण दंसणे सम्मुप्पज्जिहिइ ।

तए णं से भगवं अरहा जिणे केवली भविस्सइ । सदेव मणुया-
सुरस्स लोगस्स परिथागं जाणिहिइ पासिहिइ, तजहा-आगइ, गइ,
ठिइं, चवण, उववायं, तक्कं पच्छाकडं, पुरेकडं मणो-माणसिय खइयं
भुत्तं कडं पडिसेविय आवीकम्मं रहोकम्म अरहा अरहस्स भागी त त
कालं मण-वय-काय-जोगे वट्टमाणणं सव्वलोए सव्व-जीवाण सव्व
भावे जाणमाणे पासमाणे विहरिस्सइ ।

तए णं से सुबाहू केवली एया रूवेण विहारेणं विहरमाणे बहूइ
वासाइं केवलि परियागं पाउणित्ता अप्पणो आउसेसं आभोइत्ता बहूइं
भत्ताइ पच्चक्खाइस्सइ, पच्चक्खाइत्ता, बहूइ भत्ताइं अण-सणाए
छेदिस्सइ, छेदिता जरस्सट्टाए कीरइ णग्ग-भावे, मुण्ड-भावे केसलोचे
बम्भचेर-वासे अण्हाणगं अदंत-वणं, अछत्तगं अणुवाहणगं भूमि
सिज्जाओ, फलह सिज्जाओ, पर घर-पवेसो, लद्धाव-लद्धाइ, माणाव-
माणाइ, परेहि-हीलणाओ, णिदणाओ, खिसणाओ, गरहणाओ,
तज्जणाओ, तालणाओ, परिभावणाओ, पव्वहणाओ, उच्चावया, विरूवा
बावीसं परीषहोव-सग्गा, गामकण्टगा अहिया सेज्जन्ति तमइ आराहेइ

आराहिता चरमेहि ऊसास-णीसासेहि सिज्जिहिइ, बुज्जिहिइ, मुच्चिहिइ, परिणिव्वाहिइ सव्व दुक्खाण मंतं करेहिइ ।

सेवं भते ! सेवं भते ! भगवं गोयमे समण भगवं महावीरं वंदइ णमंसइ वदित्ता णमसित्ता संजमेण तवसा अप्पाणं भावे माणे विहरइ ।

एव खलु जम्बू ! समणेणं भगवया महावीरेणं जाव सम्पत्तेणं सुह विवागाण पढमज्झयणस्स अयमट्ठे पण्णत्ते ।

॥ तिबेमि ॥ सुहविवागस्स पढमं अज्झयणं सम्मत्तं ॥

दूसरा अध्ययन : भद्रनन्दी कुमार

(2) बिइयस्स उक्खेवओ । जइ णं भंते ! समणेण भगवया महावीरेणं जाव सम्पत्तेणं सुह विवागाण पढमस्स अज्झयणस्स अयमट्ठे पण्णत्ते । बिइयस्स णं भंते ! अज्झयणस्स सुहविवागाणं समणेण भगवया महावीरेणं जाव संपत्तेण के अट्ठे पण्णत्ते ? एवं खलु जम्बू ! तेणं कालेण तेणं समएणं उसभपुरे णाम णयरे, थूभ-करण्डग-उज्जाण । धण्णो जक्खो । धणावहो राया । सरस्सई देवी । सुमिण-दंसणं, कहणं, जम्मं-बालत्तणं कलाओ य जोव्वणे पाणिग्गहणं, दाओ पासाय य भोगा य । जहा सुबाहुस्स । णवर भदणंदी कुमारे । सिरीदेवी पामोक्खाणं पंचसया कण्णा पाणिग्गहण । सामिस्स समोसरणं, सावग-धम्मं पडिवज्जे । पुव्वभव पुच्छ, महाविदेह वासे पुंडरीगिणी णयरी, विजए-कुमारे । जुगबाहू तित्थयरे पडिलाभिए । मणुस्साउए णिबद्धे । इहं उववण्णे । सेसं जहा सुबाहुस्स जाव महाविदेहे-वासे सिज्जिहिइ बुज्जिहिइ मुच्चिहिइ परिणिव्वाहिइ सव्व-दुक्खाण-मंतं करेहिइ । एवं खलु जम्बू ! समणेणं भगवया महावीरेण जाव सम्पत्तेण सुह विवागाणं बिइयस्स अज्झयणस्स अयमट्ठे पण्णत्ते ।

॥ सुहविवागस्स बीयमज्झयण सम्मत्तं ॥ 2 ॥

तृतीय अध्ययन : सुजात कुमार

(3) तईयस्स उक्खेवो। जइ णं भते ! समणेणं भगवया महावीरेणं जाव संपत्तेणं सुह विवागाणं बिइयस्स अज्झयणस्स अयमट्ठे पण्णत्ते। तईयस्स णं भंते ! अज्झयणस्स सुहविवागाणं समणेणं भगवया महावीरेणं जाव सम्पत्तेण के अट्ठे पण्णत्ते ? वीरपुर णाम णयरं। मणोरम उज्जाण वीरकण्हे जक्खे। मित्ते राया। सिरीदेवी। सुजाए कुमारे। बलसिरी पामोक्खाणं पंचसया कण्णगाण पाणि गहणं। सामी समोसरिए। पुव्वभव्वं पुच्छ। उसुयारे णयरे। उसभदत्ते गाहावई। पुप्फदंते अणगारे पडिलाभिए। मणुस्साए णिबद्धे। इह उववण्णे। जाव महाविदेहे वासे सिज्झिहिइ। बुज्झिहिइ मुच्चिहिइ, परिणिव्वाहिइ सव्व दुक्खाण मंत करिहिइ। एव खलु जम्बू समणेणं भगवया महावीरेणं जाव संपत्तेणं तच्चस्स अज्झयणस्स अयमट्ठे पण्णत्ते।

॥ सुहविवागस्स तइयं अज्झयण सम्मत्त ॥

चौथा अध्ययन : सुवासव कुमार

(4) चउत्थस्स उक्खेवओ। जइ णं भते ! समणेण भगवया महावीरेण जाव सपत्तेणं सुह विवागाणं तयियस्स अज्झयणस्स अयमट्ठे पण्णत्ते। चउत्थस्स णं भंते ! अज्झयणस्स सुहविवागाणं समणेण भगवया महावीरेणं जाव सम्पत्तेण के अट्ठे पण्णत्ते ? विजंयपुरं णयरं। णदणवणं उज्जाणं। असोगो जक्खो। वासव दत्ते राया। कण्हसिरी देवी। सुवासवे कुमारे। भद्दा पामोक्खाण पच सयाण रायवर कण्णगाण जाव पुव्व भव्व पुच्छ। कोसम्बी णयरी। धणपालो राया। वेसमण भद्दे अणगारे पडिलाभिए। इह उववण्णे जाव सिद्धे।

एवं खलु जम्बू ! समणेणं भगवया महावीरेणं जाव संपत्तेण सुह विवागाणं चउत्थस्स अज्झयणस्स अयमट्ठे पण्णत्ते ।

॥ सुह विवागस्स चउत्थंअज्झयणसम्मत्तं ॥

पाँचवा अध्ययन : जिणदास

(5) पंचमस्स उक्खेवो । जइ णं भंते ! समणेणं भगवया महावीरेणं जाव संपत्तेणं सुह विवागाणं चउत्थस्स अज्झयणस्स अयमट्ठे पण्णत्ते । पंचमस्स णं भंते ! अज्झयणस्स सुहविवागाणं समणेण भगवया महावीरेणं जाव संपत्तेण के अट्ठे पण्णत्ते ? सोगंधिया णयरी । नीलासोगे उज्जाणे । सुकालो जक्खो । अपडिहओ राया । सुकण्हा देवी । महचंदे कुमारे । तस्स अरहदत्ता भारिया । जिणदासो पुत्तो । तित्थयरा गमणं । जिणदासो पुव्वभवं पुच्छा । मज्झमिया णयरी । मेहरहे राया । सुधम्मे अणगारे पडिलाभिए जाव सिद्धे ।

एवं खलु जम्बू ! समणेणं भगवया महावीरेण जाव संपत्तेण सुह विवागाणं पंचमस्स अज्झयणस्स अयमट्ठे पण्णत्ते ।

॥ सुहविवागस्स पंचम अज्झयणं सम्मत्तं ॥

छट्टा अध्ययन : धनपति

(6) छट्टस्स उक्खेवो । जइ णं भंते ! समणेण भगवया महावीरेण जाव संपत्तेणं सुह विवागाणं पंचमस्स अज्झयणस्स अयमट्ठे पण्णत्ते । छट्टस्स णं भंते ! अज्झयणस्स सुहविवागाणं समणेणं भगवया महावीरेण जाव संपत्तेण के अट्ठे पण्णत्ते ? कणग पुरं णयरं । सेयासोये उज्जाणं, वीरभट्टो जक्खो । पियचदो राया । सुभट्टा देवी । वेसमणे कुमारे जुवराया । सिरीदेवी पामोक्खाणं पचसयाण रायवर

कण्णगाणं पाणिग्गहणं । तित्थयरागमण । धणवई जुवराय पुत्ते जाव
पुव्वभवं पुच्छा । मणिवइया णयरी । मित्तेराया । संभूय विजए अणगारे
पडिलाभिए जाव सिद्धे ।

एवं खलु जम्बू ! समणेण भगवया महावीरेण जाव सपत्तेण
सुह विवागाणं छट्ठस्स अज्झयणस्स अयमट्ठे पण्णत्ते ।

॥ छट्ठ अज्झयणं सम्मत्तं ॥

सातवाँ अध्ययन : महाबल

(7) सत्तमस्स उक्खेवो । जइ णं भंते ! समणेण भगवया
महावीरेणं जाव संपत्तेणं सुह विवागाणं छट्ठस्स अज्झयणस्स अयमट्ठे
पण्णत्ते । सत्तमस्स णं भंते ! अज्झयणस्स सुहविवागाण समणेण
भगवया महावीरेणं जाव सम्पत्तेण के अट्ठे पण्णत्ते ? महापुर णयर ।
रत्तासोगे उज्जाणं । रत्तापाओ जक्खो । बलेराया । सुभद्धा देवी । महब्बले
कुंमारे । रत्तवई पामोक्खाण पंच सयाणं रायवर कण्णगाणं पाणिग्गहणं ।
तित्थयरागमणं जाव पुव्वभव पुच्छा । मणिपुर णयर । णागदत्ते गाहावई,
इन्ददत्ते अणगारे पडिलाभिए जाव सिद्धे ।

एवं खलु जम्बू ! समणेणं भगवया महावीरेण जाव सपत्तेण
सुह विवागाणं सत्तमस्स अज्झयणस्स अयमट्ठे पण्णत्ते ।

॥ सुहविवागस्स सत्तमं अज्झयणं सम्मत्तं ॥

आठवाँ अध्ययन : भद्रनन्दी

(8) अट्ठमस्स उक्खेवो । जइ ण भते ! समणेणं भगवया
महावीरेण जाव संपत्तेण सुह विवागाण सत्तमस्स अज्झयणस्स अयमट्ठे
पण्णत्ते । अट्ठमस्स णं भते ! अज्झयणस्स सुहविवागाण समणेण
भगवया महावीरेण जाव संपत्तेण के अट्ठे पण्णत्ते ? सुघोसं णयर ।

देव रमणं उज्जाणं । वीरसेणो जक्खो । अज्जुणो राया । रत्तवई
देवी । भद्दणन्दी कुमारे । सिरीदेवी पामोक्खाणं पंचसयाणं रायवर
कण्णगाण पाणिग्गहणं जाव पुव्वभवं पुच्छा । महाघोसे णयरे । धम्मघोसे
गाहावई । धम्म-सीहे अणगारे पडिलाभिए जाव सिद्धे ।

एवं खलु जम्बू ! समणेणं भगवया महावीरेणं जाव संपत्तेण
सुह विवागाण अट्टमस्स अज्झयणस्स अयमट्ठे पण्णत्ते ।

॥ सुहविवागस्स अट्टमं अज्झयणं सम्मत्तं ॥

नौवाँ अध्ययन : महाचन्द्र

(9) णवमस्स उक्खेवो । जइ णं भते ! समणेणं भगवया
महावीरेणं जाव संपत्तेण सुह विवागाण अट्टमस्स अज्झयणस्स अयमट्ठे
पण्णत्ते । णवमस्स ण भंते ! अज्झयणस्स सुहविवागाणं समणेणं
भगवया महावीरेणं जाव सपत्तेण के अट्ठे पण्णत्ते ? चम्पा णयरी ।
पुण्णभद्दे उज्जाणे । पुण्णभद्दो जक्खो । दत्तेराया । रत्तवई देवी । महचदे
कुमारे जुवराया । सिरीकंता पामोक्खाण पंच सयाणं रायवर कण्णगाण
पाणिग्गहणं । जाव पुव्वभवं पुच्छा । तिगिच्छा णयरी । जियसत्तू राया
धम्म-वीरिए अणगारे पडिलाभिए जाव सिद्धे ।

एव खलु जम्बू ! समणेण भगवया महावीरेणं जाव सम्पत्तेण
सुह विवागाणं णवमस्स अज्झयणस्स अयमट्ठे पण्णत्ते ।

॥ सुहविवागस्स नवम अज्झयणं सम्मत्तं ॥

दसवाँ अध्ययन : वरदत्त

(10) जइ णं भते ! दसमस्स उक्खेवो । एवं खलु जम्बू ! तेणं
कालेणं तेणं समएणं साइए णाम णयर होत्था । उत्तर कुरु उज्जाणे ।
पासामिओ जक्खो । मित्तनंदी राया । सिरीकंता देवी । वरदत्ते कुमारे ।

अज्ज-सुहम्मस्स थेरस्स अदूर-मासंते उट्ट-जाणू अहोसिरे ज्ञाण-
कोट्टोवगए संजमेणं तवसा अप्पाणं भावेमाणे विहरइ। तए णं से
अज्ज जम्बू जाए सट्टे जाव समुप्पण्ण सट्टे, समुपण्ण ससए समुपण्ण
कोउहल्ले उठाए उट्टेइ उट्टेत्ता जेणामेव अज्ज-सुहुम्मे थेरे जेणामेव
उवागच्छइ उवागच्छित्ता अज्ज सुहुम्मे थेरे वंदइ णमसइ वंदित्ता
णमंसित्ता णच्चासण्णे णाइदूरे सूस्सूसमाणे णमंसमाणे अभिमुहे
पंजलिउडे विणएणं पज्जुवासमाणे एव वयासी-

जइ ण भंते ! समणेणं भगवया महावीरेणं जाव सम्पत्तेणं
अट्टमस्स अंगस्स अन्तगड-दसाणं अयमट्टे पण्णत्ते, णवमस्स णं
भंते ! अंगस्स अणुत्तरोववाइय-दसाणं समणेण भगवया महावीरेणं
जाव संपत्तेणं के अट्टे पण्णत्ते ? ।

तएण से सुहम्मे अणगारे, जम्बू अणगार एवं वयासी-एवं खलु
जम्बू ! समणेणं भगवया महावीरेण [आइगरेण, तित्थयरेण सय-सम्बुद्धेणं
पुरिसुत्तमेणं पुरिस-सीहेण, पुरिसवर-पुण्डरीएण, पुरिसवर-गंध-
त्थिणा लोगुत्तमेणं लोग-णाहेणं, लोग-हिएणं, लोग-पईवेण, लोग-
ज्जां रे अभय-दएणं, चक्खु-दएणं, मग्ग-दएण, सरण-दएणं,
जीव-दएणं, बोहि-दएणं धम्म-दएणं, धम्मदेसएण धम्म णायगेणं,
धम्म-सारहिणा, धम्मवर-चाउरत-चक्कवट्टीणा, दीवोताणं सरण गई
पइट्टेणं, अप्पडिहय-वर णाण-दसण-धरेणं, वियट्ट-छउमेण जिणेण
जावएणं, तिण्णेणं-तारएणं, बुद्धेणं बोहएणं, मुत्तेणं मोअगेण सव्व-ण्णेणं,
सव्व-दरिसणेण सिव-मयल-मरुअ-मणन्त-मक्खसय-मव्वाबाह-
मपुणरावित्तिअं सासयं ठाणं] सपत्तेणं णवमस्स अंगस्स अणुत्तरोववाइय-
दसाणं तिण्णि वग्गा पण्णत्ता ॥१॥

जइ ण भंते ! समणेण भगवया महावीरेणं जाव संपत्तेणं
णवमस्स अंगस्स अणुत्तरोव-वाइय-दसाणं तओ वग्गा पण्णत्ता, पढमस्स
णं भंते ! वग्गस्स अणुत्तरोव-वाइय-दसाणं समणेण भगवया महावीरेणं
जाव संपत्तेणं कइ अज्झयणा पण्णत्ता ? ।

एवं खलु जम्बू। समणेण भगवया महावीरेण जाव संपत्तेणं
अणुत्तरोववाइय-दसाण पढमस्स वग्गस्स दस अज्झयणा पण्णत्ता,
तंजहा-

जालि, मयालि, उवयाली, पुरिससेणे य, वारिससेणे य।

दीहदंते य, लड्ढदंते य, वेहल्ले, वेहासे, अभए इ य कुमारे।।1।।॥२॥

जइ ण भंते ! समणेणं भगवया महावीरेण जाव सपत्तेणं
पढमस्स वग्गस्स दस अज्झयणा पण्णत्ता, पढमस्स णं भंते !
अज्झयणस्स अणुत्तरोव-वाइय-दसाणं समणेणं जाव संपत्तेणं के
अट्टे पण्णत्ते ? ।

एव खलु जम्बू ! तेणं कालेण तेणं समएण रायगिहे णयरे
रिद्धित्थि-मिय-समिद्धे, गुणसिलए चेइए, सेणिए राया, धारिणी देवी,
सीहो-सुमिणे पासित्ताण पडिबुद्धा जाव जालिकुमारे जाए जहा मेहो
जाव अट्टट्ठओ दाओ, जाव उप्पिपासाए जाव विहरइ।।३॥

तेण कालेणं तेणं समएणं समण भगवं महावीरे जाव समोसडे,
सेणिओ णिग्गओ, जहा मेहो तहा जाली वि णिग्गओ, तहेव णिक्खंतो
जहा मेहो। एक्कारस अगाइं अहिज्जइ।

तएणं से जाली अणगारे जेणेव, समणे भगव महावीरे तेणेव
आगच्छइ आगच्छित्ता समणं भगवं महावीरं वंदइ णमसइ वदित्ता
णमसित्ता एवं वयासी-इच्छामिण भंते ! तुब्भेहि अब्भणुणाए समाणे
गुण-रयणं संवच्छरं तवोकम्मं उवसपजित्ताण विहरित्तए ? अहासुहं
देवाणुप्पिया ! मा पडिबन्ध करेह।

तएण से जाली अणगारे समणेणं भगवया महावीरेण अब्भणुणाए
समाणे समण भगवं महावीरं वंदइ णमंसइ-2त्ता गुण-रयणं संवच्छरं
तवोकम्म उवसपजित्ताणं विहरइ।

तं जहा-

(1) पढम मास चउत्थ चउत्थेण अणिक्खित्तेणं तवो-कम्मेणं

दियद्वाणु-क्कडुय सूरामिमुहे आयावण-भूमिए आयावेमाणे रत्ति वीरासणेणं अवाउडेण य ।

(2) दोच्चं मासं छट्ठंछट्टेणं अणिकिखतेणं तवोकम्मेणं दियद्वाणुक्कडुए सुरामिमुहे आयावण-भूमिए आयावेमाणे, रत्तिं वीरासणेणं अवाउडेण य ।

(3) तच्चं मासं अट्ठमं-अट्ठमेणं अणिकिखतेणं तवोकम्मेणं दियद्वाणुक्कडुए सुरामिमुहे, आयावण-भूमिए आयावेमाणे, रत्तिं वीरासणेणं अवाउडेण य ।

(4) चउत्थं मासं दसमं-दसमेण अणिकिखतेण तवोकम्मेणं दियद्वाणुक्कडुए सुरामिमुहे आयावण भूमिए आयावेमाणे रत्तिं वीरासणेणं अवाउडेण य ।

(5) पंचमं मासं बारसमं बारसमेणं अणिकिखतेणं तवोकम्मेणं दियद्वाणुक्कडुए सुरामिमुहे आयावण-भूमिए आयावेमाणे रत्तिं वीरासणेणं अवाउडेण य ।

(6) छट्ठं मासं चउदस चउदसमेण अणिकिखतेणं तवोकम्मेणं दियद्वाणुक्कडुए सुरामिमुहे आयावण-भूमिए आयावेमाणे रत्तिं वीरासणेणं अवाउडेण य ।

(7) सत्तमं मासं सोलसमं सोलसमेण अणिकिखतेणं तवोकम्मेणं दियद्वाणुक्कडुए सुरामिमुहे आयावण-भूमिए आयावेमाणे रत्तिं वीरासणेणं अवाउडेण य ।

(8) अट्ठमं मासं अट्ठारसमं अट्ठारसमेणं अणिकिखतेणं तवो कम्मेणं दियद्वाणुक्कडुए सुरामिमुहे आयावण-भूमिए आयावेमाणे रत्ति वीरासणेणं अवाउडेण य ।

(9) णवमं मास बीसइमं वीसइमेणं अणिकिखतेणं तवोकम्मेणं दियद्वाणुक्कडुए सुरामिमुहे आयावण-भूमिए आयावेमाणे रत्तिं वीरासणेण अवाउडेण य ।

(10) दसमं मास बावीसाए बावीसईमेण अणिकिखतेणं तवो कम्मेणं दियट्ठाणुक्कडुए सुराभिमुहे आयावण-भूमिए आयावेमाणे रत्तिं वीरासणेणं अवाउडेण य ।

(11) एकारसमं मासं चउवीसाए चउवीसईमेणं अणिकिखतेणं तवोकम्मेणं दियट्ठाणुक्कडुए सुराभिमुहे आयावण-भूमिए आयावेमाणे रत्तिं वीरासणेणं अवाउडेण य ।

(12) बारसमं मासं छब्बीसाए छब्बीसईमेण अणिकिखतेणं तवो कम्मेणं दियट्ठाणुक्कडुए सुराभिमुहे आयावण-भूमिए आयावेमाणे रत्तिं वीरासणेण अवाउडेण य ।

(13) तेरसमं मासं अठावीसाए अठावीसईमेणं अणिकिखतेण तवोकम्मेण दियट्ठाणुक्कडुए सुराभिमुहे आयावण-भूमिए आयावेमाणे रत्तिं वीरासणेणं अवाउडेण य ।

(14) चउदसमं मासं तीसइ तीसईमेणं अणिकिखतेणं तवो कम्मेणं दियट्ठाणुक्कडुए सुराभिमुहे आयावण-भूमिए आयावेमाणे रत्ति वीरासणेणं अवाउडेण य ।

(15) पण्णरसमं मासं बत्तीसइम बत्तीसईमेण अणिकिखतेणं तवो कम्मेणं दियट्ठाणुक्कडुए सुराभिमुहे आयावण-भूमिए आयावेमाणे रत्ति वीरासणेणं अवाउडेण य ।

(16) सोलमं मासं चोत्तीसइमं चोत्तीसईमेण अणिकिखतेण तवो कम्मेण दियट्ठाणुक्कडुए सुराभिमुहे आयावण-भूमिए आयावेमाणे रत्तिं वीरासणेणं अवाउडेण य ।

तएणं से जाली अणगारे गुणरयण-संवच्छर तवो-कम्म अहासुतं अहाकप्प अहामग्ग अहातच्च सम-काएणं फासित्ता पालित्ता सोहित्ता तिरित्ता किट्ठित्ता आणाए आराहित्ता । ॥४॥

जेणेव समणे भगवं महावीरे तेणेव उवागच्छइ उवागच्छित्ता समण भगव महावीरं वदइ णमसइ वदित्ता णमसित्ता बहुहि चउत्थ

छट्ट-अट्टम-दसम-दुवालसेहिं-मासेहिं, अधमास-खमणेहि विचित्तेहि तवोकम्मेहिं अप्पाण भावेमाणे विहरइ ।

तएणं से जाली अणगारे तेणं उरालेणं विउलेण पयत्तेणं पग्गहिएण एव जा चेव जहा खंदगस्स वत्तव्वया, सा चेव चिन्तणा आपुच्छणा, थेरेहिं सद्धिं विउलं तहेव दुरुहइ । णवर सोलस्स वासाइं सामण्ण परियागं पाउणित्ता कालमासे कालं किच्चा उड्डं चन्दिम-सोहम्मीसाण जाव आरणच्चुए, कप्पे, नवगेवेज्ज य विमाण-पत्थडे उड्ड दूरं वीईवइत्ता विजय विमाणे देवत्ताए उववण्णे ।

तए णं ते थेरा भगवंता जालिं अणगारं कालगयं जाणित्ता, परिनिव्वाण-वत्तियं काउस्सगं करेइ, करित्ता पत्त-चीवराइ गिण्हंति तहेव उत्तरंति जाव इमे य से आयार भण्डए । ॥५॥

भंते त्ति ! भगवं गोयमे समणं भगवं महावीर वदइ णमंसइ, वंदित्ता णमसित्ता एवं वयासी-“एव खलु देवाणु-प्पियाण अंतेवासी जाली णाम अणगारे पगइ-भदए । से णं जाली अणगारे कालगए कहिंगए, कहिंउववण्णे ?

एवं खलु गोयमा ! ममं अंतेवासी तहेव जहा खदयस्स जाव कालगए उड्डं चदिम । { सूर गहगण-णक्खत्त-तारा-रूवाणं बहूइं जोयणाइं, बहूइं जोयण-सयाइं, बहूइं जोयण-सहस्साइ, बहूइं जोयण सय-सहस्साइं, बहूइं जोयण-कोडीओ, बहूइं जोयण कोडा-कोडीओ, अडढं दूरं उप्पइत्ता सोहम्मीसाण सणंकुमार, माहिद-बंध-लतग-महासुक्क-सहस्साराणय-पाणयारण-च्चुए तिण्णि य अठार-सुत्तरे गेवेज्ज विमाणा-वाससए वीई-वइत्ता । } विजये महाविमाणे देवत्ताए उववण्णे ।

जालिस्स णं भंते ! देवस्स केवइयं कालं द्विई पण्णत्ता ? गोयमा ! बत्तीसं सागरोवमाइं द्विई पण्णत्ता ।

से ण भंते ! ताओ देवलोयाओ आउ-क्खएणं भवक्खएणं ठिइक्खएणं कहि गच्छिहिइ, कहिं उवज्जिहिइ ?

सीहे य, सीहसेणे य, महासीहसेणे य आहिए।

पुण्णसेणे य बोधव्वे, तेरसमे होइ अज्झयणे ॥२॥ ॥१॥

जइ णं भंते ! समणेणं भगवया महावीरेणं जाव संपत्तेण
अणुत्तरोववाइय-दसाणं दोच्चस्स वग्गस्स तेरस अज्झयणा पण्णत्ता,
दोच्चस्सणं भंते ! वग्गस्स पढमस्स अज्झयणस्स समणेणं भगवया
महावीरेणं जाव सम्पत्तेणं के अट्टे पण्णत्ते ?

एवं खलु जम्बू ! तेणं कालेणं तेणं समएणं रायगिहे णयरे,
गुणसिए चेइए, सेणिए राया, धारिणी देवी, सीहो-सुमिणे जहा
जाली तहा जम्मं, बालत्तणं, कलाओ, णवरं दीहसेणे कुमारे। सव्वेव
वत्तव्वया, जहा जालिस्स जाव अन्तं काहिइ। ॥२॥

एव तेरसण्हं वि रायगिहे णयरे, सेणिओप्पिया, धारिणी माया,
तेरसण्हं वि सोलस-वासा परियाओ, मासीयाए संलेहणाए आणुपुव्वीए
उववाओ विजय दोण्णि, वेजयंते दोण्णि, जयंते दोण्णि, अपराजिए
दोण्णि, सेसा महादुमसेणं माइए पंच सव्वड्ड-सिद्धे।

एवं खलु जम्बू ! समणेणं भगवया महावीरेणं जाव संपत्तेण
अणुत्तरोव-वाइय-दसाणं दोच्चस्स वग्गस्स अयमट्टे पण्णत्ते, मासियाए
संलेहणाए दोसु वि वग्गेषु। त्ति बेमि ॥ बीओवग्गो सम्मत्तो ॥३॥

तृतीय वर्ग

जइ णं भंते ! समणेणं भगवया महावीरेणं जाव संपत्तेण
अणुत्तरोववाइय-दसाणं दोच्चस्स वग्गस्स अयमट्टे पण्णत्ते, तच्चस्स
णं भंते ! वग्गस्स अणुत्तरोववाइय-दसाणं समणेणं भगवया महावीरेणं
जाव संपत्तेणं के अट्टे पण्णत्ते ?।

एव खलु जम्बू ! समणेणं भगवया महावीरेणं जाव संपत्तेण
अणुत्तरोव-वाइय-दसाणं तच्चस्स वग्गस्स दस अज्झयणा पण्णत्ता
तंजहा—

धण्णे य, सुणक्खत्ते इसिदासे य, आहिए ।

पेल्लए, रामपुत्ते य, चदिमा पिट्ठिमाइय ।।1।।

पेढालपुत्ते अणगारे, णवमे पोट्टिले वि य ।

वेहल्ले, दसमे वुत्ते, एते अज्झयणा आहिया ।।2।। ॥१॥

जइ ण भंते ! समणेण भगवया महावीरेण जाव सपत्तेण
अणुत्तरोववाइय-दसाणं तच्चस्स वग्गस्स दस अज्झयणा पण्णत्ता,
पढमस्स ण भंते ! अज्झयणस्स समणेणं भगवया महावीरेणं जाव
सपत्तेण के अट्टे पण्णत्ते ? ।

एवं खलु जम्बू ! तेणं कालेण तेण समएण कायदी णाम
णयरी होत्था, रिद्धत्थिमिय-समिद्धा, सहसब-वणे उज्जाणे सव्वो उ
य पुप्फफल-समिद्धे जाव पासाइए जियसत्तू राया ।

तत्थ ण कायंदीए णयरीए भद्दा णामं सत्थवाही परिवसइ,
अड्ढा जाव अपरिभूया । ॥२॥

तीसे ण भद्दाए सत्थवाहीए पुत्ते धण्ण नाम दारए होत्था,
अहीण { पचिन्दिय सरीरे लक्खण वजण-गुणोववेए माणुम्माण-पमाण-
पडिपुण्ण सुजाय सव्वग-सुदरंगे ससि सोमाकारे कंते, पियदसणे । }
सुरुवे, पचधाई-परिग्गहिए, तजहा-खीरधाइए । जहा महब्बलो जाव
बावत्तरि कलाओ अहीए जाव अल भोग-समत्थे, साहसिए वियालचारी
जाए यावि होत्था । ॥३॥

तए ण सा भद्दा सत्थवाही धण्णदारय उमुक्क-बालभावं जाव
भोग-समत्थं यावि जाणित्ता, बत्तीस पासाय-वडिंसए कारेइ कारेइत्ता
अभुग्गय-मूसिए जाव तेसि मज्झे एग-भवण अणेग-खभ-सय-
सन्निविट्ठ । जाव बत्तीसाए इब्भवर-कण्णगाण एग-दिवसेण पाणि-
गिण्हावेइ गिण्हावेत्ता बत्तीसओ दाओ जाव उप्पि पासाय वडिसए
फुट्टेएहि मुइग-मत्थएहि जाव विहरइ । ॥४॥

तेण कालेण तेण समएण समणे भगव महावीरे समोसट्ठे,
परिसा णिग्गया, राया जहा कोणिओ तहा जियसत्तू णिग्गओ ।

तए ण तरस्स धण्णस्स तं महया जणसदं जहा जमाली तहा णिग्गओ, णवरं पायचारेणं जाव ज णवर अम्मय भदं सत्थवाहि आपुच्छामि । तए ण अह देवाणुप्पियाणं अतिए मुण्डे भवित्ता अगाराओ अणगारिय पव्वयामि । अहासुह देवाणुप्पिया ! मा पडिबन्ध । जाव जहा जमाली तहा आपुच्छइ ।

त इच्छामि णं अम्मयाओ ! तुब्भेहि अब्भणुण्णाए समाणे समणस्स भगवओ महावीरस्स अतिय मुण्डे भवित्ता अगाराओ अणगारिय पव्वइत्तए ।

तए ण सा धण्णस्स कुमारस्स माया त जाव असुयपुव्वगिर सोच्चा मुच्छिया । वुत्त-पडिवुत्तिया, जहा महाब्बले जाव कदमाणी सोयमाणी विलवमाणी जाव त णो खलु जाया ! अम्हे इच्छामो ! तुब्भ खणमिव विप्पओगे सहित्तए, त अच्छाहि ताव जाया ! जाव ताव अम्हे जीवामो, तओ पच्छा अम्हेहि कालगएहि समाणेहि परिणयवये वड्डिय-कुल-वस-तन्तु कज्जम्मि णिरवयक्खे समणस्स भगवओ महावीरस्स अंतिय मुण्डे भवित्ता अगाराओ अणगारियं पव्वइहिसि ।

तएण धण्णे-कुमारे अम्मा-पिअरो एव वयासी-तहेव ण त अम्मयाओ । ज ण तुब्भे मम एव वयह, तुमंसि ण जाया । अम्ह एगे पुत्ते, इट्ठे, कते चेव जाव पव्वइहिसि, एवं खलु अम्मयाओ । माणुस्सए भवे अणेग जाइ-जरा मरण रोग सारीर-माणस-पकाम-दुक्ख-वेयण-वसण सओव-द्ववाभिभूए अधुवे, अणिचए, असासए सज्झब्भ-राग सरिसे, जल-बुब्बुए-समाणे, कुसग्ग-जलबिन्दु-सण्णिभे, सुविणग-दसणोवमे, विज्जु-लया-चचले, अणिच्चे सडण-पडग-विद्धसण-धम्मे, पुव्वि वा पच्छा वा अवस्स विप्पजहियव्वे भविस्सइ । से केस ण जाणइ, अम्मयाओ । के पुव्विं गमणयाए के पच्छा गमणयाए ? त इच्छामि ण अम्मयाओ । तुब्भेहि अब्भणुण्णाए समाणे समणस्स जाव पव्वइत्तए॥५॥

तए ण त धण्ण कुमार भद्दा-सत्थवाही जाहे णो सचाएइ जाव
जियसत्तु आपुच्छइ, छत्त-मउड-चामराओ सयमेव जियसत्तू-निक्खमण
करेइ, जहा थावच्चा-पुत्तस्स कण्हो, जाव पव्वइए, अणगारे जाए,
इरियासमिए जाव गुत्त-बभयारी ॥६॥

तएण से धण्णे अणगारे, ज चेव दिवस मुडे भवित्ता अगाराओ
अणगारियं पव्वइयए त चेव दिवस समणं भगव महावीर वदइ
णमंसइ वदित्ता णमसित्ता एव वयासी-एव खलु इच्छामि ण भते !
तुभ्भेहि अब्भणुण्णाए समाणे जावज्जीवाए छट्ठं-छट्ठेण अणिक्खत्तेण,
आयम्बिल-परिग्गहिणं तवो कम्मेण अप्पाण भावेमाणे विहरित्तए ।
छट्ठस्स वि य णं पारणयसि कप्पइ मे आयम्बिल पडिगाहित्तए, णो
चेव णं अणायबिल, तपि य ससट्ठेण णो चेव ण असंसट्ठेण । त पि य
ण उज्झिय-धम्मियं णो चेव ण अणुज्झिय-धम्मिय । तं पि य जं
अण्णे बहवे समण-माहण अतिहि-किवण-वणिमगा णावकंखति ?
अहासुह देवाणुप्पिया ! मा पडिबंध करेह ।

तएणं से धण्णे अणगारे समणेणं भगवया महावीरेणं ।
अब्भणुण्णाए समाणे हट्ठ-तुट्ठ जावज्जीवाए छट्ठ-छट्ठेण अणिक्खत्तेण
तवो-कमेणं अप्पाण भावेमाणे विहरइ ॥७॥

तए ण से धण्णे अणगारे पढम-छट्ठ-खमण-पारणयसि पढमाए
पोरिसीए सज्झाय करेइ । जहा गोयमसामी तहेव आपुच्छइ { बीयाए
पोरिसीए ज्ञाण झियायइ, तइयाए पोरिसीए अतुरिय-मचवल-मसंभते,
मुह-पोत्तिय-पडिलेहेइ पडिलेहिता भायणाइं वत्थाइ पडिलेहेइ,
पडिलेहिता भायणाइ पमज्जइ, पमज्जित्ता, भायणाइं उग्गहेइ,
उग्गहित्ता, जेणेव समणे भगव महावीरे तेणेव उवागच्छइ उवागच्छित्ता
समण भगव महावीर वदइ णमसइ एव वयासी-इच्छामि ण भते
तुभ्भेहि अब्भणुण्णाए छट्ठक्खमण पारणगसि कायदीए णयरीए उच्च-
नीय-मज्झिमाइ कुलाइ धर-समुयाणस्स भिक्खायरियाए अडित्तए ।

अहासुहं देवाणुप्पिया मा पडिबंध ।

तए णं धण्णे अणगारे समणेणं भगवया महावीरेणं अब्भणु-ण्णाए समाणे समणस्स भगवओ महावीरस्स अंतियाओ सहसंब-वणाओ उज्जाणाओ पडिणिक्खमइ, पडिणिक्खमिता अतुरिय-मवचल-मसभते जगुंतर पलोयणाए दिट्ठीए पुरओरियं सोहमाणे सोहमाणे ।} जाव जेणेव काकंदी णयरी तेणेव उवागच्छइ 2 ता कायंदीए णयरीए उच्च-नीच जाव अडमाणे आयम्बिलं णो अणायम्बिलं जाव णावक्खइ ।

तए णं से धण्णे अणगारे ताए अब्भुज्जयाए पययाए पयत्ताए पग्गहियाए एसणाए, एसमाणे जइ भत्त लब्भइ, तो पाणं ण लब्भइ, अह पाणं लब्भइ, तो भत्तं ण लब्भइ ।

तएणं से धण्णे अणगारे अदीणे अविमणे अकलुसे अविसायी अपरितंत-जोगी जयण-घडण-जोग-चरित्ते अहापज्जत्त समुयाणं पडिगाहेइ पडिगाहेत्ता कायंदीओ णयरीओ पडिणिक्खमइ पडिणिक्खमिता जहा गोयमो तहा पडिदसेइ ।

तए ण से धण्णे अणगारे, समणेणं भगवया महावीरेणं अब्भणुण्णाए समाणे अमुच्छिए अगिद्धे अगट्टिए अणज्झोव-वण्णे बिलमिव पणग-भूएण अप्पाणेण आहारं आहोरइ आहारेत्ता, संजमेण-तवसा-अप्पाणं-भावेमाणे विहरइ ॥१८॥

तए ण समणे भगवं महावीरे अण्णया कयाइं कायंदीओ णयरीओ सहसंब वणाओ उज्जाणाओ पडिणिक्खमइ-पडिणिक्खमिता बहिया जणवय विहारं विहरइ ।

तए णं से धण्णे अणगारे समणस्स भगवओ महावीरस्स तहारूवाणं थेराण अंतिए सामाइय-माइयाइं एक्कारस्स अंगाइ अहिज्जइ-अहिज्जित्ता, संजमेणं तवसा अप्पाणं भावेमाणे विहरइ । तए ण से धण्णे अणगारे तेणं उरालेणं जहा खंदओ जाव सुहुय-हुयासणे इव तेयसा जलन्ते उवसोभेमाणे चिट्ठंइ ॥१९॥

धण्णस्स ण अणगारस्स पायाण अयमेयारूवे तवरूव-लावण्णे होत्था-से जहा णामए सुक्कच्छल्लीइ वा, कट्ट-पाउयाइ वा, जरग्ग ओवाहणाइ वा, एवामेव धण्णस्स अणगारस्स पाया सुक्का, लुक्खा निम्मंसा अट्ठि-चम्म-छिरत्ताए पण्णायत्ति, णो चेव ण मंस-सोणियत्ताए ।

धण्णस्स ण अणगारस्स पायगुलियाण अयमेयारूवे तवरूव लावण्णे होत्था-से जहा णामए कलसगलियाइ वा, मुग्ग-सगलियाइ वा मास-संगलियाइ वा, तरुणिया छिण्णा उण्हे दिण्णा सुक्का समाणी मिलायमाणी मिलायमाणी चिट्ठइ, एवामेव धण्णस्स पायंगुलियाओ सुक्काओ लुक्खाओ णिम्मसाओ, अट्ठि-चम्म-छिरत्ताए पण्णायंत्ति, णो चेव णं मंस-सोणियत्ताए ॥१०॥

धण्णस्स अणगारस्स जघाण अयमेयारूवे तवरूव-लावण्णे होत्था-से जहा णामए काक-जघाइ वा, कक-जघाइ वा, ढेणियालिया जघाइ वा, जाव णो चेव ण मस सोणियत्ताए ।

धण्णस्स अणगारस्स जाणूण अयमेयारूवे तवरूव-लावण्णे होत्था-से जहाणामए-काली-पोरेइ वा, मयूरपोरेइ वा, ढेणियालिया पोरेइ वा, एवं जाव णो चेव णं मस सोणियत्ताए ।

धण्णस्स णं उरुस्स अयमेयारूवे तवरूव लावण्णे होत्था-से जहाणामए—सामली करिल्लेइ वा, बोरीकरिल्लेइ वा, सल्लइय करिल्लेइ वा, तरुणिए उण्हे दिण्णे सुक्के समाणे मिलायमाणे चिट्ठइ, एवामेव धण्णस्स अणगारस्स उरू जाव सोणियत्ताए ॥११॥

धण्णस्स कडिपत्तस्स इमेयारूवे, तवरूव लावण्णे होत्था-से जहा णामए उट्ट-पाएइ वा, जरग्ग पाएइ वा महिस-पाएइ वा जाव णो चेव णं मंस सोणियत्ताए ।

धण्णस्स ण उदर-भायणस्स इमेयारूवे तवरूव-लावण्णे होत्था-से जहाणामए-सुक्कदिएइ वा, भज्जणय-कभल्लेइ वा, कट्टकोलम्बएइ वा एवामेव उदर सुक्क जाव णो चेव णं मंस सोणियत्ताए ।

धण्णस्स णं पांसुलिय-कडयाण इमेयारूवे तवरूव-लावण्णे होत्था-से जहा णामए थासया-वलीइ वा, पाणावलीइ वा, मुडावलीइ वा, एवामेव पासुलिया कडयाण जाव सोणियत्ताए।

धण्णस्स पिट्ठ करण्डयाण अयमेयारूवे तवरूव-लावण्णे होत्था-से जहा णामए-कण्णा-वल्लीइ वा, गोला-वलीइ वा, वड्डया-वलीइ वा, एवामेव पिट्ठ करण्डगाण जाव सोणियत्ताए।

धण्णस्स उर-कडयस्स अयमेयारूवे तवरूव लावण्णे होत्था-से जहाणामए-चित्तकट्टरेइ वा, वियण-पत्तेइ वा, तालिअंट-पत्तेइ वा, एवामेव उर-कडयस्स जाव सोणित्तयाए ॥१२॥

धण्णस्स ण अणगारस्स बाहाण तवरूव-लावण्णे होत्था-से जहाणामए समि-सगलियाइ वा, बाहाया-संगलियाइ वा, अगत्थिय-सगलियाइ वा, एवामेव बाहाण कडयस्स जाव सोणित्तयाए।

धण्णस्स ण अणगारस्स हत्थाणं अयमेयारूवे तवरूव-लावण्णे होत्था-से जहाणामए सुक्क-छगणियाइ वा, वड-पत्तेइ वा, पलास-पत्तेइ वा एवामेव हत्थाणं जाव सोणित्तयाए।

धण्णस्स ण अणगारस्स हत्थंगुलियाण अयमेयारूवे तवरूव लावण्णे होत्था-से जहाणामए कलाय-सगलियाइ वा, मुग्ग-सगलियाइ वा, मास-संगलियाइ वा, तरुणिया छिण्णा आयवे-दिण्णा सुक्का समाणी एवामेव हत्थगुलियाण जाव सोणित्तयाए ॥१३॥

धण्णस्स अणगारस्स गीवाए अयमेयारूवे तव रूव लावण्णे होत्था-से जहाणामए-करग-गीवाइ वा, कुण्डिया-गीवाइ वा, (कोत्थवणाइ वा) उच्चट्ट-वणएइ वा एवामेव गीवाए जाव सोणित्तयाए।

धण्णस्स णं अणगारस्स हणुयाए तवरूव-लावण्णे होत्था-से जहाणामए-लाउय-फलेइ वा, हकुब-फलेइ वा अब-गट्टियाइ वा, एवामेव हणुयाए जाव सोणित्तयाए।

धण्णस्स ण अणगारस्स ओट्टाण अयमेयारूवे तवरूव-लावण्णे

होत्था, से जहाणामए सुक्क-जलोयाइ वा, सिलेस-गुलियाइ वा, अलत्तग-गुलियाइ वा, (अम्बाडग-पेसीयाइ वा) एवामेव ओट्टाण जाव सोणित्तयाए ।

धण्णस्स ण अणगारस्स जिब्भाए अयमेयारूवे तवरूव-लावण्णे होत्था-से जहाणामए वड-पत्तेइ वा, पलास-पत्तेइ वा (उम्बर-पत्तेइ वा) साग-पत्तेइ वा एवामेव जिब्भाए जाव सोणित्तयाए ॥१४॥

धण्णस्स ण अणगारस्स नासाए अयमेयारूवे तवरूव-लावण्णे होत्था-से जहाणामए अम्बग-पेसियाइ वा, अम्बाडग-पेसियाइ वा, माउलिग-पेसियाइ वा, तारुणियाइ वा एवामेव णासायस्स जाव सोणित्तयाए ।

धण्णस्स ण अणगारस्स अच्छीण अयमेयारूवे तवरूव-लावण्णे होत्था-से जहा णामए-वीणा-छिड्डेइ वा वद्धीसग-छिड्डेइ वा, पाभाइय-तारगाइ वा, एवामेव अच्छीण जाव, सोणित्तयाए ।

धण्णस्स णं अणगारस्स कण्णाण, तवरूव-लावण्णे होत्था-से जहाणामए मूला-छल्लियाइ वा, वालुक-च्छल्लियाइ वा, कारेल्लय-छल्लियाइ वा, एवामेव कण्णाण जाव सोणित्तयाए ।

धण्णस्स ण अणगारस्स सीसस्स अयमेयारूवे तवरूव-लावण्णे होत्था, से जहाणामए तरुणग-लाउएइ वा, तरुणग-एलालुएइ वा, सिण्हा-लएइ वा, तरुणए छिण्णे आयवे दिण्णे सुक्के समाणे मिलायमाणे चिट्ठइ एवामेव धण्णस्स अणगारस्स सीस सुक्क-भुक्ख-लुक्ख णिम्मस अट्ठि-चम्म-छिरत्ताए पण्णायइ णो चेव ण मस-सोणियत्ताए । एव सव्वत्थ । णवरं उदर-भायण, कण्ण, जीहा, उट्टा, एएसि, अट्ठी न भण्णइ, चम्म-छिरत्ताए पण्णायइ इति भणइ ॥१५॥

धण्णे ण अणगारे सुक्केण भुक्खेण लुक्खेण पाय-जघोरुणा विगय-तडिकरालेण कडि-कडाहेण पिट्टमवरिस्सएण उदर-भायणेण जोइज्जमाणेहि पासुलिय-कडएहि अक्खसुत्त-मालाइव गणिज्जमाणेहि

पिड्ड-करण्डग-संधीहिं, गगा-तरंग-भूएण, उर-कडग-देसभाएणं,
सुक्कसप्प-समाणेहि बाहाहि, सिढिल-कडाली विव चलंतेहि य
अग्ग-हत्थेहि कम्पणवाइए विव वेवमाणीए सीस-घडीए पव्वाय-वयण-
कमले उब्भड-घड-मुहे उच्छुद्ध-नयण कोसे । जीव जीवेण गच्छइ,
जीवं जीवेणं चिद्धइ, भास भासित्ता गिलाइ, भास-भासमाणे गिलाइ,
भासं भासिस्सामित्ति गिलायइ । से जहाणामए इगाल-सगडियाइ
वा । जहा खंदओ तहा-हुयासणे इव भासरासि-पलिच्छण्णे, तवेणं
तेएणं अईव अईव तवतेय-सिरीए उवसोभेमाणे-उवसोभेमाणे
चिद्धइ ॥१६॥

तेणं कालेणं तेणं समएणं रायगिहे णयरे, गुणसिलए चेइए,
सेणिए राया । समणे भगव महावीरे समोसड्ढे । परिसा णिगया,
सेणिओ णिगओ, धम्मकहा, परिसा पडिगया ।

तए णं से सेणिए राया समणस्स भगवओ महावीरस्स अतिए
धम्मं सोच्चा निसम्म समणं भगवं महावीर वदइ णमंसइ एव वयासी-
इमेसि णं भंते ! इंदभूइ पामोक्खाण चउदसण्ह समण-साहस्सीण
कयरे अणगारे महादुक्कर-कारए चेव महाणिज्जर-यराए चेव ? ।

एवं खलु सेणिया ! इमेसिं इदभूइ पामोक्खाण चउदसण्ह
समण-साहस्सीण धण्णे अणगारे महादुक्कर-कारए चेव, महाणिज्जर-
यराए चेव ।

से केणहेण भंते ! एवं वुच्चइ, इमेसि इन्दभूइ पामोक्खाण
चउदसहिं समण-साहस्सीण धण्णे अणगारे महादुक्कर-कारए चेव,
महानिज्जर-यराए चेव ।

एवं खलु सेणिया ! तेणं कालेण तेण समएणं कायदी णाम
णयरी होत्था, जाव धण्णेदारए उप्पि-पासाय-वडिसए विहरइ । तएण
अहं अण्णया-कयाइं पुव्वाणु-पुव्वीए चरमाणे गामाणुगाम दुइज्जमाणे
जेणेव कायंदी णयरी जेणेव सहसंब-वणे उज्जाणे तेणेव उवागच्छइ,

उवागच्छइत्ता अहापडिरुव उग्गहं उगिण्हित्ता सजमेण तवसा अप्पाण भावेमाणे विहरामि । परिसा णिग्गया, त चेव जाव पव्वइए जाव बिलमिव जाव आहारेइ । धण्णस्स णं अणगारस्स पायाण सरीर-वण्णओ सव्वो जाव उवसोभेमाणे-उवसोभेमाणे चिट्ठइ ।

से तेणट्ठेण सेणिया ! एव वुच्चइ इमेसि चउदसण्हं समण-साहस्सीण धण्णे अणगारे महादुक्कर-कारए चेव महानिज्जर-यराए चेव ॥१७५॥

तए णं से सेणिय राया समणस्स भगवओ महावीरस्स अंतिए एयमट्ठं सोच्चा निसम्म-हट्ठ-तुट्ठे समणं भगव महावीर वदइ णमसइ जेणेव धण्णे अणगारे तेणेव उवागच्छइ उवागच्छित्ता, धण्णं अणगार तिक्खुत्तो आयाहिण, पयाहिण करेइ-करित्ता वदइ णमसइ वदित्ता णमसित्ता एव वयासी ।

“धण्णे सि ण तुमं देवाणुप्पिया ! सुपुण्णे, सुकयत्थे, सुकय-लक्खणे, सुलद्धे ण देवाणुप्पिया ! तव माणुस्सए जम्म-जीविय-फले” ति कट्टु, वदइ णमसइ । जेणेव समणे भगव महावीरे तेणेव उवागच्छइ २ ता समण भगव महावीर तिक्खुत्तो वदइ णमंसइ २ ता जामेव दिस पाउब्भूए तामेव दिसि पडिगए ॥१७६॥

तए ण तस्स धण्णस्स अणगारस्स अण्णया कयाइ पुव्वरत्ता वरत्तकाल समयसि धम्म जागरिय जागरमाणस्स इमेया-रूवे अज्झत्थिए चिन्तिए, मणोगए सकप्पे समुपज्जित्था—एव खलु अह इमेण उरालेण तवो कम्मेणं धमणि-संतए जाए जहा खदओ तहेव चित्ता । आपुच्छणं । थेरेहि सद्धि विउल दुरुहइ । मासियाए सलेहणाए । पाउणित्ता कालमासे कालं किच्चा उड्ढ चदिम जा विमाण-पत्थडे उड्ढ दूर-विईवइत्ता सव्वइ-उववण्णे ।

थेरा तहेव ओयरंति जाव इमे से

भंते त्ति, भगव गोयमे तहेव आपुच्छइ, जहा खदयस्स भगव वागरेइ जाव सवहु-सिद्धे विमाणे उववण्णे ।

धण्णस्स ण भंते ! देवस्स केवइयं काल ठिई पण्णत्ता ? गोयमा ! तेत्तीसं सागरोवमाइ द्विई पण्णत्ता ।

से ण भते । ताओ देवलोगाओ आउक्खएण भवक्खएण द्विइक्खएणं कहि गच्छिहिइ कहि उववज्जेहिइ ? गोयमा ! महाविदेह-वासे सिज्झिहिइ बुज्झिहिइ मुच्चिहिइ परिणिव्वाहिइ सव्वदुक्खाण मतं करेहिइ ।

त एव खलु जम्बू ! समणेण भगवया महावीरेण जाव सपत्तेण पढमस्स अज्झयण्णस्स अयमद्वे पण्णत्ते ॥१९॥

॥ पढम अज्झयणं सम्मतं ॥

जइ ण भते ! उक्खेवओ एव खलु जम्बू ! तेण कालेण तेण समएण कायदीए णयरीए, जियसतू राया । तत्थण काकदीए णयरीए भद्दा णाम सत्थवाही परिवसइ, अड्ढा ।

तीसे ण भद्दाए सत्थवाहीए पुत्ते सुणक्खत्ते णाम दारए होत्था, अहीण जाव सुरूवे । पच-धाइ-परिक्खत्ते जहा धण्णो तहेव बत्तीस्साओ दाओ जाव उप्पि पासाए वडिंसए विहरइ ॥२०॥

तेण कालेण तेणं समएण सामी समोसड्ढे, जहा धण्णो तहा सुणक्खत्ते वि णिग्गओ जहा थावच्चा-पुत्तस्स तहा णिक्खमण जाव अणगारे जाए इरिया-समिए जाव गुत्त बभयारी ।

तए णं से सुणक्खत्ते अणगारे जं चेव दिवस समणस्स भगवओ महावीरस्स अतिए मुण्डे जाव पव्वइए तं चेव दिवसं अभिग्गह, तहेव जाव बिलमिव पणग-भूएणं आहारं आहारेइ, सजमेण तवसा अप्पाण भावेमाणे विहरइ ॥२१॥

समण भगवया महावीरेण जाव बहिया जणवय-विहार विहरइ ।

॥ दशवैकालिक सूत्रम् ॥

दुमपुफिया पढमं अज्झयणं ॥१॥

धम्मो मंगल-मुक्किट्ठं, अहिसा संजमो तवो ।
देवा वि तं णमंसन्ति, जस्स धम्मे सया मणो ॥१॥
जहा दुमस्स पुप्फेसु, भमरो आवियई रस ।
ण य पुप्फ किलामेइ, सो य पीणेई अप्पयं ॥२॥
एमे ए समणा मुत्ता, जे लोए सन्ति साहुणो ।
विहगमा व पुप्फेसु, दाण भत्तेसणा रया ॥३॥
वय च वित्तिं लब्भामो, ण य कोइ उवहम्मइ ।
अहा-गडेसु रीयन्ते, पुप्फेसु भमरा जहा ॥४॥
महुगार समा बुद्धा, जे भवन्ति अणिसिया ।
णाणा-पिण्ड रया दन्ता, तेण वुच्चन्ति साहुणो ॥५॥

॥ इति दुमपुफियानामं पढममज्झयणं समत्तं ॥१॥

अह सामण्ण पुव्वयं दुइअं अज्झयणं २

कहं णु कुज्जा सामण्णं, जो कामे ण गिवारए ।
पए पए विसीयन्तो, संकप्पस्स वस गओ ॥१॥
वत्थ-गन्ध-मलंकारं, इत्थीओ सयणाणि य ।
अच्छन्दा जे ण भुञ्जन्ति, ण से चाइत्ति वुच्चई ॥२॥
जे य कन्ते पिए भोए, लद्धे वि पिट्ठि कुव्वई ।
साहीणे चयइ भोए, से हु चाइत्ति वुच्चई ॥३॥
समाइ पेहाइ परिव्वयन्तो, सिया मणो णिस्सरई बहिद्धा ।
'ण सा महं णोवि अहंपि तीसे' इच्चेव ताओ विणएज्ज राग ॥४॥

आयावयाही ! चय सोगमल्ल, कामे कमाही कमिय खु दुक्ख ।
 छिन्दाहि दोस विणएज्ज राग, एव सुही होहिसि सम्पराए ॥5॥
 पक्खन्दे जलिय जोइ, धूम-केउ दुरासय ।
 णेच्छन्ति वन्तय भोत्तु, कुले जाया अगन्धणे ॥6॥
 धिरत्थु तेऽज्जसो-कामी, जो त-जीविय कारणा ।
 वन्त इच्छसि आवेउ, सेय ते मरण भवे ॥7॥
 अह च भोग-रायस्स, त चऽसि अन्धग-वण्हिणो ।
 मा कुले गन्धणा होमो, सज्जम णिहुओ चर ॥8॥
 जइ तं काहिसि भाव, जा जा दिच्छसि नारिओ ।
 वाया विद्धोव्व-हडो, अट्ठि-अप्पा भविस्ससि ॥9॥
 तीसे सो वयण सोच्चा, सजयाइ सुभासिय ।
 अकुसेण जहा णागो, धम्मे सम्पडि-वाइओ ॥10॥
 एवं करेन्ति सम्बुद्धा, पण्डिया पवियक्खणा ।
 विणियइन्ति भोगेसु, जहा से पुरिसुत्तमो ॥त्ति बेमि ॥11॥
 ॥ इति सामण्णपुव्वय नाम अज्झयण समत्त ॥2॥

अह खुड्डियायारक्कहा तइयं अज्झयणं ३

सज्जमे सुट्ठि-अप्पाण, विप्पमुक्काण ताइण ।
 तेसि-मेय-मणाइण्ण, णिग्गन्थाण महेसिण ॥1॥
 उद्देसिय कीयगड णियाग-मभिहडाणि य ।
 राइ भत्ते सिणाणे य, गध मल्ले य वीयणे ॥2॥
 सण्णिही गिहीमत्ते य, रायपिण्डे किमिच्छए ।
 सम्वाहणा दन्त पयोयणाय, सम्पुच्छणा देह पलोयणा य ॥3॥
 अट्ठावए य णालीए, छत्तरस्स य धारण ट्ठाए ।
 तेगिच्छ पाहणा पाए, समारम्भ च जोइणो ॥4॥

सिज्जायर-पिण्ड च, आसन्दी पलियङ्कए ।
 गिहन्तर णिसिज्जा य, गाय-स्सुव्वट्ट-णाणि य ॥ 5 ॥
 गिहिणो वेयावडिय, जा य आजीव वत्तिया ।
 तत्ता-णिव्वुड भोइत्त, आउ रस्सरणाणि य ॥ 6 ॥
 मूलए सिङ्ग-बेरे य, उच्छु-खण्डे अणिव्वुडे ।
 कन्दे मूले य सच्चित्ते, फले बीए य आमए ॥ 7 ॥
 सोवच्चले सिन्धवे लोणे, रोमा-लोणे य आमए !
 सामुद्दे पन्सुखारे य, काला लोणे य आमए ॥ 8 ॥
 धूवणेत्ति वमणे य, वत्थी-कम्म विरेयणे ।
 अञ्जणे दन्तवणे य, गाय-ब्भङ्ग-विभूसणे ॥ 9 ॥
 सव्व-मेय-मणाइण्ण, णिग्गन्थाण महेसिण ।
 सञ्जमम्मि अ जुत्ताण, लहुभूय विहारिण ॥ 10 ॥
 पचासव परिण्णाया, तिगुत्ता छसु सञ्जया ।
 पच णिग्गहणा धीरा, णिग्गन्था उज्जु-दन्सिणो ॥ 11 ॥
 आया-वयन्ति गिम्हेसु, हेमन्तेसु अवाउडा ।
 वासासु पडिसलीणा, सजया सुसमाहिया ॥ 12 ॥
 परिस-हरिऊ-दन्ता, धूअमोहा जिइन्दिया ।
 सव्व दुक्ख-प्पहीणट्टा, पक्कमन्ति महेसिणो ॥ 13 ॥
 दुक्कराइ करित्ताण, दुस्सहाइ सहित्तु य ।
 केइत्थ देवलोएसु, केई सिज्जन्ति णीरया ॥ 14 ॥
 खवित्ता पुव्व-कम्माइ, सजमेण तवेण य ।
 सिद्धि मग्ग-मणुप्पत्ता, ताइणो परिणिव्वुडे ॥ 15 ॥

॥ खुड्डियायारकहा तइयमज्झयण समत्त ॥ 3 ॥

अह छज्जीवणियाणामं चउत्थ अज्झयणं ४

सुय मे आउस ! तेण भगवया एव-मक्खाय,
इह खलु छज्जीवणिया णामज्झयण समणेण भगवया
महावीरेण कासवेण पवेइया सुअक्खाया सुपण्णत्ता
सेय मे अहिज्झिउ अज्झयण धम्म-पण्णत्ती ।।

कयरा खलु सा छ-ज्जीवणिया णामज्झयण
समणेण भगवया महावीरेण कासवेण
पवेइया सुयक्खाया सुपण्णत्ता सेय मे
अहिज्झिउ अज्झयण धम्म-पण्णत्ती ।।

इमा खलु सा छज्जीवणिया णामज्झयण
समणेण भगवया महावीरेण कासवेण
पवेइया सुयक्खाया सुपण्णत्ता सेय मे
अहिज्झिउ अज्झयण धम्म पण्णत्ती ।।

तजहा-पुढवी-काइया आउ-काइया तेउ-काइया
वाउ-काइया वणस्सइ-काइया तस-काइया

पुढवी चित्तमन्त-मक्खाया अणेग-जीवा पुढो-सत्ता अण्णत्थ
सत्थ-परिणएण । आऊ चित्तमन्त-मक्खाया अणेग-जीवा पुढो-सत्ता
अण्णत्थ सत्थ-परिणएण । तेऊ चित्तमन्त-मक्खाया अणेग-जीवा
पुढो-सत्ता अण्णत्थ सत्थ-परिणएण । वाऊ चित्तमन्त-मक्खाया अणेग-
जीवा पुढो-सत्ता अण्णत्थ सत्थ-परिणएण । वणस्सइ चित्तमन्त-
मक्खाया अणेग-जीवा पुढो-सत्ता अण्णत्थ सत्थ-परिणएण ।

तजहा अग्गबीया, मूलबीया, पोरबीया, खन्धबीया,
बीयरुहा, सम्मुच्छिमा, तणलया वणस्सइ-
काइया, सबीया, चित्तमन्त-मक्खाया अणेग-
जीवा पुढोसत्ता अण्णत्थ सत्थ परिणएण ।

से जे पुण इमे अणेगे बहवे तसा पाणा, तंजहा अण्डया, पोयया, जराउया, रसया सन्सेइमा, सम्मुच्छिमा, उभिया, उववाइया, जेसि केसिं च पाणाणं, अभिकन्त, पडिक्कन्तं, सकुचिय, पसारिय रुय भन्त, तसियं, पलाइय आगइ-गइ-विण्णाया, जे य कीड-पयङ्गा, जा य कुन्थु-पिवीलिया, सव्वे बेइन्दिया, सव्वे तेइन्दिया, सव्वे चउरिन्दिया, सव्वे पचिन्दिया, सव्वे तिरिक्ख जोणिया, सव्वे णेरइया, सव्वे मणुआ, सव्वे देवा, सव्वे पाणा, पर-माहम्मिआ, एसो खलु छट्ठो जीव-णिकाओ तसकाओ त्ति पवुच्चइ ।

इच्च्वेसि छण्ह जीव णिकाएणं णेव सय दण्ड समा-रम्भिज्जा, णेवन्नेहि दण्ड समारम्भिज्जा, दण्ड समा-रम्भते वि अण्णे ण समणु-जाणेज्जा, जावज्जीवाए तिविह तिविहेण मणेण वायाए काएण ण करेमि, ण कारवेमि, करन्तम्पि अन्न न समणु-जाणामि । तस्स भते ! पडिक्कमामि णिन्दामि गरिहामि अप्पाण वोसिरामि ।

पढमे भते ! महव्वए पाणाइ-वायाओ वेरमण । सव्व भते ! पाणाइवाय पच्चक्खामि । से सुहुम वा, बायर वा, तस वा, थावरं वा, णेव सय पाणे अइवाएज्जा, णेवअण्णेहि पाणे अइवाया-विज्जा, पाणे अइवायन्ते-वि अण्णे ण समणु-जाणेज्जा, जावज्जीवाए तिविह तिविहेण मणेण वायाए काएण ण करेमि, ण कारवेमि, करन्तपि अन्न ण समणु-जाणामि, तस्स भते ! पडिक्कमामि णिन्दामि गरिहामि अप्पाण वोसिरामि । पढमे भते ! महव्वए उवट्ठिओमि सव्वाओ पाणाइ-वायाओ वेरमण ।

अहावरे दुच्च्वे भते ! महव्वए मुसा-वायाओ वेरमण । सव्वं भते ! मुसावाय पच्चक्खामि । से कोहा वा, लोहा वा, भया वा, हासा वा, णेव सय मुस वएज्जा, णेवण्णेहि मुस वायाविज्जा, मुस वयन्ते वि अण्णे ण समणुजाणेज्जा जावज्जीवाए, तिविह तिविहेण मणेण वायाए काएणं ण करेमि, ण कारवेमि, करन्तपि अन्न ण समणुजाणामि ।

तस्स भते ! पडिक्कमामि णिन्दामि गरिहामि अप्पाण वोसिरामि ।
दुच्चे भते ! महव्वए उवट्ठिओमि सव्वाओ मुसावायाओ वेरमण ।

अहावरे तच्चे भते ! महव्वए अदिण्णा-दाणाओ वेरमण । सव्व
भते ! अदिण्णा-दाण पच्चक्खामि । से गामे वा, नगरे वा, रण्णे वा,
अप्प वा, बहुं वा, अणुं वा, थूल वा, चित्तमन्त वा, अचित्तमन्त वा, णेव
सय अदिण्ण गिण्हिज्जा, णेव अण्णेहि अदिण्ण गिण्हाविज्जा, अदिण्ण
गिण्हन्ते वि अण्णे ण समणु-जाणेज्जा, जावज्जीवाए तिविह तिविहेण
मणेण वायाए, काएणं, ण करेमि, ण कारवेमि, करन्तम्पि अण्ण ण
समणुजाणामि । तस्स भंते ! पडिक्कमामि णिन्दामि गरिहामि अप्पाण
वोसिरामि । तच्चे भते ! महव्वए उवट्ठिओमि सव्वाओ अदिण्णा-दाणाओ
वेरमण ।

अहावरे चउत्थे भते ! महव्वए मेहुणाओ वेरमण । सव्व भते !
मेहुण पच्चक्खामि । से दिव्व वा, माणुस वा, तिरिक्ख-जोणिय वा,
णेव सय मेहुणं सेविज्जा, णेव अण्णेहि मेहुण सेवाविज्जा, मेहुण
सेवन्ते वि अण्णे ण समणु-जाणेज्जा ! जावज्जीवाए तिविह तिविहेण
मणेण वायाए काएणं ण करेमि, ण कारवेमि, करन्तपि अण्ण ण
समणुजाणामि । तस्स भंते ! पडिक्कमामि णिन्दामि गरिहामि अप्पाण
वोसिरामि । चउत्थे भते ! महव्वए उवट्ठिओमि सव्वाओ मेहुणाओ
वेरमण ।

अहावरे पञ्चमे भते ! महव्वए परिग्गहाओ वेरमण । सव्व भते !
परिग्गह पच्चक्खामि । से गामे वा, नगरे वा, रण्णे वा, अप्प वा, बहु
वा, अणु वा, थूल वा, चित्तमन्त वा अचित्तमन्त वा । णेव सय
परिग्गह परिगिण्हेज्जा, णेव अण्णेहि परिग्गह परिगिण्हा-वेज्जा,
परिग्गह परिगिण्हन्ते वि अण्णे ण समणुजाणिज्जा जावज्जीवाए
तिविह तिविहेणं मणेण वायाए काएण ण करेमि, ण कारवेमि,
करन्तपि अण्ण ण समणुजाणामि । तस्स भते । पडिक्कमामि णिन्दामि

गरिहामि अप्पाण वोसिरामि । पञ्चमे भंते ! महव्वए उवड्ढिओमि सव्वाओ परिग्गहाओ वेरमण ।

अहावरे छट्ठे भते ! वए राइ-भोयणाओ वेरमण । सव्व भते ! राइ-भोयण पच्चक्खामि । से असण वा, पाण वा, खाइम वा, साइम वा । णेव सय राइं भुञ्जिज्जा, णेव अण्णेहि राइ भुञ्जाविज्जा, राइ भुञ्जते वि अण्णे ण समणुजाणेज्जा । जावज्जीवाए तिविह तिविहेण मणेण वायाए काएणं ण करेमि, ण कारवेमि, करन्तपि अण्ण ण समणुजाणामि । तस्स भंते । पडिक्कमामि णिन्दामि गरिहामि अप्पाण वोसिरामि । छट्ठे भते ! वए उवड्ढिओमि सव्वओ राइ-भोयणाओ वेरमण ।

इच्चेयाइ पच्च महव्वयाइ राइ भोयण-वेरमण-छट्ठाइ अत्त-हियट्ठियाए उवसम्पज्जित्ताणं विहरामि ।

से भिक्खू वा, भिक्खुणी वा, सजय-विरय-पडिहय पच्चक्खाय पावकम्मे, दिआ वा, राओ वा, एगओ वा, परिसागओ वा, सुत्ते वा, जागरमाणे वा, से पुढवि वा, भित्तिं वा, सिल वा, लेलु वा, ससरक्ख वा काय, ससरक्ख वा वत्थ, हत्थेण वा, पाएण वा, कट्ठेण वा, किलिचेण वा, अगुलियाए वा, सिलागए वा, सिलाग-हत्थेण वा, ण आलिहिज्जा, ण विलिहिज्जा, ण घट्टिज्जा, ण भिन्दिज्जा, अण्ण ण आलिहा-विज्जा, ण विलिहा-विज्जा, ण घट्टा-विज्जा, ण भिन्दा-विज्जा । अण्ण आलिहन्त वा, विलिहन्तं वा, घट्टन्त वा, भिन्दन्तं वा ण समणु-जाणिज्जा । जावज्जीवाए तिविह तिविहेण मणेण वायाए काएण ण करेमि, ण कारवेमि, करन्तपि अण्ण ण समणुजाणामि । तस्स भते ! पडिक्कमामि णिन्दामि गरिहामि अप्पाण वोसिरामि ।

से भिक्खू वा, भिक्खुणी वा, सजय-विरय-पडिहय-पच्चक्खाय-पाव-कम्मे, दिआ वा, राओ वा, एगओ वा, परिसागओ वा, सुत्ते वा, जागरमाणे वा, से उदग वा, ओस वा, हिम वा, महिय वा, करग्ग वा,

हरि-तणुग वा, सुद्धोदग वा, उदउल्ल वा काय, उदउल्ल वा वत्थ, ससिणिद्ध वा काय, ससिणिद्ध वा वत्थ, ण आमुसिज्जा, ण सम्फुसिज्जा, ण आवीलिज्जा, ण पवीलिज्जा, ण अक्खोडिज्जा, ण पक्खोडिज्जा, ण आयाविज्जा, ण पयाविज्जा, अण्ण ण आमुसाविज्जा, ण सम्फुसा-विज्जा, ण आवीला-विज्जा, ण पवीला-विज्जा, ण अक्खोडा-विज्जा, ण पक्खोडा-विज्जा, ण आया-विज्जा, ण पया-विज्जा अण्ण आमुसन्त वा, सम्फुसन्तं वा, आवीलन्त वा, पवीलन्त वा, अक्खोडन्त वा, पक्खोडन्त वा, आयावन्त वा, पयावन्त वा न समणुजाणिज्जा, जावज्जीवाए, तिविह तिविहेण मणेण वायाए काएण ण करेमि, ण कारवेमि, करन्तपि अण्ण ण समणुजाणामि । तस्स भंते ! पडिक्कमामि णिन्दामि गरिहामि अप्पाण वोसिरामि ।

से भिक्खू वा, भिक्खुणी वा, सजय-विरय-पडिहय-पच्चक्खाय-पावकम्मे, दिआ वा, राओ वा, एगओ वा, परिसागओ वा, सुत्ते वा, जागरमाणे वा, से अगणि वा, इङ्गालं वा, मुम्मुर वा, अच्चि वा, जाल वा, अलायं वा, सुद्धागणि वा, उक्कं वा, ण उज्जिज्जा, ण घटिज्जा, ण भिन्दिज्जा, ण उज्जालेज्जा, ण पज्जालेज्जा, ण णिव्वावेज्जा, अण्ण ण उज्जाविज्जा, ण घट्टाविज्जा, ण भिन्दाविज्जा, ण उज्जालाविज्जा, ण पज्जाला-विज्जा, ण णिव्वाविज्जा, अण्ण उज्जन्तं वा, घट्टन्त वा, भिन्दन्तं वा, उज्जालन्त वा, पज्जालन्त वा, णिव्वावन्त वा, ण समणु-जाणेज्जा जावज्जीवाए, तिविह तिविहेण मणेण वायाए काएण ण करेमि, ण कारवेमि, करन्तपि अण्ण ण समणुजाणामि । तस्स भते ! पडिक्कमामि णिन्दामि गरिहामि अप्पाण वोसिरामि ।

से भिक्खू वा, भिक्खुणी वा, सजय-विरय-पडिहय-पच्चक्खाय-पावकम्मे, दिआ वा, राओ वा, एगओ वा, परिसागओ वा, सुत्ते वा, जागरमाणे वा, से सिएण वा, विहुयणेण वा, तालि-अण्टेण वा, पत्तेण वा, पत्त-भङ्गेण वा, साहाए वा, साहाभगेण वा, पिहुणेण वा,

पिहुण-हत्थेण वा, चलेण वा, चेल-कण्णेण वा, हत्थेण वा, मुहेण वा, अप्पणो वा काय, बाहिरं वावि पुग्गल ण फुमिज्जा, ण वीएज्जा, अण्ण ण फुमाविज्जा, ण विआविज्जा, अण्ण फुमन्त वा, वीयन्त वा, ण समणुजाणेज्जा जावज्जीवाए, तिविह तिविहेण मणेण वायाए काएण ण करेमि, ण कारवेमि, करन्तपि अण्ण ण समणु-जाणामि । तस्स भते ! पडिक्कमामि णिन्दामि गरिहामि अप्पाण वोसिरामि ।

से भिक्खू वा, भिक्खुणी वा, सजय-विरय-पडिहय-पच्चक्खाय-पावकम्मे, दिआ वा, राओ वा, एगओ वा, परिसागओ वा, सुत्ते वा, जागरमाणे वा, से बीएसु वा, बीय-पइट्टेसु वा, रूढेसु वा, रूढ-पइट्टेसु वा, जाएसु वा, जाय-पइट्टेसु वा, हरिएसु वा, हरिय-पइट्टेसु वा, छिण्णेषु वा, छिण्ण-पइट्टेसु वा, सचित्तेषु वा, सचित्त-कोलपडि णिस्सिएसु वा, ण गच्छेज्जा, ण चिट्ठेज्जा, ण णिसीएज्जा, ण तुयट्टेज्जा, अण्ण ण गच्छाविज्जा, ष चिट्ठाविज्जा, ण णिसीयाविज्जा, ण तुयट्ठाविज्जा, अण्ण गच्छन्त वा, चिट्ठन्त वा, णिसीयन्त वा तयुट्ठन्त वा ण समणु जाणिज्जा जावज्जीवाए, तिविह तिविहेण मणेण वायाए काएण ण करेमि, ण कारवेमि, करन्तपि अण्ण ण समणुजाणामि । तस्स भते ! पडिक्कमामि णिन्दामि गरिहामि अप्पाण वोसिरामि ।

से भिक्खू वा, भिक्खुणी वा, सजय-विरय-पडिहय-पच्चक्खाय-पावकम्मे, दिआ वा, राओ वा, एगओ वा, परिसागओ वा, सुत्ते वा, जागरमाणे वा, से कीड वा, पयग वा, कुन्थु वा, पिवीलिय वा, हत्थंसि वा, पायंसि वा, बाहुसि वा, उरुसि वा, उदरसि वा, सीससि वा, वत्थसि वा, पडिग्गहसि वा, कम्बलसि वा, पाय पुच्छणसि वा रय हरणसि वा, गुच्छगंसि वा, उड्डुगसि वा, दण्डगसि वा, पीढगसि वा, फलगसि वा, सेज्जसि वा, संथारगसि वा, अण्णयरसि वा, तहप्पगारे उवगरण-जाए तओ सञ्जयामेव पडिलेहिय पडिलेहिय पमज्जिअ पमज्जिअ एगन्त-मवणिज्जा, णो ण सद्दाय-मावज्जिज्जा ।

अजय चरमाणो अ, पाण भूयाइ हिसइ ।
 बन्धइ पावय कम्म, त से होई कडुअ फल ॥1॥
 अजय चिट्ठमाणो अ, पाण भूयाइ हिसइ ।
 बन्धइ पावय कम्म, त से होई कडुअ फल ॥2॥
 अजय आसमाणो अ, पाण भूयाइ हिसइ ।
 बन्धइ पावय कम्म, त से होई कडुअ फल ॥3॥
 अजय सयमाणो, अ, पाण भूयाइ हिसइ ।
 बन्धइ पावय कम्म, त से होई कडुअ फल ॥4॥
 अजय भुञ्ज-माणो अ, पाण भूयाइ हिसइ ।
 बन्धइ पावय कम्म, त से होई कडुअ फल ॥5॥
 अजय भासमाणो, अ, पाण भूयाइ हिसइ ।
 बन्धइ पावय कम्म, त से होई कडुअ फल ॥6॥
 कह चरे कहं चिट्ठे, कहमासे कह सए ?
 कह भुञ्जन्तो भासन्तो, पाव कम्म ण बन्धइ ॥7॥
 जयं चरे जय चिट्ठे, जयमासे जय सए ।
 जय भुञ्जन्तो भासन्तो, पाव कम्म ण बन्धइ ॥8॥
 सव्व-भूयप्प-भूयस्स, सम्म भूयाइ पासओ ।
 पिहिआ सव्वस्स दन्तस्स, पाव कम्म ण बन्धइ ॥9॥
 पढम नाण तओ दया, एव चिट्ठइ सव्व सजए ।
 अण्णाणी कि काही, कि वा नाहीइ सेय पावग ॥10॥
 सोच्चा जाणइ कल्लाण, सोच्चा जाणइ पावग ।
 उभयम्पि जाणेई सोच्चा, ज सेय त समायरे ॥11॥
 जो जीवे वि याणइ, अजीवे वि ण याणइ ।
 जीवाजीवे अयाणन्तो, कह सो नाहीइ सजम ? ॥12॥
 जो जीवे वि वियाणइ, अजीवे वि वियाणइ ।
 जीवाजीवे वियाणन्तो, सो हु नाहीइ सजम ? ॥13॥

जया जीव-मजीवे य, दो वि एए वियाणइ ।
तया गइ बहु-विह, सव्व जीवाण जाणइ ॥14॥
जया गइ बहु-विह, सव्व जीवाण जाणइ ।
तया पुण्ण च पाव च, बन्ध मोक्ख च जाणइ ॥15॥
जया पुण्ण च पाव च, बन्ध मोक्ख च जाणइ ।
तया णिव्विन्दए भोए, जे दिव्वे जे य माणुसे ॥16॥
जया णिव्विन्दए भोए, जे दिव्वे जे य माणुसे ।
तया चयइ संजोग, सब्बिन्तर बाहिर ॥17॥
तया चयइ संजोग, सब्बिन्तर बाहिरं ।
तया मुण्डे भवित्ताण, पव्वइए अणगारिय ॥18॥
जया मुण्डे भवित्ताणं, पव्वइए अणगारिय ।
तया सवर-मुक्किट्टं, धम्म फासे अणुत्तर ॥19॥
जया सवर-मुक्किट्ट, धम्मं फासे अणुत्तर ।
तया धुणेइ कम्म-रय, अबोहि-कलुस कड ॥20॥
जया धुणेइ कम्म-रयं, अबोहि-कलुस कड ।
तया सव्वत्तग णाण, दसण चाभि-गच्छइ ॥21॥
जया सव्वत्तग णाण, दसण चाभि-गच्छइ ।
तया लोग-मलोग च, जिणो जाणइ केवली ॥22॥
जया लोग-मलोग च, जिणो जाणइ केवली ।
तया जोगे निरुम्मिन्ता, सेलेसि पडिवज्जइ ॥23॥
जया जोगे निरुम्मिन्ता, सेलेसि पडिवज्जइ ।
तया कम्म खवित्ताण, सिद्धिं गच्छइ णीरओ ॥24॥
जया कम्म खवित्ताण, सिद्धिं गच्छइ णीरओ ।
तया लोग-मत्थ यत्थो, सिद्धो हवइ सासओ ॥25॥
सुह-सायगरस्स समणस्स, साया-उलगस्स णिगाम-साइस्स ।
उच्छोल्लणा-पहोअस्स, दुल्लहा सुगइ तारिस-गस्स ॥26॥

तवो गुण-पहाणस्स, उज्जुमइ खन्ति-सजम-रयस्स ।
 परीसह जिण-तस्स, सुल्लहा सुगई तारिस गरस्स ॥27॥
 पच्छा वि ते पयाया, खिप्प गच्छन्ति अमर-भवणाइ ।
 जेसि पिओ तवो सजमो अ, खति अ बम्मचेर च ॥28॥
 इच्चेयं छज्जीवणिअ, सम्म-द्विट्ठि सया जए ।
 दुल्लह लहित्तु सामण्ण, कम्मुणा ण विराहिज्जासि ॥29॥
 ॥ छज्जीवणिआ नाम चउत्थ अज्झयण समत्त ॥

पिंडेसणा णामं पंचमज्झयणं

प्रथम उद्देशक

सपत्ते भिक्ख-कालम्मि, असभन्तो अमुच्छिओ ।
 इमेण कम्म-जोगेण, भत्त-पाण गवेसए ॥1॥
 से गामे वा णयरे वा, गोयरग्ग-गओ मुणी ।
 चरे मद-मणुव्विग्गो, अव्वक्खित्तेण चेयसा ॥2॥
 पुरओ जुग-मायाए, पेहमाणो महि चरे ।
 वज्जतो बीय-हरियाइ, पाणे य दग-मट्टिय ॥3॥
 ओवाय विसम खाणु, विज्जल परिवज्जए ।
 सकमेण ण गच्छेज्जा, विज्जमाणे परक्कमे ॥4॥
 पवडते व से तत्थ, पक्खलन्ते व सजए ।
 हिसेज्ज पाण-भूयाइ, तसे अदुव थावरे ॥5॥
 तम्हा तेण ण गच्छिज्जा, सजए सुसमाहिए ।
 सइ अण्णेण मग्गेण, जयमेव परक्कमे ॥6॥
 इगाल छारिय रासि, तुस-रासि च गोमय ।
 ससरक्खेहि पाएहि, सजओ त णाइक्कमे ॥7॥

ण चरेज्ज वासे-वासते, महियाए व पडन्तिए ।
 महावाए व वायन्ते, तिरिच्छ-सम्पाइमेसु वा ॥८॥
 ण चरेज्ज वेस-सामन्ते, बम्भचेर-वसाणुए ।
 बभयारिस्स दंतस्स, होज्जा तत्थ विसुत्तिया ॥९॥
 अणाययणे चरन्तस्स, ससग्गीए अभिक्खण ।
 होज्जा वयाण पीला, सामण्णम्मि य संसओ ॥१०॥
 तम्हा एय वियाणित्ता, दोसं दुग्गइ-वड्डण ।
 वज्जए वेस-सामन्तं, मुणी एगत-मस्सिए ॥११॥
 साण सूइय गावि, दित्त गोण हयं गय ।
 सुण्डिब्भ कलह जुद्ध, दूरओ परिवज्जए ॥१२॥
 अणुण्णए णावणए, अप्पहिट्ठे अणाउले ।
 इदियाइ जहाभाग, दमइत्ता मुणी चरे ॥१३॥
 दव-दवस्स ण गच्छेज्जा, भासमाणो य गोयरे ।
 हसन्तो णाभिगच्छेज्जा, कुल उच्चावय सया ॥१४॥
 आलोय थिग्गल दार, सन्धि दग-भवणाणि य ।
 चरतो ण विणिज्झाए, सकट्टाण विवज्जए ॥१५॥
 रण्णो गिह-वईण च, रहस्सा रक्खियाणि य ।
 सकिलेस-करं ठाण, दूरओ परिवज्जए ॥१६॥
 पडिकुट्ट कुल ण पविसे, मामग परिवज्जए ।
 अचियत्त कुलं ण पविसे, चियत्तं पविसे कुल ॥१७॥
 साणी-पावार-पिहिय, अप्पणा णाव-पगुरे ।
 कवाडं णो पणुल्लिज्जा, उग्गहन्सि अजाइया ॥१८॥
 गोयरग्ग-पविट्ठो य, वच्चमुत्त ण धारए ।
 ओगासं फासुय णच्चा, अणुण्ण वि य वोसिरे ॥१९॥
 णीयं दुवार तमस, कुट्टग परिवज्जए ।
 अचक्खु-विसओ जत्थ, पाणा दुप्पडिलेहगा ॥२०॥

जत्थ पुप्फाइ बीयाइ, विप्पइण्णाइ कोट्टए ।
अहुणोव-लित्त उल्ल, दट्ठूण परिवज्जए ॥21॥
एलग दारगं साण, वच्छग वावि कोट्टए ।
उल्लघिया ण पविसे, विउहित्ताण व सजए ॥22॥
अससत्त पलोइज्जा, णाइ दूराव-लोयए ।
उप्फुल्ल ण विणिज्झाए, णियट्ठिज्ज अयम्पिरो ॥23॥
अइभूमि ण गच्छेज्जा, गोयरग्ग-गओ मुणी ।
कुलस्स भूमि जाणित्ता, मिय भूमि परक्कमे ॥24॥
तत्थेव पडिलेहिज्जा, भूमिभाग वियक्खणो ।
सिणाणस्स य वच्चस्स, सलोग परिवज्जए ॥25॥
दग-मट्ठिय आयाणे, बीयाणि हरियाणि य ।
परिवज्जतो चिट्ठिज्जा, सत्विन्दिय समाहिए ॥26॥
तत्थ से-चिट्ठमाणस्स, आहारे पाण-भोयण ।
अकप्पिय ण गिण्हिज्जा, पडिगाहिज्ज कप्पिय ॥27॥
आहारती सिया तत्थ, परिसाडिज्ज भोयण ।
दिन्तिय पडियाइक्खे, ण मे कप्पइ तारिस ॥28॥
सम्मद्दमाणी पाणाणि, बीयाणि हरियाणि य ।
असजम-करि णच्चा, तारिस परिवज्जए ॥29॥
साहट्टु णिक्खित्ता ण, सचित्त घट्टियाणि य ।
तहेव समणट्टाए, उदग सम्पणुल्लिया ॥30॥
ओगाहइत्ता चलइत्ता, आहारे पाण-भोयण ।
दिन्तिय पडियाइक्खे, ण मे कप्पइ तारिस ॥31॥
पुरेकम्मेण हत्थेण, दक्वीए भायणेण वा ।
दिन्तिय पडियाइक्खे, ण मे कप्पइ तारिस ॥32॥
एव उदउल्ले ससिणिद्धे, ससरक्खे मट्टिया-ऊसे ।
हरियाले हिगुलए, मणोसिला अजणे लोणे ॥33॥

गेरुय वण्णिय सेडिय, सोरडिय पिट्ट कुक्कुस कए य ।
 उक्किट्ट-मसंसट्टे, ससट्टे चेव बोद्धव्वे ॥34॥
 अससट्टेण हत्थेण, दव्वीए भायणेण वा ।
 दिज्जमाणं ण इच्छिज्जा, पच्छा-कम्म जहि भवे ॥35॥
 संसट्टेण य हत्थेण, दव्वीए भायणेण वा ।
 दिज्जमाण पडिच्छिज्जा, ज तत्थेसणियं भवे ॥36॥
 दुण्ह तु भुंजमाणाण, एगो तत्थ णिमन्तए ।
 दिज्जमाण ण इच्छिज्जा, छन्द से पडिलेहए ॥37॥
 दुण्ह तु भुंजमाणाण, दोवि तत्थ णिमन्तए ।
 दिज्जमाणं पडिच्छिज्जा, ज तत्थेसणिय भवे ॥38॥
 गुव्विणीए उवण्णत्थ, विविहं पाण-भोयण ।
 भुञ्जमाण विवज्जिज्जा, भुत्त-सेस पडिच्छए ॥39॥
 सिया य समणट्टाए, गुव्विणी काल-मासिणी ।
 उट्ठिआ वा णिसीइज्जा, णिसण्णा वा पुणुट्टए ॥40॥
 त भवे भत्तपाण तु, सजयाण अकप्पिय ।
 दिन्तिय पडियाइक्खे, ण मे कप्पइ तारिस ॥41॥
 थणग पिज्जमाणी, दारग वा कुमारियं ।
 त णिक्खिवित्तु रोयन्त, आहरे पाण भोयण ॥42॥
 त भवे भत्तपाणं तु, सजयाणं अकप्पिय ।
 दितिय पडियाइक्खे, "ण मे कप्पइ तारिस" ॥43॥
 ज भवे भत्तपाण तु कप्पा-कप्पम्मि सकिय ।
 दिन्तिय पडियाइक्खे, ण मे कप्पइ तारिसं ॥44॥
 दग-वारेण पिहिय, णीसाए पीढएण वा ।
 लोढेण वावि लेवेण, सिलेसेण व केणइ ॥45॥
 त च उब्भिन्दिया दिज्जा, समणट्टाए व दावए ।
 दितिय पडियाइक्खे, ण मे कप्पइ तारिस ॥46॥

असण पाणगं वावि, खाइम साइम तहा ।
 जं जाणिज्ज सुणिज्जा वा, दाणट्टा पगड इम ॥47॥
 त भवे भत्तपाण तु, सजयाण अकप्पिय ।
 दितिय पडियाइक्खे, ण मे कप्पइ तारिस ॥48॥
 असण पाणग वावि, खाइम साइम तहा ।
 ज जाणिज्ज सुणिज्जा वा, पुण्णट्टा पगड इम ॥49॥
 त भवे भत्तपाण तु, सजयाण अकप्पिय ।
 दितिय पडियाइक्खे, ण मे कप्पइ तारिस ॥50॥
 असण पाणग वावि, खाइम साइम तहा ।
 ज जाणिज्ज सुणिज्जा वा, वणीमट्टा पगड इम ॥51॥
 त भवे भत्तपाण तु, सजयाणं अकप्पिय ।
 दितिय पडियाइक्खे, ण मे कप्पइ तारिस ॥52॥
 असण पाणग वावि, खाइम साइम तहा ।
 जं जाणिज्ज सुणिज्जा वा, समणट्टा पगड इम ॥53॥
 त भवे भत्तपाण तु, सजयाण अकप्पिय ।
 दितिय पडियाइक्खे, ण मे कप्पइ तारिस ॥54॥
 उद्देसिय कीयगड, पूइकम्म च आहड ।
 अज्झोयर पामिच्च, मीस-जाय विवज्जए ॥55॥
 उग्गम से य पुच्छेज्जा, कस्सट्टा केण वा कड ।
 सुच्चा णिस्सकिय सुद्ध, पडिगाहिज्ज सजए ॥56॥
 असण पाणग वावि, खाइम साइम तहा ।
 पुप्फेसु हुज्ज उम्मीस, बीएसु हरिएसु वा ॥57॥
 त भवे भत्तपाण तु, सजयाण अकप्पिय ।
 दितिय पडियाइक्खे, ण मे कप्पइ तारिस ॥58॥
 असण पाणग वावि, खाइम साइम तहा ।
 उदगम्मि हुज्ज णिक्खित्त, उत्तिग-पणगेसु वा ॥59॥

तं भवे भक्तपाण तु, संजयाणं अकप्पियं ।
दिंतिय पडियाइक्खे, ण मे कप्पइ तारिस ॥60॥
असण पाणगं वावि, खाइम साइम तहा ।

अगणिम्मि होज्ज णिक्खित्त, त च संघट्टिया दए ॥61॥

तं भवे भक्तपाणं तु, संजयाण अकप्पिय ।

दिंतियं पडियाइक्खे, ण मे कप्पइ तारिस ॥62॥

एव उस्सक्किया ओसक्किया, उज्ज-लिया पज्जालिया णिव्वाविया ।

उरिसंचिया णिरिसचिया, उववत्तिया ओयारिया दए ॥63॥

तं भवे भक्तपाणं तु, सजयाणं अकप्पिय ।

दिन्तियं पडियाइक्खे, ण मे कप्पइ तारिस ॥64॥

हुज्ज कट्ट सिल वावि, इट्टाल वावि एगया ।

ठवियं संकमट्टाए, त च हुज्ज चलाचल ॥65॥

ण तेण भिक्खू गच्छिज्जा, दिट्ठो तत्थ असंजमो ।

गम्भीर झुसिरं चेव, सव्विन्दिय-समाहिए ॥66॥

णिस्सेणि फलगं पीढ, उरसवित्ताण-मारुहे ।

मंचं कील य पासाय समणट्टाए व दावए ॥67॥

दुरुहमाणी पवडिज्जा, हत्थ पाय व लूसए ।

पुढवी जीवे वि हिन्सेज्जा, जे य तण्णिरिसया जगे ॥68॥

एयारिसे महादोसे, जाणिरुण महेसिणो ।

तम्हा मालोहडं भिक्खं, ण पडिगिण्हति संजया ॥69॥

कन्द मूलं पलम्बं वा, आम छिण्णं य सण्णिर ।

तुम्बागं सिंगबेरं य, आमग परिवज्जए ॥70॥

तहेव सत्तु-चुण्णाइं, कोल-चुण्णाइ आवणे ।

सक्कुलिं फाणियं पूय, अण्ण वावि तहाविह ॥71॥

विक्कायमाण पसढ, रएण परिफासिय ।

दिन्तिय पडियाइक्खे, ण मे कप्पइ तारिस ॥72॥

बहु-अट्टिय पुग्गल, अणिमिस वा बहु-कण्टय ।
 अत्थिय तिन्दुय बिल्ल, उच्छु-खण्ड व सिम्बलि ॥73॥
 अप्पे सिया भोयण जाए, बहु-उज्झिय-धम्मिय ।
 दिन्तिय पडियाइक्खे, ण मे कप्पइ तारिस ॥74॥
 तहे-वुच्चावय पाणं, अदुवा वार-धोयण ।
 ससेइम चाउलोदग, अहुणा-धोय विवज्जए ॥75॥
 ज जाणेज्ज चिराधोय, मईए दसणेण वा ।
 पडिपुच्छिऊण सुच्चा वा, ज च णिस्सकिय भवे ॥76॥
 अजीव परिणयं णच्चा, पडिगाहिज्ज सजए ।
 अह सकियं भविज्जा, आसाइत्ताण रोयए ॥77॥
 थोव-मासायण-ट्टाए, हत्थगम्मि दलाहि मे ।
 मा मे अच्छम्बिल पूय, णाल तिण्ह विणित्तए ॥78॥
 त च अच्छम्बिलं पूय, णाल तिण्ह विणित्तए ।
 दिन्तिय पडियाइक्खे, ण मे कप्पइ तारिस ॥79॥
 त च हुज्ज अकामेण, विमणेण पडिच्छिय ।
 त अप्पणा ण पिबे, णोवि अण्णस्स दावए ॥80॥
 एगन्त-मवक्कमित्ता, अचित्त पडिलेहिया ।
 जय परिट्टविज्जा, परिट्टप्प पडिक्कमे ॥81॥
 सिया य गोयरग्ग-गओ, इच्छिज्जा परिभुत्तुय ।
 कुट्टग भित्ति-मूल वा, पडिलेहित्ताण फासुय ॥82॥
 अणुण्ण-वित्तु मेहावी, पडिच्छिण्णम्मि सम्बुडे ।
 हत्थग सपमज्जित्ता, तत्थ भुजिज्ज सजए ॥83॥
 तत्थ से भुजमाणस्स, अट्टिय कण्टओ सिया ।
 तण-कट्ट-सक्कर वावि, अण्ण वावि तहाविह ॥84॥
 त उक्खिवित्तु ण णिक्खिवे, आसएण ण छड्डए ।
 हत्थेण त गहेऊण, एगन्त-मवक्कमे ॥85॥

एंगत-मवक्कमित्ता, अचित्त पडिलेहिया ।
 जय परिट्टवेज्जा, परिट्टप्प पडिक्कमे ॥86॥
 सिया य भिक्खु इच्छिज्जा, सिज्ज-मागम्म भुत्तुयं ।
 स-पिण्ड-पायमागम्म, उडुय पडिलेहिया ॥87॥
 विणएण पविसित्ता, सगासे गुरुणो मुणी ।
 इरियावहिय-मायाय, आगओ य पडिक्कमे ॥88॥
 आभोइत्ताण णीसेसं, अइयारं य जहक्कमं ।
 गमणागमणे चेव, भत्तपाणे व सजए ॥89॥
 उज्जु-प्पण्णो अणुव्विग्गो, अवक्खित्तेण चयसा ।
 आलोए गुरु सगासे, ज जहा गहिय भवे ॥90॥
 ण सम्म-मालोइयं हुज्जा, पुव्विं पच्छ व ज कड ।
 पुणो पडिक्कमे तस्स, वोसिट्ठो चित्तए इम ॥91॥
 अहो ! जिणेहि असावज्जा, वित्ती साहूण देसिया ।
 मोक्ख-साहण हेउस्स, साहू-देहरस्स धारणा ॥92॥
 णमुक्कारेण पारित्ता, करित्ता जिण सथव ।
 सज्झाय पट्टवित्ताण, वीसमेज्ज खण मुणी ॥93॥
 वीसमन्तो इम चिन्ते, हियमट्ट लाभ-मट्ठिओ ।
 जइ मे अणुग्गह कुज्जा, साहू हुज्जामि तारिओ ॥94॥
 साहवो तो चियत्तेण, णिमतिज्ज जहक्कमं ।
 जइ तत्थ केइ इच्छिज्जा, तेहिं सद्धिं तु भुजए ॥95॥
 अह कोइ ण इच्छिज्जा, तओ भुजिज्ज एगओ ।
 आलोए भायणे साहू, जयं अपरिसाडिय ॥96॥
 तित्तगं व कडुय व कसाय, अम्बिलं व महुर लवण वा ।
 एयलद्ध-मण्णट्ट-पउत्तं, महुघयं व भुजिज्ज संजए ॥97॥
 अरस विरसं वा वि, सूइय वा असूइय ।
 उल्लं वा जइ वा सुक्कं, मन्थु-कुम्मास-भोयण ॥98॥

समणं माहणं वावि, किविणं वा वणीमग।
उवसंक-मन्तं भत्तट्टा, पाणट्टाए व संजए।।10।।
तमइक्कमित्तु ण पविसे, ण चिट्ठे चक्खु-गोयरे।
एगत-मवक्कमित्ता, तत्थ चिट्ठिज्ज संजए।।11।।
वणीमगस्स वा तस्स, दायगस्सुभयस्स वा।
अप्पत्तियं सिया हुज्जा, लहुत्त पवयणस्स वा।।12।।
पडिसेहिए व दिण्णे वा, तओ तम्मि णियत्तिए।
उवसक-मिज्ज भत्तट्टा, पाणट्टाए व सजए।।13।।
उप्पल पउम वावि, कुमुय वा मगदन्तिय।
अण्णं वा पुप्फ-सच्चित्त, त च सलुचिया दए।।14।।
त भवे भत्तपाण तु, सजयाण अकप्पिय।
दितिय पडियाइक्खे, "ण मे कप्पइ तारिस"।।15।।
उप्पल पउम वावि, कुमुय वा मगदतिय।
अण्णं वा पुप्फ-सच्चित्त, त च सम्मदिया दए।।16।।
त भवे भत्तपाण तु, सजयाण अकप्पिय।
दितिय पडियाइक्खे, "ण मे कप्पइ तारिस"।।17।।
सालुय वा विरालिय, कुमुय उप्पल-णालिय।
मुणालियं सासव-णालिय, उच्छुखण्ड अणिवुड।।18।।
तरुणग वा पवाल, रुक्खस्स तणगस्स वा।
अण्णस्स वावि हरियस्स, आमग परिवज्जए।।19।।
तरुणिय वा छिवाडिं, आमिय भज्जिय सइं।
दितिय पडियाइक्खे, ण मे कप्पइ तारिस।।20।।
तहा कोल-मणुरिस्सण्णं, वेलुय कासव-णालिय।
तिल-पप्पडग णीमं, आमग परिवज्जए।।21।।
तहेव चाउलं पिट्ठं, वियडं वा तत्तणिवुड।
तिल-पिट्ठ पूइ-पिण्णागं, आमगं परिवज्जए।।22।।

कविद्वं माउलिंग य, मूलगं मूलगत्तिय ।
 आम असत्थ-परिणय, मणसा वि ण पत्थए ॥23॥
 तहेव फलमन्धूणि, बीयमथूणि जाणिया ।
 विहेलग पियालं य, आमगं परिवज्जए ॥24॥
 समुयाणं चरे भिक्खू, कुल-मुच्चावयं सया ।
 णीय कुल-मइक्कम्म, ऊसढं गाभिधारए ॥25॥
 अदीणो वित्ति-मेसिज्जा, ण विसीइज्ज पंडिए ।
 अमुच्छिओ भोयणम्मि, मायण्णे एसणा रए ॥26॥
 "बहु परघरे अत्थि, विविह खाइमं-साइमं ।
 ण तत्थ पण्डिओ कुप्पे, इच्छा दिज्ज परो ण वा ॥27॥
 सयणासण वत्थं वा, भत्त-पाणं च सजए ।
 अदिन्तस्स ण कुप्पिज्जा, पच्चक्खे वि य दीसओ ॥28॥
 इत्थियं पुरिसं वावि, उहरं वा महल्लगं ।
 वंदमाण ण जाइज्जा, णो य ण फरुसं वए ॥29॥
 जे ण वंदे ण से कुप्पे, वन्दिओ ण समुक्कसे ।
 एवमण्णे समाणस्स, सामण्ण-मणुचिद्वइ ॥30॥
 सिया एगइओ लद्धं, लोभेण विणिगूहइ ।
 "मामेयं दाइय सन्तं, दट्ठूण सयमायए" ॥31॥
 अत्तट्ठा-गुरुओ लुद्धो, बहुपावं पकुव्वइ ।
 दुत्तोसओ य से होइ, णिव्वाणं च ण गच्छइ ॥32॥
 सिया एगइओ लद्धं, विविहं पाण-भोयण ।
 भद्दग-भद्दग भुच्चा, विवण्ण विरस-माहरे ॥33॥
 जाणतु ता इमे समणा, "आययट्ठी अय मुणी ।
 संतुट्ठो सेवए पन्त, लूह-वित्ती सुतोसओ ॥34॥
 पूयणट्ठी जसोकामी, माण-सम्माण-कामए ।
 बहु पसवइ पावं, माया सल्लं य कुव्वइ ॥35॥

सुर वा मेरगं वावि, अण्णं वा मज्जगं रसं।
ससक्खं ण पिबे भिक्खू, जसं सारक्ख-मप्पणो ॥36॥
पियए एगओ तेणो, ण मे कोइ वियाणइ।
तस्स पस्सह दोसाइं, णियडिं च सुणेह मे ॥37॥
वड्डइ सुण्डिया तस्स, माया-मोसं य भिक्खूणो।
अयसो य अणिव्वाणं, सयय च असाहुया ॥38॥
णिच्चुविग्गो जहा तेणो, अत्त-कम्मेहि दुम्मई।
तारिसो मरणंते वि, ण आराहेइ संवरं ॥39॥
आयरिए णाराहेइ, समणे यावि तारिसो।
गिहत्था वि णं गरिहंति, जेण जाणति तारिस ॥40॥
एव तु अगुण-प्पेही, गुणाणं च विवज्जए।
तारिसो मरणन्तेऽवि, ण आराहेइ संवर ॥41॥
तव कुव्वइ मेहावी, पणीय वज्जए रसं।
मज्ज-प्पमाय-विरओ, तवस्सी अइउक्कसो ॥42॥
तस्स पस्सह कल्लाणं, अणेग-साहु-पूइयं।
विउलं अत्थ-संजुत्तं, कित्तइस्सं सुणेह मे ॥43॥
एवं तु गुण-प्पेही, अगुणाणं य विवज्जए।
तारिसो मरणन्तेवि, आराहेइ संवरं ॥44॥
आयरिए आराहेइ, समणे यावि तारिसो।
गिहत्थावि णं पूयंति, जेण जाणंति तारिसं ॥45॥
तव-तेणे वय-तेणे, रूव-तेणे य जे णरे।
आयार-भाव-तेणे य, कुव्वइ देव-किव्विसं ॥46॥
लद्धूणं वि देवत्तं, उववण्णो देव-किव्विसे।
तत्था वि से ण याणेइ, किं मे किच्चा इमं फलं? ॥47॥
तत्तो वि से चइत्ताणं, लब्भइ एल-मूयगं।
णरगं तिरिक्ख-जोणि वा, बोही जत्थ सुदुल्लहा ॥48॥

किण्णु भो ! अज्ज मिहिलाए, कोलाहलग-संकुला ।
 सुव्वन्ति दारुणा सद्दा, पासाएसु गिहेसु य ॥ 7 ॥
 एयमद्धं णिसामित्ता, हेऊ-कारण-चोइओ ।
 तओ णमी रायरिसी, देविन्दं इण-मब्बवी ॥ 8 ॥
 मिहिलाए चेइए वच्छे, सीय-च्छाए मणोरमे ।
 पत्त-पुप्फ-फलोवेए, बहूणं बहु-गुणे सया ॥ 9 ॥
 वाएण हीरमाणम्मि, चेइयम्मि मणोरमे ।
 दुहिया असरणा अत्ता, एए कंदन्ति भो ! खगा ॥ 10 ॥
 एयमद्धं णिसामित्ता, हेऊ-कारण-चोइओ ।
 तओ णमि रायरिसि, देविन्दो इण-मब्बवी ॥ 11 ॥
 एस अग्गी य वाऊ य, एयं उज्झइ मन्दिरं ।
 भयवं अन्तेउरं तेण, कीस ण णाव-पेक्खह ॥ 12 ॥
 एयमद्धं णिसामित्ता, हेऊ-कारण-चोइओ ।
 तओ णमी रायरिसी, देविन्दं इण-मब्बवी ॥ 13 ॥
 सुहं वसामो जीवामो, जेसिं मो णत्थि किंचण ।
 मिहिलाए उज्झ-माणीए, ण मे उज्झइ किचणं ॥ 14 ॥
 चत्त-पुत्त-कलत्तस्स, णिव्वा-वारस्स भिक्खुणो ।
 पियं ण विज्जइ किञ्चि, अप्पियं वि ण विज्जइ ॥ 15 ॥
 बहुं खु मुणिणो भद्दं, अणगारस्स भिक्खुणो ।
 सव्वओ विप्पमुक्कस्स, एगन्त-मणुपस्सओ ॥ 16 ॥
 एयमद्धं णिसामित्ता, हेऊ-कारण-चोइओ ।
 तओ णमिं रायरिसिं, देविन्दो इण-मब्बवी ॥ 17 ॥
 पागारं कारइत्ताणं, गोपुर-ट्टालगाणि य ।
 उस्सूलग-सयग्धीओ, तओ गच्छसि खत्तिया ॥ 18 ॥
 एयमद्धं णिसामित्ता, हेऊ-कारण-चोइओ ।
 तओ णमी रायरिसी, देविन्दं इण-मब्बवी ॥ 19 ॥

सद्ध णगर किच्चा, तव संवर-मग्गल ।
खन्तिं णिउण-पागारं, तिगुत्त दुप्पधसय ॥20॥
धणुं परक्कमं किच्चा, जीवं च इरिय सया ।
धिइं च केयणं किच्चा, सच्चेण पलिमन्थए ॥21॥
तव णाराय जुत्तेण, भित्तूण कम्म-कञ्चुय ।
मुणी विगय-संगामो, भवाओ परिमुच्चए ॥22॥
एयमद्द णिसामित्ता, हेऊ-कारण-चोइओ ।
तओ णमि रायरिसिं, देविन्दो इण-मब्बवी ॥23॥
पासाए कारइत्ताणं, वद्धमाण-गिहाणि य ।
वालग्ग-पोइयाओ य, तओ गच्छसि खत्तिया ॥24॥
एयमद्द णिसामित्ता, हेऊ-कारण-चोइओ ।
तओ णमी रायरिसी, देविन्दं इण-मब्बवी ॥25॥
ससयं खलु सो कुणई, जो मग्गे कुणई घरं ।
जत्थेव गंतु-मिच्छेज्जा, तत्थ कुव्वेज्ज सासयं ॥26॥
एयमद्द णिसामित्ता, हेऊ-कारण-चोइओ ।
तओ णमि रायरिसिं, देविन्दो इण-मब्बवी ॥27॥
आमोसे लोमहारे य, गण्ठिभेए य तक्करे ।
णगरस्स खेमं कारुण, तओ गच्छसि खत्तिया ॥28॥
एयमद्द णिसामित्ता, हेऊ-कारण-चोइओ ।
तओ णमी रायरिसी, देविन्दं इण-मब्बवी ॥29॥
असइ तु मणुस्सेहि, मिच्छा-दण्डो पउञ्जइ ।
अकारिणो-उत्थ वज्जति, मुच्चई कारओ जणो ॥30॥
एयमद्द णिसामित्ता, हेऊ-कारण-चोइओ ।
तओ णमि रायरिसिं, देविन्दो इण-मब्बवी ॥31॥
जे केइ पत्थिवा तुज्झं, णाऽणमति णराहिवा ।
वसे ते ठावइत्ताणं, तओ गच्छसि खत्तिया ॥32॥

एयमद्वं णिसामित्ता, हेऊ-कारण-चोइओ ।
 तओ णमी रायरिसी, देविन्दं इण-मब्बवी ।।33।।
 जो सहस्सं सहस्साणं, संगामे दुज्जए जिणे ।
 एगं जिणेज्ज अप्पाणं, एस से परमो जओ ।।34।।
 अप्पाण-मेव जुज्झाहि, किं ते जुज्जेण वज्झओ ।
 अप्पाणमेव-मप्पाणं, जिणित्ता सुहमेहए ।।35।।
 पंचिन्दियाणि कोहं, माणं मायं तहेव लोहं च ।
 दुज्जयं चेव अप्पाणं, सव्वं अप्पे-जिए जियं ।।36।।
 एयमद्वं णिसामित्ता, हेऊ-कारण-चोइओ ।
 तओ णमि रायरिसि, देविन्दो इण-मब्बवी ।।37।।
 जइत्ता विउले जण्णे, भोइत्ता समण-माहणे ।
 दच्चा भोच्चा य जिह्वा य, तओ गच्छसि खत्तिया ।।38।।
 एयमद्वं णिसामित्ता, हेऊ-कारण-चोइओ ।
 तओ णमी रायरिसी, देविन्द इण-मब्बवी ।।39।।
 जो सहस्सं सहस्साणं, मासे मासे गव दए ।
 तस्सावि संजमो सेओ, अदिन्तस्स-ऽवि किञ्चणं ।।40।।
 एयमद्वं णिसामित्ता, हेऊ-कारण-चोइओ ।
 तओ णमि रायरिसि, देविन्दो इण-मब्बवी ।।41।।
 घोरासमं चइत्ताण अण्ण पत्थेसि आसमं ।
 इहेव पोसह-रओ, भवाहि मणुयाहिवा ।।42।।
 एयमद्वं णिसामित्ता, हेऊ-कारण-चोइओ ।
 तओ णमी रायरिसी, देविन्दं इण-मब्बवी ।।43।।
 मासे मासे उ जो बालो, कुसग्गेणं तु भुञ्जए ।
 ण सो सुयक्खाय धम्मस्स, कलं अग्घइ सोलसिं ।।44।।
 एयमद्वं णिसामित्ता, हेऊ-कारण-चोइओ ।
 तओ णमिं रायरिसिं, देविन्दो इण-मब्बवी ।।45।।

हिरण्ण सुवण्ण मणि-मुत्तं, कंसं दूस च वाहण ।

कोसं वड्ढा-वइत्ताण, तओ गच्छसि खत्तिया ॥46॥

एयमद्द णिसामित्ता, हेऊ-कारण-चोइओ ।

तओ णमी रायरिसी, देविन्द इण-मब्बवी ॥47॥

सुवण्ण-रुव्वस्स उ पव्वया भवे, सिया हु केलास समा असखया ।

णरस्स लुद्धस्स ण तेहि किञ्चि, इच्छा हु आगास समा अणत्तिया ॥48॥

पुढवी साली जवा चेव, हिरण्ण पसुभिस्सह ।

पडिपुण्ण णाल-मेगस्स, इइ विज्जा तव चरे ॥49॥

एयमद्द णिसामित्ता, हेऊ-कारण-चोइओ ।

तओ णमि रायरिसि, देविन्दो इण-मब्बवी ॥50॥

अच्छेरग-मब्भुदए, भोए चयसि पत्थिवा ! ।

असन्ते कामे पत्थेसि, सकप्पेण विहम्मसि ॥51॥

एयमद्द णिसामित्ता, हेऊ-कारण-चोइओ ।

तओ णमी रायरिसी, देविन्दं इण-मब्बवी ॥52॥

सल्ल कामा विसं कामा, कामा आसी-विसोवमा ।

कामे भोए पत्थेमाणा, अकामा जन्ति दोग्गइ ॥53॥

अहे वयइ कोहेणं, माणेण अहमा गइ ।

माया गई-पडिग्घाओ, लोहाओ दुहओ भय ॥54॥

अवउज्झिऊण माहण रूवं, विउव्विऊण ईन्दत्त ।

वदइ अभित्थुणन्तो, इमाहि महुराहि वग्गूहि ॥55॥

अहो ते णिज्जिओ कोहो, अहो माणो पराजिओ ।

अहो ते णिरक्किया माया, अहो लोहो वसीकओ ॥56॥

अहो ! ते अज्जवं साहु, अहो ! ते साहु मद्दव ।

अहो ! ते उत्तमा खन्ती, अहो ते मुत्ति उत्तमा ॥57॥

इहन्सि उत्तमो भते, पच्छा होहिसि उत्तमो ।

लोगुत्त-मुत्तम ठाणं, सिद्धि गच्छसि णीरओ ॥58॥

एवं अभित्थुणन्तो, रायरिसिं उत्तमाए सद्धाए ।
 पयाहिणं करेन्तो, पुणो पुणो वंदइ सक्को ॥59॥
 तो वंदिरुण पाए, चक्कंकूस लक्खणे मुणिवरस्स ।
 आगासेणु-प्पईओ, ललिय-चवल-कुण्डल-तिरीडी ॥60॥
 गमी गमेइ अप्पाण, सक्खं सक्केण चोइओ ।
 चइरुण गेहं च वेदेही, सामण्णे पज्जुवट्ठिओ ॥61॥
 एवं करेन्ति सम्बुद्धा, पण्डिया पवियक्खणा ।
 विणियट्ठंति भोगेसु, जहा से गमी रायरिसी ॥ ति वेमि ॥62॥

॥ अह णवमं-नमिपवज्जा-णामज्झयणं ॥9॥

॥ अह हरीएसिज्जं-बारहं-अज्झयणं ॥12॥

सोवाग-कुल-सम्भूओ, गुणुत्तर-धरो मुणी ।
 हरिएस-बलो णाम, आसी भिक्खू जिइंदिओ ॥1॥
 इरि-एसण-भासाए, उच्चार-समिईसु य ।
 जओ आयाण-णिक्खेवे, संजओ सुसमाहिओ ॥2॥
 मण-गुत्तो वय-गुत्तो, काय-गुत्तो जिइन्दिओ ।
 भिक्खट्ठा बम्म इज्जम्मि, जण्णवाड उवट्ठिओ ॥3॥
 तं पासिरुणं एज्जन्तं, तवेण परिसोसिय ।
 पन्तोवहि उवगरणं, उवहसन्ति अणारिया ॥4॥
 जाईमय-पडिथद्धा, हिंसगा अजिइन्दिया ।
 अबम्म-चारिणो बाला, इम वयण-मब्बवी ॥5॥
 कयरे आगच्छइ दित्त-रूवे, काले विकराले फोक्क-णासे ।
 ओमचेलए पंसु-पिसायभूए, संकर-दूसं परिहरिय कण्ठे ॥6॥
 कयरे तुमं इय अदंसणिज्जे, काए व आसा-इह-मागओ सि ।
 ओमचेलया पंसु-पिसायभूया, गच्छ-क्खलाहि किमिहं टिओसि ॥7॥

जक्खो तहि तिन्दुय-रुक्खवासी, अणुकम्पओ तरस्स महामुणिस्स ।
पच्छाय-इत्ता णियग सरीरं, इमाइ वयणाइ-मुदाह-रित्था ॥ 8 ॥
समणो अहं संजओ बम्भयारी, विरओ धण-पयण-परिग्गहाओ ।
परप्पवित्तस्स उ भिक्ख-काले, अण्णस्स अट्ठा इह-मागओमि ॥ 9 ॥
विय-रिज्जइ खज्जइ भुज्जई य, अण्ण पभूय भवयाण-मेय ।
जाणाहि मे जायणा जीविणुत्ति, सेसाव-सेस लभऊ तवस्सी ॥ 10 ॥
उवक्खडं भोयण माहणाणं, अत्तट्ठिय सिद्ध-मिहेग पक्ख ।
ण उ वय एरिस-मण्ण-पाणं, दाहामु तुज्झ किमिह ठिओसि ॥ 11 ॥
थलेसु बीयाइ ववन्ति कासगा, तहेव णिण्णेषु य आससाए ।
एयाए सद्धाए दलाह-मज्झं, आराहए पुण्ण-मिणं खु खित्त ॥ 12 ॥
खेत्ताणि अम्हं बिइयाणि लोए, जहि पकिण्णा विरुहन्ति पुण्णा ।
जे माहणा जाइ विज्जोव-वेया, ताइ तु खेत्ताइं सुपेसलाइं ॥ 13 ॥
कोहो य माणो य वहो य जेसिं, मोस अदत्त च परिग्गहं च ।
ते माहणा जाइविज्जा विहूणा, ताइं तु खेत्ताइ सुपावयाइ ॥ 14 ॥
तुब्भेत्य भो ! भार-धरा गिराण, अट्ठं ण जाणेह अहिज्ज वेए ।
उच्चावयाइं मुणिणो चरन्ति, ताइ तु खेत्ताइ सुपेसलाइ ॥ 15 ॥
अज्झा-वयाणं पडिकूल-भासी, पभाससे किण्णु सगासि अम्ह ।
अवि एय विणस्सउ अण्ण-पाण, ण य णं दाहामु तुम णियण्ठा ॥ 16 ॥
समिईहि मज्झं सुसमाहियस्स, गुत्तीहि गुत्तरस्स जिइन्दियस्स ।
जइ मे ण दाहित्थ अहेसणिज्ज, किमज्ज जण्णाण लहित्थ लाह ॥ 17 ॥
के इत्थ खत्ता उवजोइया वा, अज्झावया वा सह खण्डिएहि ।
एय खु दण्डेण फलेण हन्ता, कण्ठम्मि घेत्तूण खलेज्ज जो ण ॥ 18 ॥
अज्झावयाणं वयण सुणेत्ता, उद्धाइया तत्थ बहू कुमारा ।
दण्डेहि वित्तेहि कसेहि चेव, समागया त इसि तालयन्ति ॥ 19 ॥
रण्णो तहि कोसलियस्स धूया, भद्द त्ति णामेण अणिन्दियगी ।
त पासिया संजय हम्ममाण, कुद्धे कुमारे परिणिव्व-वेइ ॥ 20 ॥

देवाभिओगेण णिओइएणं, दिण्णामु रण्णा मणसा ण ज्ञाया ।
 णरिन्द देविन्दभि-वन्दिएणं, जेणामि वन्ता इसिणा स एसो ॥21॥
 एसो हु सो उग्गतवो महप्पा, जिइन्दिओ सजओ बम्भयारी ।
 जो मे तया णेच्छइ दिज्जमाणिं, पिउणा सयं कोसलिएण रण्णा ॥22॥
 महाजसो एस महाणुभागो, घोर-व्वओ घोर-परक्कमो य ।
 मा एयं हीलेह अहील-णिज्जं, मा सव्वे तेएण भे णिद्वहेज्जा ॥23॥
 एयाइं तीसे वयणाइं सोच्चा, पत्तीइ भद्दाइ सुभासियाइं ।
 इसिस्स वेयावडि-यट्टयाए, जक्खा कुमारे वि णिवारयन्ति ॥24॥
 ते घोररूवा टिय अंतलिकखे, असुरा, तहि तं जणं तालयन्ति ।
 ते भिण्ण-देहे रुहिरं वमन्ते, पासित्तु भद्दा इणमाहु भुज्जो ॥25॥
 गिरि णहेहि खणह, अयं दन्तेहि खायह ।
 जायतेयं पाएहिं हणह, जे भिक्खु अवमण्णह ॥26॥
 आसीविसो उग्गतवो महेसी, घोरव्वओ घोर-परक्कमो य ।
 अगणिं व पक्खन्द पयंगसेणा, जे भिक्खुय भत्तकाले वहेह ॥27॥
 सीसेण एयं सरणं उवेह, समागया सव्व-जणेण तुब्भे ।
 जइ इच्छह जीवियं वा घणं वा, लोगं वि एसो कुविओ डहेज्जा ॥28॥
 अवहेडिय-पिट्टिस-उत्तमंगे, पसारिया-वाहु अकम्म चेट्टे ।
 णिब्भेरि-यच्छे रुहिरं वमन्ते, उट्टुं-मुहे णिग्गय जीह-णेत्ते ॥29॥
 ते पासिया खण्डिय कट्टभूए, विमणो विसण्णो अह माहणो सो ।
 इसिं पसाएइ सभारियाओ, हील च णिन्द च खमाह भंते ! ॥30॥
 बालेहिं मूढेहि अयाणएहिं, जं हीलिया तस्स खमाह भंते !
 महप्पसाया इसिणो हवन्ति, ण हु मुणी कोव-परा हवन्ति ॥31॥
 पुक्विं च इण्हिं च अणागयं च, मण-प्पदोसो ण मे अत्थि कोई ।
 जक्खा हु वेयावडियं करेन्ति, तम्हा हु एए णिहया कुमारा ॥32॥
 अत्थं च धम्मं च वियाणमाणा, तुब्भे ण वि कुप्पह भूइपण्णा ।
 तुब्भं तु पाए सरणं उवेमो, समागया सव्व-जणेण अम्हे ॥33॥

अच्चेमु ते महाभाग !, ण ते किञ्चि ण अच्चिमो ।
 भुञ्जाहि सालिम कूरं, णाणा-वंजण-सजुयं ।।34।।
 इम च मे अत्थि पभूयमण्णं, त भुञ्जसू अम्ह अणुग्गहट्ठा ।
 'बाढ' ति पडिच्छइ भत्तपाणं, मासस्स उ पारणए महप्पा ।।35।।
 तहिय गन्धोदय-पुप्फवास, दिव्वा तहि वसुहारा य वुट्ठा ।
 पहयाओ दुंदुहीओ सुरेहिं, आगासे अहोदाण च घुट्ठ ।।36।।
 सक्ख खु दीसइ तवो-विसेसो, ण दीसई जाइ-विसेस कोई ।
 सोवाग-पुत्तं हरिएस साहूं, जस्सेरिसा इड्ढि महाणुभागा ।।37।।
 किं माहणा जोइ समारम्भन्ता, उदएण-सोहि बहिया विमग्गहा ।
 ज मग्गहा बाहिरियं विसोहि, ण तं सुइट्ठं कुसला वयन्ति ।।38।।
 कुसं च जूव तण-कट्ट-मग्गि, सायं च पाय उदगं फुसंता ।
 पाणाइ भूयाइं विहेडयन्ता, भुज्जो वि मन्दा पकरेह पाव ।।39।।
 कह चरे भिक्खु वय जयामो, पावाइ-कम्माइं पुणोल्लयामो ।
 अक्खाहि णे संजय जक्ख-पूइया, कहं सुइट्ठं कुसला वयन्ति ।।40।।
 छज्जीव-काए असमारम्भन्ता, मोसं अदत्तं च असेवमाणा ।
 परिग्गह इत्थिओ माण-मायं, एय परिण्णाय चरन्ति दन्ता ।।41।।
 सुसम्बुडो पचहि संवरेहि, इह जीविय अणव-कखमाणो ।
 वोसट्ट-काया सुइ-चत्तदेहा, महाजय जयई जण्णसिट्ठ ।।42।।
 के ते जोई के य ते जोइठाणे, का ते सुया कि य ते कारिसग ।
 एहा य ते कयरा सन्ति भिक्खू, कयरेण होमेण हुणासि जोइ ।।43।।
 तवो जोई जीवो जोइठाणं, जोगा सुया सरीर कारिसंगं ।
 कम्मेहा संजम-जोग-सन्ती, होमं हुणामि इसिणं पसत्थ ।।44।।
 के ते हरए के य ते सति-तित्थे, कहि सिणाओ व रयं जहासि ।
 आइक्ख णे संजय जक्ख-पूइया, इच्छामो णाउ भवओ सगासे ।।45।।
 धम्मे हरए बम्मे सन्ति-तित्थे, अणाविले अत्त-पसण्ण लेसे ।
 जहि सिणाओ विमलो विसुद्धो, सुसीइ-भूओ पजहामि दोस ।।46।।

एयं सिणाण कुसलेहि दिट्ठं, महासिणाणं इसिणं पसत्थं।
जहिं सिणाया विमला विसुद्धा, महारिसी उत्तमं ठाणं पत्ते ॥४७॥

॥ ति बेमि ॥ इति हरीएसिज्जं-बारहं-अज्झयणं-समत्तं ॥१२॥

॥ अह महाणियण्ठिज्जं-वीसइमं-अज्झयणं ॥२०॥

सिद्धाणं णमो किच्चा, सजयाणं च भावओ।
अत्थ-धम्मगइं तच्चं, अणुसिद्धिं सुणेह मे ॥१॥
पभूय-रयणो राया, 'सेणिओ' मगहाहिवो।
विहारज्जत्तं णिज्जाओ, 'मण्डि कुच्छिंसि' चेइए ॥२॥
णाणा दुम-लयाइण्णं, णाणा पक्खि-णिसेवियं।
णाणा कुसुम-संछण्णं, उज्जाणं णन्दणोवमं ॥३॥
तत्थ सो पासइ साहुं, संजयं सुसमाहियं।
णिसण्णं रुक्ख-मूलम्मि, सुकुमालं सुहोइयं ॥४॥
तस्स रूवं तु पासित्ता, राइणो तम्मि सजए।
अच्चन्त-परमो आसी, अउलो रूव विम्हओ ॥५॥

अहो ! वण्णो अहो ! रूवं, अहो ! अज्जस्स सोमया।
अहो ! खन्ती अहो ! मुत्ती, अहो ! भोगे असंगया ॥६॥
तस्स पाए उ वन्दित्ता, काऊण य पयाहिणं।
णाइदूर-मणासण्णे, पञ्जली पडिपुच्छइ ॥७॥
तरुणोसि अज्जो ! पव्वइओ, भोग-कालम्मि संजया।
उवट्ठिओऽसि सामण्णे, एयमइं सुणेमित्ता ॥८॥
अणाहोमि महाराय ! णाहो मज्झ ण विज्जइ।
अणुकम्पगं सुहिं वावि, कंचि-णाभिसमे-मह ॥९॥
तओ सो पहसिओ राया, सेणिओ मगहाहिवो !
एवं ते इट्ठिमंतस्स, कहं णाहो ण विज्जइ ॥१०॥

होमि णाहो भयन्ताण, भोगे भुजाहि सजया !।
 मित्त-णाइ-परिवुडो, माणुस्स खु सुदुल्लह ।।11।।
 अप्पणा वि अणाहोऽसि, सेणिया मगहाहिवा !।
 अप्पणा अणाहो सन्तो, कहं णाहो भविस्ससि ।।12।।
 एव वुत्तो णरिन्दो सो, सुसम्भन्तो सुविम्हिओ।
 वयण अस्सुय-पुव्व, साहुणा विम्हयण्णिओ ।।13।।
 अस्सा हत्थी मणुस्सा मे, पुरं अन्तेउर च मे।
 भुञ्जामि माणुसे भोगे, आणा इस्सरियं च मे ।।14।।
 एरिसे संपयग्गम्मि, सव्व-काम समप्पिए।
 कहं अणाहो भवइ, मा हु भते ! मुसं-वए ।।15।।
 ण तुमं जाणे अणाहस्स, अत्थं पोत्थ च पत्थिवा।
 जहा अणाहो भवइ, सणाहो वा णराहिवा ! ।।16।।
 सुणेह मे महाराय ! अव्वक्खित्तेण चेयसा।
 जहा अणाहो भवइ, जहा मेयं पवत्तिय ।।17।।
 कोसम्बी णाम णयरी, पुराण पुर-भेयणी।
 तत्थ आसी पिया मज्झ, पभूय-धण-संचओ ।।18।।
 पढमे वए महाराय ! अउला मे अच्छि-वेयणा।
 अहोत्था विउलो दाहो, सव्व-गत्तेसु पत्थिवा ।।19।।
 सत्थ जहा परम तिक्खं, सरीर-विवरन्तरे।
 पविसेज्ज अरी कुद्धो, एव मे अच्छि-वेयणा ।।20।।
 तियं मे अन्तरिच्छं च, उत्तमग च पीडई।
 इन्दासणि-समा घोरा, वेयणा परम दारुणा ।।21।।
 उवट्टिया मे आयरिया, विज्जा-मत तिगिच्छया।
 अबीया सत्थ-कुसला, मत-मूल विसारया ।।22।।
 ते मे तिगिच्छ कुव्वति, चाउप्पाय जहाहियं।
 ण य दुक्खा विमोयंति, एसा मज्झ अणाहया ।।23।।

पिया मे सव्व-सारं वि, दिज्जाहि मम कारणा ।
 ण य दुक्खा विमोएइ, एसा मज्झ अणाहया ॥24॥
 मायावि मे महाराय !, पुत्त सोग दुहड्डिया ।
 ण य दुक्खा विमोएइ, एसा मज्झ अणाहया ॥25॥
 भायरो मे महाराय !, सगा जेइ-कणिट्टगा ।
 ण य दुक्खा विमोयन्ति, एसा मज्झ अणाहया ॥26॥
 भइणीओ मे महाराय ! सगा जेइ-कणिट्टगा ।
 ण य दुक्खा विमोयन्ति, एसा मज्झ अणाहया ॥27॥
 भारिया मे महाराय !, अणुरत्ता अणुव्वया ।
 अंसु-पुण्णेहिं णयणेहि, उर मे परिसिंचइ ॥28॥
 अण्णं पाणं च ण्हाणं च, गन्ध-मल्ल-विलेवण ।
 मए णाय-मणायं वा, सा बाला णेव भुञ्जइ ॥29॥
 खणं वि मे महाराय !, पासाओ वि ण फिट्टइ ।
 ण य दुक्खा विमोएइ, एसा मज्झ अणाहया ॥30॥
 तहोऽहं एव-माहन्सु, दुक्खमाहु पुणो पुणो ।
 वेयणा अणुभविउं जे, संसारम्मि अणन्तए ॥31॥
 सइं च जइ मुच्चेज्जा, वेयणा विउला इओ ।
 खन्तो दन्तो गिरारम्भो, पव्वइए अणगारियं ॥32॥
 एवं च चिंतइत्ताणं, पसुत्तोमि णराहिवा ।
 परीय-त्तन्तीए राईए, वेयणा मे खयं गया ॥33॥
 तओ कल्ले-पभायम्मि, आपुच्छित्ताण बन्धवे ।
 खन्तो दन्तो गिरारम्भो, पव्वइओ अणगारियं ॥34॥
 ततोऽहं णाहो जाओ, अप्पणो य परस्स य ।
 सव्वेसिं चेव भूयाणं, तसाण-थावराणं य ॥35॥
 अप्पा णई वेयरणी, अप्पा मे कूड-सामली ।
 अप्पा कामदुहा धेणू, अप्पा मे णन्दणं वणं ॥36॥

अप्पा कत्ता विकत्ता य, दुहाण य सुहाण य।

अप्पा मित्तममित्त च, दुप्पड्डिय सुपड्डिओ ॥३७॥

इमा हु अण्णावि अणाहया णिवा, तमेग-चित्तो णिहुओ सुणेहि।

णियण्ठ धम्मं लहियाण वि जहा, सीयन्ति एगे बहु कायरा णरा ॥३८॥

जो पव्वइत्ताण महव्वयाइं, सम्म य णो फासयई पमाया।

अणिग्गहप्पा य रसेसु गिद्धे, ण मूलओ छिदइ बन्धणं से ॥३९॥

आउत्तया जस्स णअत्थि काइ, इरियाए भासाए तहेसणाए।

आयाण-णिक्खेव-दुगुंछणाए, ण वीरजायं अणुजाइ मग्गं ॥४०॥

चिरपि से मुण्डरुई भवित्ता, अथिरव्वए तव-णियमेहि भट्टे।

चिरपि अप्पाण किलेसइत्ता, ण पारए होइ हु सम्पराए ॥४१॥

पोल्लेव मुट्ठी जह से असारे, अयन्तिए कूड-कहावणे वा।

राढामणी वेरुलिय-प्पगासे, अमहग्घए होइ हु जाणएसु ॥४२॥

कुसील-लिगं इह धारइत्ता, इसिज्झयं जीविय बूहइत्ता।

असजए सजय-लप्पमाणे, विणिग्घाय-मागच्छइ से चिरं पि ॥४३॥

विसं तु पीयं जह कालकूड, हणाइ सत्थ जह कुग्गहीयं।

एसोवि धम्मो विसओव-वण्णो, हणाइ वेयाल इवाविवण्णो ॥४४॥

जे लक्खणं सुविण पउञ्जमाणे, णिमित्त-कोरुहल सपगाढे।

कुहेड-विज्जासव-दार जीवी, ण गच्छइ सरण तम्मि-काले ॥४५॥

तम-तमेणेव उ से असीले, सया दुही विप्परिया-मुवेइ।

संधावइ णरग-तिरिक्ख-जोणिं, मोण विराहित्तु असाहरुवे ॥४६॥

उद्देसियं कीयगडं णियाग, ण मुच्चइ किचि अणेसणिज्ज।

अग्गी विवा सव्व-भक्खी भवित्ता, इत्तो चुओ गच्छइ कट्टु पाव ॥४७॥

ण त अरी कठ-छित्ता करेइ, ज से करे अप्पणिया-दुरप्पा।

से णाहिइ मच्चु-मुह तु पत्ते, पच्छाणु-तावेण दया-विहूणो ॥४८॥

णिरट्टिया णग्गरुई उ तस्स, जे उत्तमइ विवज्जासमेइ।

इमेवि से णत्थि परे वि लोए, दुहओ वि से झिज्झइ तत्थ लोए ॥४९॥

एमेवऽहा-छन्द कुसील-रूवे, मग्ग विराहित्तु जिणुत्तमाणं ।
 कुररी विवा भोग-रसाणुगिद्धा, णिरद्ध-सोया परियावमेइ ॥50॥
 सोच्चाण मेहावी सुभासियं इमं, अणुससाणं णाण-गुणोव-वेयं ।
 मग्गं कुसीलाण जहाय सव्वं, महाणियण्ठाण वए पहेण ॥51॥
 चरित्त-मायार-गुणणिए तओ, अणुत्तर सजम पालियाण ।
 णिरासवे संख-वियाण कम्मं, उवेइ ठाणं विउलुत्तमं धुवं ॥52॥
 एवुग्ग-दन्तेऽवि महा-तवोधणे, महामुणी महापइण्णे महायसे ।
 महाणियण्ठिज्ज-मिणं महासुय, से काहए महया वित्थरेणं ॥53॥

तुद्धो य सेणिओ राया, इण-मुदाहु कयञ्जली ।

अणाहय जहाभूयं, सुट्ठु मे उवदंसिय ॥54॥

तुज्झ सुलद्धं खु मणुस्स जम्मं, लाभा सुलद्धा य तुमे महेसी ।
 तुब्भे सणाहा य सबन्धवा य, जं भे ठिया मग्गे जिणुत्तमाण ॥55॥

तंसि णाहो अणाहाण, सव्व-भूयाण संजया !

खामेमि ते महाभाग !, इच्छामि अणुसासित्तं ॥56॥

पुच्छिऊण मए तुब्भं, ज्ञाण-विग्घो य जो कओ ।

णिमन्तिया य भोगेहि, तं सव्वं मरिसेहि मे ॥57॥

एवं थुणित्ताण स रायसीहो, अणगारसीहं परमाइ भत्तिए ।
 सओरोहो सपरियणो सबन्धवो, धम्माणुरत्तो विमलेण चयसा ॥58॥

ऊस-सिय-रोम-कूवो, कारुण य पयाहिणं ।

अभिवन्दिऊण सिरसा, अइयाओ णराहिवो ॥59॥

इयरो ऽवि गुण-समिद्धो, तिगुत्ति-गुत्तो तिदण्ड-विरओ य ।
 विहग इक्-विप्पमुक्को, विहरइ वसुह विगय-मोहो ॥60॥ त्तिवेमि ॥

॥ अह रहणेमिज्जं-वावीसइमं-अज्झयणं ॥२२॥

'सोरिय पुरम्मि' णयरे, आसि राया महिद्धिए ।
वासुदेवत्ति णामेण, राय-लक्खण-संजुए ॥१॥
तस्स भज्जा दुवे आसी, रोहिणी देवई तहा ।
तासि दोण्हं वि दुवे पुत्ता, इट्ठा राम-केसवा ॥२॥
सोरिय पुरम्मि णयरे, आसी राया महिद्धिए ।
'समुद्धविजय' णामं, राय-लक्खण-संजुए ॥३॥
तस्स भज्जा 'सिवा' णाम, तीसे पुत्तो महायसो ॥
भगवं 'अरिद्धणेमि त्ति', लोग-णाहे दमीसरे ॥४॥
सो अरिद्धणेमि णामो उ, लक्खण-स्सर-सजुओ ।
अट्ठ-सहस्स लक्खण-धरो, गोयमो काल गच्छवी ॥५॥
वज्ज-रिसह-संघयणो, सम-चउरंसो झसोयरो ।
तस्स रायमई-कण्णं, भज्जं जायइ केसवो ॥६॥
अह सा रायवर-कण्णा, सुसीला चारु-पेहिणी ।
सव्व-लक्खण-सम्पण्णा, विज्जु-सोया-मणिप्पभा ॥७॥
अहाह जणओ तीसे, वासुदेव महिद्धियं ।
इहा-गच्छउ कुमारो, जा से कण्ण ददामि ऽहं ॥८॥
सव्वो-सहीहि ण्हविओ, कय-कोउय-मगलो ।
दिव्व-जुयल-परिहिओ, आभरणेहि विभूसिओ ॥९॥
मत्तं च गन्धहत्थि च, वासुदेवस्स जेट्ठगं ।
आरूढो सोहइ अहियं, सिरे चूडामणी जहा ॥१०॥
अह ऊसिएण छत्तेण, चामराहि य सोहिए ।
दसार-चक्केण य सो, सव्वओ परिवारिओ ॥११॥
चउरगिणीए सेणाए, रइयाए जहक्कम ।
तुरियाण सण्णि-णाएण दिव्वेण गगणं फुसे ॥१२॥

एयारिसीए इड्डिए, जुईए उत्तमाइ य।
 णियगाओ भवणाओ, णिज्जाओ वण्हि-पुंगवो ॥13॥
 अह सो तत्थ णिज्जन्तो, दिस्स पाणे भयहुए।
 वाडेहिं पञ्जरेहिं य, सण्णिरुद्धे सुदुक्खिए ॥14॥
 जीवियन्तं तु सम्पत्ते, मंसड्ढा भक्खियव्वए।
 पासित्ता से महापण्णे, सारहिं इण-मव्ववी ॥15॥
 कस्स अट्ठा इमे पाणा, एए सव्वे सुहेसिणो।
 वाडेहि पञ्जरेहिं च, सण्णिरुद्धा य अच्छहि ॥16॥
 अह सारही तओ भणइ, एए भद्दा उ पाणिणो।
 तुज्झं विवाह-कज्जम्मि, भोयावेउं बहुं जणं ॥17॥
 सोऊण तस्स-वयणं, बहु-पाणि-विणासणं।
 चित्तेइ से महापण्णे, साणुक्कोसे जिएहि उ ॥18॥
 जइ मज्झ कारणा एए, हम्मन्ति सुबहू जिया।
 ण मे एयं तु णिस्सेसं, परलोगे भविस्सई ॥19॥
 सो कुण्डलाण जुयलं, सुत्तंग य महायसो।
 आभरणाणि य सव्वाणि, सारहिस्स पणामए ॥20॥
 मण परिणामो य कओ, देवा य जहोइयं समोइण्णा।
 सव्विड्ढीइ सपरिसा, णिक्खमणं तस्स काउं जे ॥21॥
 देव-माणुस्स-परिवुडो, सिविया-रयणं तओ समारुढो।
 णिक्खमिय बारगाओ, रेवययम्मि ठिओ भगवं ॥22॥
 उज्जाण सम्पत्तो, ओइण्णो उत्तमाओ सीयाओ।
 साहस्सीए परिवुडो, अह णिक्खमइ उ चित्ताहि ॥23॥
 अह सो सुगन्ध-गन्धिए, तुरियं मउ कुञ्चिए।
 सयमेव लुंचइ केसे, पंच-मुट्ठीहिं समाहिओ ॥24॥
 वासुदेवो य णं भणइ, लुत्तकेसं जिइन्दियं।
 इच्छिय-मणोरहं तुरियं, पावेसु तं दमीसरा ! ॥25॥

णाणेण दंसणेण च, चरित्तेणं तहेव य।
 खन्तीए मुत्तीए य, वड्डमाणो भवाहि य।।26।।
 एवं ते राम-केसवा, दसारा य बहू जणा।
 अरिद्वणेमिं वंदित्ता, अभिगया बारगापुरिं।।27।।
 सोऊण रायकण्णा, पव्वज्जं सा जिणस्स उ।
 णीहासा य णिराणन्दा, सोगेण उ समुत्थिया।।28।।
 राईमई विचिन्तेई, धिरत्थु मम जीवियं।
 जाऽहं तेण परिच्चत्ता, सेयं पव्वइउं मम।।29।।
 अह सा भमर-सण्णिभे, कुच्च-फणग-प्पसाहिए।
 सयमेव लुञ्चइ केसे, धिइमंता ववस्सिया।।30।।
 वासुदेवो य णं भणइ, लुत्तकेसं जिइन्दियं।
 संसार सागरं घोरं, तर कण्णे ! लहु-लहुं।।31।।
 सा पव्वइया सन्ति, पव्वावेसी तहिं बहुं।
 सयणं परियणं चेव, सीलवंता बहुस्सुया।।32।।
 गिरिं रेवययं जन्ती, वासेणुल्ला उ अंतरा।
 वासन्ते अंधयारम्मि, अंतो लयणस्स सा ठिया।।33।।
 चीवराणि विसारन्ति, जहा-जायत्ति पासिया।
 रहणेमी भग्गचित्तो, पच्छा दिड्डो य तीइ वि।।34।।
 भीया य सा तहि दट्ठुं, एगंते सञ्जयं तयं।
 बाहाहिं काउं संगोप्फं, वेवमाणी णिसीयई।।35।।
 अह सोऽवि रायपुत्तो, समुद्द विजयंगओ।
 भीयं पवेवियं दट्ठुं, इमं वक्क-मुदाहरे।।36।।
 रहणेमी अहं भदे !, सुरूवे चारु भासिणी।
 ममं भयाहि सुयणु, ण ते पीला भविस्सई।।37।।
 एहि ता भुल्लिमो भोए, माणुस्सं खु सुदुल्लहं।
 भुत्त-भोगी तओ पच्छा, जिणमग्गं चरिस्सामो।।38।।

दट्टूण रहणेमिं तं, भग्गुज्जोय पराजियं ।
 राईमई असंभन्ता, अप्पाणं संवरे तहिं ॥39॥
 अह सा रायवर कण्णा, सुट्टिया णियम-व्वए ।
 जाइ कुलं य सीलं च, रक्खमाणी तयं वए ॥40॥
 जइसि रूवेण वेसमणो, ललिएण णल-कूवरो ।
 तहावि ते ण इच्छामि, जइसि सक्खं पुरन्दरो ॥41॥
 पक्खन्दे जलियं जोइं, धूमकेउं दुरासय ।
 णेच्छन्ति वन्तयं भोत्तुं, कुले जाया अगन्धणे ॥42॥
 धिरत्थु तेऽजसो-कामी !, जो तं जीविय-कारणा ।
 वन्तं इच्छसि आवेउं, सेयं ते मरणं भवे ॥43॥
 अहं च भोय-रायस्स, तं चऽसि अन्धग-वण्हणो ।
 मा कुले गन्धणा होमो, सञ्जम णिहुओ चर ॥44॥
 जइ तं काहिसि भावं, जा ज्ञा दिच्छसि णारिओ ।
 वाया विद्धोव्व-हडो, अट्टिअप्पा भविस्ससि ॥45॥
 गोवालो भण्डवालो वा, जहा तद्व-ऽणिरस्सरो ।
 एवं अणिरस्सरो तंपि, सामण्णरस्स भविस्ससि ॥46॥
 तीसे सो वयणं सोच्चा, संजयाइ सुभासियं ।
 अंकुसेण जहा णागो, धम्मे सम्पडिवाइओ ॥47॥
 कोहं माणं णिगिण्हत्ता, मायं लोहं य सव्वसो ।
 इन्दियाइं वसे काउं, अप्पाणं उवसंहरे ॥48॥
 मणगुत्तो वयगुत्तो, कायगुत्तो जिइन्दिओ ।
 सामण्णं णिच्चलं फासे, जावज्जीव दढव्वओ ॥49॥
 उग्गं तवं चरित्ताणं, जाया दोण्णि वि केवली ।
 सव्वं कम्मं खवित्ताणं, सिद्धिं पत्ता अणुत्तर ॥50॥
 एवं करेन्ति सम्बुद्धा, पण्डिया पवियक्खणा ।
 विणियट्ठन्ति भोगेसु, जहा से पुरिसुत्तमो ॥त्तिवेमि ॥51॥
 ॥ इति रहणेमिज्जं-वावीसइम-अज्झयणं-समत ॥

जीवाजीव-विभत्तिं, सुणेह मे एगमणा-इओ ।
 ज जाणिरुण भिक्खू, सम्म जयइ सञ्जमे ॥ 1 ॥
 जीवा चेव अजीवा य, एस लोए वियाहिए ।
 अजीव देस-मागासे, अलोए से वियाहिए ॥ 2 ॥
 दव्वओ खेतओ चेव, कालओ भावओ तहा ।
 परुवणा तेसि भवे, जीवाण-मजीवाण य ॥ 3 ॥
 रूविणो चेव अरूवी य, अजीवा दुविहा भवे ।
 अरूवी दसहा वुत्ता, रूविणो य चउव्विहा ॥ 4 ॥
 धम्मत्थि-काए तदेसे, तप्पएसे य आहिए ।
 अहम्मे तस्स देसे य, तप्पएसे य आहिए ॥ 5 ॥
 आगासे तस्स देसे य, तप्पएसे य आहिए ।
 अद्धा समए चेव, अरूवी दसहा भवे ॥ 6 ॥
 धम्माधम्मे य दो चेव, लोगमिन्ता वियाहिया ।
 लोगालोगे य आगासे, समए समय-खेत्तिए ॥ 7 ॥
 धम्माधम्मागासा, तिण्णि वि एए अणाइया ।
 अपज्जवसिया चेव, सव्वद्ध तु वियाहिया ॥ 8 ॥
 समए वि सन्तइ पप्प, एवमेव वियाहिए ।
 आएसं पप्प-साईए, सपज्ज-वसिए वि य ॥ 9 ॥
 खन्धा य खंधदेसा य, तप्पएसा तहेव य ।
 परमाणुणो य बोद्धव्वा, रूविणो य चउव्विहा ॥ 10 ॥
 एगत्तेण पुहुत्तेण, खधा य परमाणु य ।
 लोगेग-देसे लोए य, भइयव्वा ते उ खेतओ ॥ 11 ॥
 सुहुमा सव्व-लोगम्मि, लोग-देसे य बायरा ।
 इत्तो कालविभाग तु, तेसिं वुच्छ चउव्विहं ॥ 12 ॥

सन्तइं पप्प तेऽणाइ, अपज्जवसिया वि य।
ठिइं पडुच्च साईया, सपज्जवसिया वि य।।13।।
असंखकाल-मुक्कोसं, एगं समयं जहण्णयं।
अजीवाण य रूवीणं, ठिई एसा वियाहिया।।14।।
अणंतकाल-मुक्कोसं, एक्कं समयं जहण्णयं।
अजीवाण य रूवीणं, अन्तरेयं वियाहियं।।15।।
वण्णओ गंधओ चेव, रसओ फासओ तहा।
सण्ठाणओ य विण्णेओ, परिणामो तेसिं पंचहा।।16।।
वण्णओ परिणया जे उ, पंचहा ते पकित्तिया।
किण्हा णीला य लोहिया, हालिद्धा सुक्किला तहा।।17।।
गंधओ परिणया जे उ, दुविहा ते वियाहिया।
सुब्धिगन्ध. परिणामा, दुब्धिगन्धा तहेव य।।18।।
रसओ परिणया जे उ, पंचहा ते पकित्तिया।
तित्त-कडुय-कसाया, अम्बिला महुरा तहा।।19।।
फासओ परिणया जे उ, अड्डहा ते पकित्तिया।
कक्खडा मउया चेव, गुरुया लहुया तहा।।20।।
सीया उण्हा य णिद्धा य, तहा लुक्खा य आहिया।
इय फास परिणया एए, पुग्गला समुदाहिया।।21।।
सण्ठाणओ परिणया जे उ, पंचहा ते पकित्तिया।
परिमण्डला य वट्टा य, तंसा चउरन्स-मायया।।22।।
वण्णओ जे भवे किण्हे, भइए से उ गंधओ।
रसओ फासओ चेव, भइए सण्ठाणओ वि य।।23।।
वण्णओ जे भवे णीले, भइए से उ गंधओ।
रसओ फासओ चेव, भइए संठाणओ वि य।।24।।
वण्णओ लोहिए जे उ, भइए से उ गंधओ।
रसओ फासओ चेव, भइए संठाणओ वि य।।25।।

फासओ सीयए जे उ, भइए से उ वण्णओ।
 गंधओ रसओ चेव, भइए संटाणओ वि य॥39॥
 फासओ उण्हए जे उ, भइए से उ वण्णओ।
 गंधओ रसओ चेव, भइए संटाणओ वि य॥40॥
 फासओ णिद्धए जे उ, भइए से उ वण्णओ।
 गंधओ रसओ चेव, भइए संटाणओ वि य॥41॥
 फासओ लुक्खए जे उ, भइए से उ वण्णओ।
 गंधओ रसओ चेव, भइए संटाणओ वि य॥42॥
 परिमण्डल-सण्ठाणे, भइए से उ वण्णओ।
 गंधओ रसओ चेव, भइए फासओ वि य॥43॥
 संटाणओ भवे वट्टे, भइए से उ वण्णओ।
 गंधओ रसओ चेव, भइए फासओ वि य॥44॥
 सण्ठाणओ भवे तंसे, भइए से उ वण्णओ।
 गंधओ रसओ चेव, भइए फासओ वि य॥45॥
 सण्ठाणओ जे चउरन्से, भइए से उ वण्णओ।
 गंधओ रसओ चेव, भइए फासओ वि य॥46॥
 जे आयय सण्ठाणे, भइए से उ वण्णओ।
 गंधओ रसओ चेव, भइए फासओ वि य॥47॥
 एसा अजीव-विभत्ती, समासेण वियाहिया।
 इत्तो जीव-विभत्तिं, वुच्छामि अणुपुव्वसो॥48॥
 संसारत्था य सिद्धा य, दुविहा जीवा वियाहिया।
 सिद्धा-णेगविहा वुत्ता, तं मे कित्तयओ सुण॥49॥
 इत्थी पुरिस-सिद्धा य, तहेव य णपुंसगा।
 सलिंगे अण्णलिंगे य, गिहिलिंगे तहेव य॥50॥
 उक्को-सोगाहणाए य, जहण्ण मज्झिमाइ य।
 उड्डं अहे य तिरियं च, समुद्धम्मि जलम्मि य॥51॥

दस य णपुंसएसु, वीस इत्थियासु य ।

पुरिसेसु य अट्टसयं, समए-णेगेण सिज्झई ॥52॥

चत्तारि य गिहिलिगे, अण्णलिंगे दसेव य ।

सलिंगेण अट्टसय, समए-णेगेण सिज्झई ॥53॥

उक्को-सोगाहणाए य, सिज्झते जुगवं दुवे ।

चत्तारि जहण्णाए, जव-मज्झे अट्टुत्तर सय ॥54॥

चउ रुद्धलोए य दुवे समुद्दे, तओ जले वीसमहे तहेव य ।

सयं च अट्टुत्तरं तिरिय लोए, समए-णेगेण सिज्झई धुवं ॥55॥

कहिं पडिहया सिद्धा, कहि सिद्धा पइट्टिया ।

कहि बोन्दिं चइत्ताणं, कत्थ गन्तूण सिज्झई ॥56॥

अलोए पडिहया सिद्धा, लोयग्गे य पइट्टिया ।

इहं बोन्दिं चइत्ताणं, तत्थ गन्तूण सिज्झई ॥57॥

बारसहिं जोयणेहिं, सव्वट्टस्सुवरि भवे ।

ईसी-पब्भार-णामा उ, पुढवी छत्त-सण्ठिया ॥58॥

पणयाल-सय-सहस्सा, जोयणाणं तु आयया ।

तावइय चेव वित्थिण्णा, तिगुणो तस्सेव परिरओ ॥59॥

अट्टजोयण-बाहुल्ला, सा मज्झम्मि वियाहिया ।

परिहायन्ती चरिमन्ते, मच्छियपत्ताउ तणुयरी ॥60॥

अज्जुण-सुवण्णग-मई, सा पुढवी णिम्मला सहावेणं ।

उत्ताणग-छत्तग-सण्ठिया य, भणिया जिणवरेहि ॥61॥

संखक-कुन्द-सकासा, पण्डुरा णिम्मला सुहा ।

सीयाए जोयणे तत्तो, लोयन्तो उ वियाहिओ ॥62॥

जोयणस्स उ जो तत्थ, कोसो उवरिमो भवे ।

तस्स कोसस्स छब्भाए, सिद्धाणो-गाहणा भवे ॥63॥

तत्थ सिद्धा महाभागा, लोगग्गम्मि पइट्टिया ।

भव-प्पवंच-उम्मुक्का, सिद्धिं वरगइं गया ॥64॥

उस्सेहो जस्स जो होइ, भवम्मि चरिमम्मि उ ।
 तिभाग-हीणा ततो य, सिद्धाणो-गाहणा भवे ॥65॥
 एगत्तेण साईया, अपज्जवसिया वि य ।
 पुहुत्तेण अणाईया, अपज्जवसिया वि य ॥66॥
 अरूविणो जीवघणा, णाण-दंसण-सण्णिया ।
 अउलं सुहं सम्पत्ता, उवमा जस्स णत्थि उ ॥67॥
 लोगेग देसे ते सव्वे, णाण-दंसण-सण्णिया ।
 संसार पार-णित्थिण्णा, सिद्धिं वरगइं गया ॥68॥
 संसारत्था उ जे जीवा, दुविहा ते वियाहिया ।
 तसा य थावरा चेव, थावरा तिविहा तहिं ॥69॥
 पुढवी आउ जीवा य, तहेव य वणस्सई ।
 इच्चैए थावरा तिविहा, तेसिं भेए सुणेह मे ॥70॥
 दुविहा पुढवी जीवा य, सुहुमा बायरा तहा ।
 पज्जत्त-मपज्जत्ता, एवमेए दुहा पुणो ॥71॥
 बायरा जे उ पज्जत्ता, दुविहा ते वियाहिया ।
 सण्हा खरा य बोधव्वा, सण्हा सत्तविहा तहिं ॥72॥

किण्हा णीला य रुहिरा, हालिद्धा सुक्किला तहा ।
 पण्डु-पणग मट्टिया, खरा छत्तीसई विहा ॥73॥
 पुढवी य सक्करा बालुया य, उवले सिला य लोणूसे ।
 अय-तम्ब तउय-सीसग, रूप्प-सुवण्णे य वइरे य ॥74॥
 हरियाले हिंगुलुए, मणोसिला सासगंजण-पवाले ।
 अब्भ-पडलब्भ बालुए, बायरकाए मणिविहाणे ॥75॥
 गोमेज्जए य रुयगे, अंके फलिहे य लोहियक्खे य ।
 मरगय-मसारगल्ले, भुयमोयग-इन्द-णीले य ॥76॥
 चंदण-गेरुय-हंसगब्भे, पुलए सोगन्धिए य बोधव्वे ।
 चंदप्पह वेरुलिए, जलकन्ते सूरकन्ते य ॥77॥

ए ए खर पुढवीए, भेया छत्तीस-माहिया ।
 एगविह-मणाणत्ता, सुहुमा तत्थ वियाहिया ॥78॥
 सुहुमा सव्व लोगम्मि, लोग देसे य बायरा ।
 इत्तो कालविभागं तु, वुच्छं तेसिं चउव्विहं ॥79॥
 सन्तइं पप्प-णाईया, अपज्जव-सिया वि य ।
 ठिइं पडुच्च साईया, सपेज्जवसिया वि य ॥80॥
 बावीस-सहस्साइं, वासा-णुक्कोसिया भवे ।
 आउ-ठिई पुढवीणं, अन्तो-मुहुत्तं जहण्णिया ॥81॥
 असंखकाल-मुक्कोसं, अन्तो-मुहुत्तं जहण्णिया ।
 काय-ठिई पुढवीणं, तं कायं तु अमुंचओ ॥82॥
 अणंतकाल-मुक्कोसं, अन्तो मुहुत्तं जहण्णयं ।
 विजढम्मि सए काए, पुढवी जीवाण अन्तरं ॥83॥
 एएसिं वण्णओ चेव, गंधओ रस-फासओ ।
 सण्ठाणा-देसओ वावि, विहाणाइं सहस्ससो ॥84॥
 दुविहा आऊ जीवा उ, सुहुमा बायरा तहा ।
 पज्जत्त-मपज्जत्ता, एवमेए दुहा पुणो ॥85॥
 बायरा जे उ पज्जत्ता, पंचहा ते पकित्तिया ।
 सुद्धोदए य उस्से य, हरतणू महिया हिमे ॥86॥
 एगविह-मणाणत्ता, सुहुमा तत्थ वियाहिया ।
 सुहुमा सव्व-लोगम्मि, लोग देसे य बायरा ॥87॥
 सन्तइं पप्प-णाईया, अपज्जव-सिया वि य ।
 ठिइं पडुच्च साईया, सपेज्जवसिया वि य ॥88॥
 सत्तेव सहस्साइं, वासा-णुक्कोसिया भवे ।
 आउठिई आऊणं, अन्तो मुहुत्तं जहण्णिया ॥89॥
 असख-काल-मुक्कोसं, अन्तो मुहुत्तं जहण्णयं ।
 कायठिई आऊणं, तं कायं तु अमुंचओ ॥90॥

अणंत काल-मुक्कोसं, अन्तो मुहुत्तं जहण्णयं ।
 विजढम्मि सए काए, आऊ जीवाण अन्तर ॥११॥
 एएसिं वण्णओ चेव, गंधओ रस-फासओ ।
 सण्ठाणादेसओ वावि, विहाणाइं सहस्ससो ॥१२॥
 दुविहा वणस्सई जीवा, सुहुमा बायरा तहा ।
 पज्जत्त-मपज्जत्ता, एवमेए दुहा पुणो ॥१३॥
 बायरा जे उ पज्जत्ता, दुविहा ते वियाहिया ।
 साहारण-सरीरा य, पत्तेगा य तहेव य ॥१४॥
 पत्तेग सरीरा उ, ऽणेगहा ते पकित्तिया ।
 रुक्खा गुच्छा य गुम्मा य, लया वल्ली तणा तहा ॥१५॥
 वलया पव्वगा कुहुणा, जलरुहा ओसही तहा ।
 हरिय-काया उ बोधव्वा, पत्तेगाइ वियाहिया ॥१६॥
 साहारण सरीराओ, ऽणेगहा ते पकित्तिया ।
 आलुए मूलए चेव, सिंगवेरे तहेव य ॥१७॥
 हरिली सिरिली सिस्सिरिली, जावई-केय कंदली ।
 पलण्डु लसण-कंदे य, कन्दली य कुहुव्वए ॥१८॥
 लोहिणी हूयथी हूय, कुहगा य तहेव य ।
 कण्हे य वज्जकन्दे य, कन्दे सूरणए तहा ॥१९॥
 अस्स-कण्णी य बोधव्वा, सीह-कण्णी तहेव य ।
 मुसुण्ठी य हलिद्दा य, णेगहा एवमायओ ॥१००॥
 एगविह-मणाणत्ता, सुहुमा तत्थ वियाहिया ।
 सुहुमा सव्व-लोगम्मि, लोग-देसे य बायरा ॥१०१॥
 सन्तइं पप्प-णाईया, अपज्जव-सिया वि य ।
 ठिइं पडुच्च साईया, सपज्जव-सिया वि य ॥१०२॥
 दस चेव सहस्साइं, वासा-णुक्कोसिया भवे ।
 वणस्सईणं आउं तु, अंतो मुहुत्तं जहण्णियं ॥१०३॥

अणंत काल-मुक्कोस, अन्तो मुहुत्त जहणिया ।
 कायटिई पणगाणं, त काय तु अमुंचओ ॥104 ॥
 असंख काल-मुक्कोस, अन्तो मुहुत्त जहण्यं ।
 विजढम्मि सए काए, पणग जीवाण अन्तर ॥105 ॥
 एएसिं वण्णओ चेव, गंधओ रस-फासओ ।
 सण्ठाणादेसओ वावि, विहाणाइं सहस्ससो ॥106 ॥
 इच्चेए थावरा तिविहा, समासेण वियाहिया ।
 इत्तो उ तसे तिविहे, वुच्छामि अणुपुव्वसो ॥107 ॥
 तेऊ वाऊ य बोधव्वा, उराला य तसा तथा ।
 इच्चेए तसा तिविहा, तेसि भेए सुणेह मे ॥108 ॥
 दुविहा तेऊ जीवा उ, सुहुमा बायरा तथा ।
 पज्जत्त-मपज्जत्ता, एवमेए दुहा पुणो ॥109 ॥
 बायरा जे उ पज्जत्ता, णेगहा ते वियाहिया ।
 इंगाले मुम्मुरे अगणी, अच्चि-जालातहेव य ॥110 ॥
 उक्का विज्जू य बोधव्वा, णेगहा एव-मायओ ।
 एगविह-मणाणत्ता, सुहुमा ते वियाहिया ॥111 ॥
 सुहुमा सव्व-लोगम्मि, लोग-देसे य बायरा ।
 इत्तो काल-विभाग तु, तेसिं वुच्छं चउव्विह ॥112 ॥
 सन्तइं पप्प-णार्इया, अपज्जव-सिया वि य ।
 टिइं पडुच्च सार्इया, सपज्जव-सिया वि य ॥113 ॥
 तिण्णेव अहोरत्ता, उक्कोसेण वियाहिया ।
 आउटिई तेऊणं, अन्तो-मुहुत्तं जहणिया ॥114 ॥
 असंख काल-मुक्कोसं, अन्तो-मुहुत्तं जहणिया ।
 कायटिई तेऊणं, तं काय तु अमुचओ ॥115 ॥
 अणंत काल-मुक्कोसं, अन्तो-मुहुत्तं जहण्यं ।
 विजढम्मि सए काए, तेऊ जीवाण अन्तरं ॥116 ॥

एएसिं वण्णओ चेव, गंधओ रस-फासओ ।
 सण्ठाणादेसओ वावि, विहाणाइं सहस्ससो ॥117॥
 दुविहा वाउ जीवा उ, सुहुमा बायरा तहा ।
 पज्जत्त-मपज्जत्ता, एवमेए दुहा पुणो ॥118॥
 बायरा जे उ पज्जत्ता, पंचहा ते पकित्तिया ।
 उक्कलिया मण्डलिया, घणगुंजा सुद्धवाया य ॥119॥
 संवट्टग-वाया य, णेगविहा एव-मायओ ।
 एगविह-मणाणत्ता, सुहुमा तत्थ वियाहिया ॥120॥
 सुहुमा सव्व-लोगम्मि, लोग-देसे य बायरा ।
 इत्तो काल-विभागं तु, तेसिं वुच्छं चउव्विहं ॥121॥
 सन्तइं पप्प-णाईया, अपज्जवसिया वि य ।
 ठिइं पडुच्च साईया, सपज्जवसिया वि य ॥122॥
 तिण्णेव सहस्साइं, वासा-णुक्कोसिया भवे ।
 आउठिई वारुणं, अन्तो मुहुत्तं जहणिया ॥123॥
 असंख काल-मुक्कोसं, अन्तो मुहुत्तं जहणिया ।
 काय ठिई वारुणं, तं कायं तु अमुंचओ ॥124॥
 अणंत काल-मुक्कोसं, अन्तो मुहुत्तं जहण्णयं ।
 विजढम्मि सए काए, वारु-जीवाण अन्तरं ॥125॥
 एएसिं वण्णओ चेव, गंधओ रस-फासओ ।
 सण्ठाणादेसओ वावि, विहाणाइं सहस्ससो ॥126॥
 उराला य तसा जे उ, चउहा ते पकित्तिया ।
 बेइन्दिया तेइन्दिया, चउरो-पंचिन्दिया चेव ॥127॥
 बेइन्दिया उ जे जीवा, दुविहा ते पकित्तिया ।
 पज्जत्त-मपज्जत्ता, तेसिं भेए सुणेह मे ॥128॥
 किमिणो सोमंगला चेव, अलसा माइ-वाहया ।
 वासीमुहा य सिप्पीया, संखा संखणगा तहा ॥129॥

पल्लोयाणु-ल्लया चेव, तहेव य वराडगा ।
 जलूगा जालगा चेव, चंदणा य तहेव य ॥130॥
 इइ बेइन्दिया एए, ऽणेगहा एव-मायओ ।
 लोगेग-देसे ते सव्वे, ण सव्वत्थ वियाहिया ॥131॥
 सन्तइं पप्प-णाईया, अपज्जव-सिया वि य ।
 ठिइं पडुच्च साईया, सपज्जव-सिया वि य ॥132॥
 वासाइं बारसा चेव, उक्कोसेण वियाहिया ।
 बेइन्दिय आउ-ठिई, अन्तो मुहुत्तं जहणिया ॥133॥
 सखिज्ज काल-मुक्कोसं, अन्तो मुहुत्तं जहणिया ।
 बेइन्दिय काय-ठिई, तं कायं तु अमुंचओ ॥134॥
 अणंतं काल-मुक्कोसं, अन्तो मुहुत्तं जहणयं ।
 बेइन्दिय-जीवाणं, अन्तरेयं वियाहियं ॥135॥
 एएसिं वण्णओ चेव, गंधओ रस-फासओ ।
 सण्ठाणादेसओ वावि, विहाणाइ सहस्ससो ॥136॥
 तेइन्दिया उ जे जीवा, दुविहा ते पकित्तिया ।
 पज्जत्त-मपज्जत्ता, तेसिं भेए सुणेह मे ॥137॥
 कुंथु पिवीलि उडुंसा, उक्कलु-देहिया तहा ।
 तणहारा कट्टहारा य, मालूगा पत्तहारगा ॥138॥
 कप्पासट्ठि मिजा य, तिन्दुगा तउस-मिजगा ।
 सदावरी य गुम्मी य, बोधव्वा इंदकाइया ॥139॥
 इन्दगोवग-माईया, णेगहा एव-मायओ ।
 लोगेगदेसे ते सव्वे, ण सव्वत्थ वियाहिया ॥140॥
 सन्तइं पप्प-णाईया, अप्पज्जव-सिया वि य ।
 ठिइ पडुच्च साईया, सप्पज्जव-सिया वि य ॥141॥
 एगूण-पण्णहोरत्ता, उक्कोसेण वियाहिया ।
 तेइन्दिय आउ-ठिई, अन्तो-मुहुत्तं जहणिया ॥142॥

संखिज्ज-काल-मुक्कोसं, अन्तो-मुहुत्तं जहणिया ।
 तेइन्दिय काय-ठिई, तं कायं तु अमुंचओ ॥143॥
 अणंत काल-मुक्कोसं, अन्तो-मुहुत्तं जहण्यं ।
 तेइन्दिय-जीवाणं, अन्तरं तु वियाहियं ॥144॥
 एएसिं वण्णओ चेव, गधओ रस-फासओ ।
 सण्ठाणा देसओ वावि, विहाणाइं सहस्ससो ॥145॥
 चउरिन्दिया उ जे जीवा, दुविहा ते पकित्तिया ।
 पज्जत्त-मपज्जत्ता, तेसिं भेए सुणेह मे ॥146॥
 अंधिया पोत्तिया चेव, मच्छिया मसगा तहा ।
 भमरे कीड-पयंगे य, ढिंकुणे कुंकणे तहा ॥147॥
 कुक्कुडे सिंगिरीडी य, गंदावत्ते य विच्छिए ।
 डोले भिंंगिरीडी य, विरली अच्छि-वेहए ॥148॥
 अच्छिले माहए अच्छि-रोडए विचित्ते चित्तपत्तए ।
 ओहिंजलिया जलकारी य, णीयया तम्बगाइया ॥149॥
 इय चउरिन्दिया एए, णेग-विहा एव-मायओ ।
 लोगेगदेसे ते सव्वे, ण सव्वत्थ वियाहिया ॥150॥
 सन्तइं पप्प-णाईया, अपज्जव-सिया वि य ।
 ठिइं पडुच्च साईया, सपज्जवसिया वि य ॥151॥
 छच्चेव य मासाउ, उक्कोसण वियाहिया ।
 चउरिन्दिय आउठिई, अन्तो-मुहुत्तं जहणिया ॥152॥
 संखिज्ज काल-मुक्कोसं, अन्तो-मुहुत्तं जहण्यं ।
 चउरिन्दिय कायठिई, तं कायं तु अमुंचओ ॥153॥
 अणंतकाल-मुक्कोसं, अन्तो-मुहुत्तं जहण्यं ।
 विजढम्मि सए काए, अन्तरेयं वियाहियं ॥154॥
 एएसिं वण्णओ चेव, गंधओ रस-फासओ ।
 सण्ठाणा देसओ वावि, विहाणाइं सहस्ससो ॥155॥

तेत्तीस-सागरा ऊ, उक्कोसेण वियाहिया ।
 सत्तमाए जहण्णेण, बावीसं सागरोवमा ॥169॥
 जा चेव य आउ टिई, णेरइयाणं वियाहिया ।
 सा तेसिं काय-टिई, जहण्णु-क्कोसिया भवे ॥170॥
 अणंत काल-मुक्कोसं, अन्तो-मुहुत्तं जहण्णय ।
 विजढम्मि सए काए, णेरइयाणं तु अन्तरं ॥171॥
 एएसिं वण्णओ चेव, गंधओ रस-फासओ ।
 सण्ठाणा देसओ वावि, विहाणाइं सहस्सओ ॥172॥
 पंचिन्दिय तिरिक्खाओ, दुविहा ते वियाहिया ।
 सम्मुच्छिम-तिरिक्खाओ, गब्भ वक्कन्तिया तहा ॥173॥
 दुविहा ते भवे तिविहा, जलयरा थलयरा तहा ।
 णहयरा य बोधव्वा, तेसिं भेए सुणेह मे ॥174॥
 मच्छा य कच्छभा य, गाहा य मगरा तहा ।
 सुंसुमारा य बोधव्वा, पंचहा जलयराहिया ॥175॥
 लोगेगदेसे ते सव्वे, ण सव्वत्थ वियाहिया ।
 इत्तो कालविभागं तु, तेसिं वोच्छं चउव्विहं ॥176॥
 सन्तइं पप्प-णाईया, अपज्जवसिया वि य ।
 टिइं पडुच्च साईया, सपज्जवसिया वि य ॥177॥
 एगा य पुव्वकोडीओ, उक्कोसेण वियाहिया ।
 आउटिई जलयराणं, अन्तो-मुहुत्तं जहण्णिया ॥178॥
 पव्वकोडी पुहुत्तं तु, उक्कोसेण वियाहिया ।
 कायटिई जलयराणं, अन्तो-मुहुत्तं जहण्णयं ॥179॥
 अणंतकाल-मुक्कोस, अन्तो-मुहुत्तं जहण्णयं ।
 विजढम्मि सए काए, जलयराणं अन्तरं ॥180॥
 एएसिं वण्णओ चेव, गंधओ रस-फासओ ।
 सण्ठाणा देसओ वावि, विहाणाइं सहस्सओ ॥181॥

चउप्पया य परिसप्पा, दुविहा थलयरा भवे।
 चउप्पया चउविहा, ते मे कित्तयओ सुण॥182॥
 एगखुरा दुखुरा चेव, गण्डीपया सणप्पया।
 हयमाइ गोणमाइ, गयमाइ सीहमाइणो॥183॥
 भुओरग-परिसप्पा य, परिसप्पा दुविहा भवे।
 गोहाई अहिमाई य, एक्केक्का ऽणेगहा भवे॥184॥
 लोएग-देसे ते सव्वे, ण सव्वत्थं वियाहिया।
 इत्तो काल-विभाग तु, तेसिं वोच्छं चउव्विह॥185॥
 सन्तइं पप्प-णाईया, अपज्जव-सिया वि य।
 टिइ पडुच्च साईया, सपज्जव-सिया वि य॥186॥
 पलिओवमाइं तिण्णि उ, उक्कोसेण वियाहिया।
 आउटिई थलयराणं, अन्तो-मुहुत्तं जहण्णिया॥187॥
 पुव्वकोडी पुहुत्तेणं, अन्तो-मुहुत्तं जहण्णिया।
 कायटिई थलयराणं, अन्तरं तेसिमं भवे॥188॥
 अणत काल-मुक्कोसं अन्तो-मुहुत्तं जहण्णय।
 विजढम्मि सए काए, थलयराणं तु अन्तर॥189॥
 एएसिं वण्णओ चेव, गधओ रस-फासओ।
 सण्ठाणा देसओ वावि, विहाणाइं सहस्सओ॥190॥
 चम्मे उ लोमपक्खी य, तइया समुग्ग-पक्खिया।
 विययपक्खी य बोधव्वा, पक्खिणो य चउव्विहा॥191॥
 लोगेग देसे ते सव्वे, ण सव्वत्थं वियाहिया।
 इत्तो काल-विभाग तु, तेसिं वोच्छं चउव्विहं॥192॥
 सन्तइ पप्प-णाईया, अपज्जव-सिया वि य।
 टिइं पडुच्च साईया, सपज्जव-सिया वि य॥193॥
 पलिओवमस्स भागो, असखेज्ज इमो भवे।
 आउटिई खहयराणं, अन्तो-मुहुत्तं जहण्णिया॥194॥

असखभागो पलियस्स, उक्कोसेण उ साहिया ।
 पुव्वकोडी पुहुत्तेणं, अन्तो-मुहुत्तं जहण्णिया ॥195॥
 कायठिई खहयराणं, अन्तरं तेसिम भवे ।
 अणतकाल-मुक्कोसं, अन्तो-मुहुत्तं जहण्णयं ॥196॥
 एएसिं वण्णओ चेव, गंधओ रस-फासओ ।
 सण्ठाणा देसओ वावि, विहाणाइं सहस्ससो ॥197॥
 मणुया दुविह भेया उ, ते मे कित्तयओ सुण ।
 सम्मुच्छिमा य मणुया, गब्भ-वक्कन्तिया तथा ॥198॥
 गब्भ-वक्कन्तिया जे उ, तिविहा ते वियाहिया ।
 कम्म-अकम्म-भूमा य, अन्तर दीवया तथा ॥199॥
 पण्णरस तीसइविहा, भेया दु-अट्ट-वीसइं ।
 संखा उ कमसो तेसिं, इइ एसा वियाहिया ॥200॥
 सम्मुच्छिमाण एसेव, भेओ होइ वियाहिओ ।
 लोगस्स एग-देसम्मि, ते सव्वे वि वियाहिया ॥201॥
 सन्तइं पप्प-णाईया, अपज्जव-सिया वि य ।
 ठिइ पडुच्च साईया, सपज्जव-सिया वि य ॥202॥
 पलिओवमाइ तिण्णि उ, उक्कोसेण वियाहिया ।
 आउठिई मणुयाणं, अन्तो-मुहुत्तं जहण्णिया ॥203॥
 पलिओवमाइ तिण्णि उ, उक्कोसेण वियाहिया ।
 पुव्वकोडि पुहुत्तेणं, अन्तो-मुहुत्तं जहण्णिया ॥204॥
 कायठिई मणुयाणं, अन्तरं तेसिमं भवे ।
 अणंतकाल-मुक्कोसं, अन्तो-मुहुत्तं जहण्णयं ॥205॥
 एएसि वण्णओ चेव, गंधओ रस-फासओ ।
 सण्ठाणा-देसओ वावि, विहाणाइं सहस्ससो ॥206॥
 देवा चउव्विहा वुत्ता, ते मे कित्तयओ सुण ।
 भोमिज्ज वाणमंतर, जोइस वेमाणिया तथा ॥207॥

दसहा उ भवणवासी, अट्टहा वणचारिणो ।
 पंचविहा जोइसिया, दुविहा वेमाणिया तहा ॥208 ॥
 असुरा णाग-सुवण्णा, विज्जू अग्गी य वियाहिया ।
 दीवोदहि दिसा वाया, थणिया भवण-वासिणो ॥209 ॥
 पिसाय-भूया जक्खा य, रक्खसा किण्णरा किपुरिसा ।
 महोरगा य गन्धव्वा, अट्टविहा वाणमन्तरा ॥210 ॥
 चदा सूरा य णक्खत्ता, गहा तारागणा तहा ।
 ठिया वि चारिणो चेव, पंचहा जोइसालया ॥211 ॥
 वेमाणिया उ जे देवा, दुविहा ते वियाहिया ।
 कप्पोवगा य बोधव्वा, कप्पाईया तहेव य ॥212 ॥
 कप्पोवगा य बारसहा, सोहम्मीसाणगा तहा ।
 सणकुमार माहिदा, बम्भलोगा य लन्तगा ॥213 ॥
 महासुक्का सहस्सारा, आणया पाणया तहा ।
 आरणा अच्चुया चेव, इइ कप्पोवगा सुरा ॥214 ॥
 कप्पाईया उ जे देवा, दुविहा ते वियाहिया ।
 गेविज्जा-णुत्तरा चेव, गेविज्जा णवविहा तहि ॥215 ॥
 हेट्टिमा-हेट्टिमा चेव, हेट्टिमा मज्झिमा तहा ।
 हेट्टिमा उवरिमा चेव, मज्झिमा हेट्टिमा तहा ॥216 ॥
 मज्झिमा-मज्झिमा चेव, मज्झिमा-उवरिमा तहा ।
 उवरिमा-हेट्टिमा चेव, उवरिमा-मज्झिमा तहा ॥217 ॥
 उवरिमा-उवरिमा चेव, इय गेविज्जगा सुरा ।
 विजया वेजयन्ता य, जयन्ता अपराजिया ॥218 ॥
 सव्वट्ट सिद्धगा चेव, पचहाणुत्तरा सुरा ।
 इय वेमाणिया देवा, णेगहा एवमायओ ॥219 ॥
 लोगस्स एग-देसम्मि, ते सव्वे वि वियाहिया ।
 इत्तो कालविभाग तु, तेसि वोच्छ चउव्विह ॥220 ॥

सन्तइं पप्प-णार्इया, अपज्जवसिया वि य।
 ठिइं पडुच्च साईया, सपज्जवसिया वि य।।221।।
 साहियं सागरं इक्कं, उक्कोसेण ठिई भवे।
 भोमेज्जाणं जहण्णेणं, दसवास-सहस्सिया।।222।।
 पलिओवम-दो ऊणा, उक्कोसेण वियाहिया।
 असुरिन्दवज्जित्ताणं, जहण्णा दस सहस्सगा।।223।।
 पलिओवम-मेगं तु, उक्कोसेण ठिई भवे।
 वन्तराण जहण्णेणं, दसवास-सहस्सिया।।224।।
 पलिओवम-मेगं तु, वासलक्खेण साहियं।
 पलिओव-मड्ड भागो, जोइसेसु जहण्णिया।।225।।
 दो चेव सागराईं, उक्कोसेण वियाहिया।
 सोहम्मम्मि जहण्णेणं, एगं य पलिओवम।।226।।
 सागरा साहिया दुण्णि, उक्कोसेण वियाहिया।
 ईसाणम्मि जहण्णेणं, साहियं पलिओवमं।।227।।
 सागराणि य सत्तेव, उक्कोसेण ठिई भवे।
 सणंकुमारे जहण्णेणं, दुण्णि उ सागरोवमा।।228।।
 साहिया सागरा सत्त, उक्कोसेण ठिई भवे।
 माहिन्दम्मि जहण्णेणं, साहिया दुण्णि सागरा।।229।।
 दस चेव सागराईं, उक्कोसेण ठिई भवे।
 बम्भलोए जहण्णेणं, सत्त उ सागरोवमा।।230।।
 चउद्दस सागराईं, उक्कोसेण ठिई भवे।
 लंतगम्मि जहण्णेणं, दस उ सागरोवमा।।231।।
 सत्तरस सागराईं, उक्कोसेण ठिई भवे।
 महासुक्के जहण्णेणं, चउद्दस सागरोवमा।।232।।
 अट्टारस सागराईं, उक्कोसेण ठिई भवे।
 सहस्सारम्मि जहण्णेणं, सत्तरस सागरोवमा।।233।।

सागरा अउणवीसं तु, उक्कोसेण ठिई भवे ।
 आणयम्मि जहण्णेणं, अट्टारस सागरोवमा ॥234 ॥
 वीस तु सागराइ, उक्कोसेण ठिई भवे ।
 पाणयम्मि जहण्णेण, सागरा अउणवीसई ॥235 ॥
 सागरा इक्कवीस तु, उक्कोसेण ठिई भवे ।
 आरणम्मि जहण्णेण, वीसई सागरोवमा ॥236 ॥
 बावीस सागराइं, उक्कोसेण ठिई भवे ।
 अच्चुयम्मि जहण्णेणं, सागरा इक्कवीसई ॥237 ॥
 तेवीस सागराइं, उक्कोसेण ठिई भवे ।
 पढमम्मि जहण्णेण, बावीसं सागरोवमा ॥238 ॥
 चउवीस सागराइं, उक्कोसेण ठिई भवे ।
 बिइयम्मि जहण्णेणं, तेवीस सागरोवमा ॥239 ॥
 पणवीस सागराइ, उक्कोसेण ठिई भवे ।
 तइयम्मि जहण्णेण, चउवीसं सागरोवमा ॥240 ॥
 छव्वीस सागराइं, उक्कोसेण ठिई भवे ।
 चउत्थम्मि जहण्णेण, सागरा पणवीसई ॥241 ॥
 सागरा सत्तवीसं तु, उक्कोसेण ठिई भवे ।
 पचमम्मि जहण्णेण, सागरा उ छवीसई ॥242 ॥
 सागरा अट्टवीस तु, उक्कोसेण ठिई भवे ।
 छट्टम्मि जहण्णेणं, सागरा सत्तवीसई ॥243 ॥
 सागरा अउणतीस तु, उक्कोसेण ठिई भवे ।
 सत्तमम्मि जहण्णेण, सागरा अट्टवीसई ॥244 ॥
 तीस तु सागराइ, उक्कोसेण ठिई भवे ।
 अट्टमम्मि जहण्णेणं, सागरा अउणतीसई ॥245 ॥
 सागरा इक्कतीस तु, उक्कोसेण ठिई भवे ।
 णवमम्मि जहण्णेण, तीसई सागरोवमा ॥246 ॥

तत्तासा सागराइ, उक्कासण ठिइ भवे ।
 चउसुं वि विजयाईसु, जहण्णे-णेक्क-तीसई ॥247॥
 अजहण्ण-मणुक्कोसा, तेत्तीसं सागरोवमा ।
 महाविमाणे-सव्वट्टे, ठिई एसा वियाहिया ॥248॥
 जा चेव उ आउठिई, देवाणं तु वियाहिया ।
 सा तेसिं काय ठिई, जहण्णुक्कोसिया भवे ॥249॥
 अणंतकाल-मुक्कोसं, अन्तो-मुहुत्तं जहण्णयं ।
 विजंढम्मि सए काए, देवाणं हुज्ज अन्तर ॥250॥
 अणंत काल-मुक्कोसं, वासपुहुत्तं जहण्णयं ।
 आणयाईण कप्पाणं देवाणं, गेविज्जाणं तु अन्तरं ॥251॥
 सखिज्ज सागरुक्कोसं, वासपुहुत्तं जहण्णय ।
 अणुत्तराणं देवाणं, अन्तरेयं वियाहिय ॥252॥
 एएसिं वण्णओ चेव, गंधओ रस-फासओ ।
 सण्ठाणा-देसओ वावि, विहाणाइं सहस्ससो ॥253॥
 संसारत्था य सिद्धा य, इय जीवा वियाहिया ।
 रूविणो चेवारूवी य, अजीवा दुविहा वि य ॥254॥
 इय जीव-मजीवे य, सोच्चा सद्दहिऊण य ।
 सव्व-णयाण-मणुमए, रमेज्ज संजमे मुणी ॥255॥
 तओ बहूणि वासाणि, सामण्ण-मणुपालिया ।
 इमेण कम्म-जोगेण, अप्पाणं संलिहे-मुणी ॥256॥
 बारसेव उ वासाइं, संलेहुक्कोसिया भवे ।
 संवच्छरं मज्झिमिया, छम्मासा य जहण्णिया ॥257॥
 पढमे वास चउक्कम्मि, विगई णिज्जूहणं करे ।
 बिइए वास चउक्कम्मि, विचित्तं तु तव चरे ॥258॥
 एगन्तर-मायामं, कट्टु संवच्छरे दुवे ।
 तओ संवच्छरद्ध तु, णाइविगिह्वं तवं चरे ॥259॥

तओ सवच्छरद्धं तु, विगिद्धं तु तव चरे।
 परिमिय चेव आयाम, तम्मि संवच्छरे करे।।260।।
 कोडी सहिय-मायामं, कट्टु सवच्छरे मुणी।
 मासद्ध-मासिएणं तु, आहारेण तव चरे।।261।।
 कंदप्प-माभिओगं य, किव्विसिय मोह-मासुरत्त च।
 एयाओ दुग्गईओ, मरणम्मि विराहिया होन्ति।।262।।
 मिच्छा-दंसण-रत्ता, सणियाणा हु हिसगा।
 इय जे मरंति जीवा, तेसिं पुण दुल्लहा बोही।।263।।
 सम्मद्धंसण रत्ता, अणियाणा सुक्कलेस-मोगाढा।
 इय जे मरति जीवा, तेसि सुलहा भवे बोही।।264।।
 मिच्छा-दंसण-रत्ता, सणियाणा कण्हेलेस-मोगाढा।
 इय जे मरंति जीवा, तेसि पुण दुल्लहा बोही।।265।।
 जिणवयणे अणुरत्ता, जिणवयण जे करेन्ति भावेण।
 अमला असकिलिद्धा, ते होन्ति परित्त-संसारी।।266।।
 बाल मरणाणि बहुसो, अकाम मरणाणि चेव य बहूयाणि।
 मरिहन्ति ते वराया, जिणवयण जे ण जाणन्ति।।267।।
 बहु आगम-विण्णाणा, समाहि-उप्पयगा य गुणगाही।
 एएणं कारणेण, अरिहा आलोयण सोउ।।268।।
 कन्दप्प-कुक्कयाइ तह, सील सहाव-हास विगहाहि।
 विम्हावेन्तो य पर, कदप्प भावण कुणइ।।269।।
 मता जोग काउ, भूईकम्म य जे पउजति।
 साय-रस-इद्धि हेउं, अभिओग भावण कुणइ।।270।।
 णाणस्स केवलीण, धम्मायरियस्स सघ साहूण।
 माई अवण्णवाई, किव्विसिय भावण कुणइ।।271।।
 अणुबद्ध-रेस पसरो, तह य णिमित्तम्मि होइ पडिसेवी।
 एएहि कारणेहि, आसुरिय भावण कुणइ।।272।।

सत्थगहणं विसभक्खणं य, जलणं य जलपवेसो य।
अणायार भण्डसेवी, जम्मण-मरणाणि बंधन्ति ॥273॥

इइ पाउकरे बुद्धे, णायए परिणिव्वुए।

छत्तीसं उत्तरज्झाए, भवसिद्धिय सम्मए ॥274॥

गाथा नम्बर 223 बहुत-सी प्रतियों मे नहीं है, किसी प्रति मे है। इसलिए यहाँ दे दी गई है।

॥ तिबेमि ॥ जीवाजीवविभत्ती-अज्झयण-समत्तं ॥

॥ इति उत्तराज्झयणं-सुत्तं-समत्तं ॥

XX

णमा सिद्धाणं

सिरि नन्दी सूत्तं

जयइ जग-जीव-जोणी वियाणओ, जग-गुरु जगाणंदो।

जग-णाहो जग-बधू, जयइ जगप्पिया महो भयव ॥1॥

जयइ सुयाण पभवो, तित्थयराण अपच्छिमो जयइ।

जयइ गुरु लोगाणं, जयइ महप्पा महावीरो ॥2॥

भदं सव्व-जगुज्जोयगस्स, भदं जिणस्स वीरस्स।

भदं सुरासुर णमंसियस्स, भदं धुयकम्मरयस्स ॥3॥

गुण-भवण-गहण सुय-रयण-भरिय दसण विसुद्ध-रत्थागा।

सघ-णगर ! भद ते, अखड चारित्त-पागारा ॥4॥

सजम-तव-तुबारयस्स, णमो सम्मत्त-पारियल्लस्स।

अप्पडिचक्कस्स जओ, होउ सया संघ-चक्कस्स ॥5॥

भदं सील-पडागूसियस्स, तव-णियम-तुरय-जुत्तस्स ।
 संघ-रहस्स भगवओ, सज्झाय-सुणन्दि-घोसस्स ॥ 6 ॥
 कम्मरय-जलोह-विणिग्गयस्स, सुयरयण-दीहणालस्स ।
 पच्च-महव्वय-थिर-कण्णियस्स, गुणकेसरालस्स ॥ 7 ॥
 सावग-जण-महुयरी-परिवुडस्स, जिण-सूर-तेय-बुद्धस्स ।
 सघ-पउमस्स भदं, समण-गण-सहस्स-पत्तस्स ॥ 8 ॥
 तव-सजममय लंछण, अकिरिय-राहु-मुह-दुद्धरिस णिच्चं ।
 जय सघ-चंद ! णिम्मल, सम्मत्त-विसुद्ध-जोणहागा ॥ 9 ॥
 पर-तित्थिय-गह-पहणासगस्स, तवतेय-दित्त-लेसस्स ।
 णाणु-ज्जोयस्स जए, भदं दम-संघ-सूरस्स ॥ 10 ॥
 भद धिइ-वेला-परिगयस्स, सज्झाय-जोग-मगरस्स ।
 अक्खोहस्स भगवओ, संघ-समुद्दस्स रुदस्स ॥ 11 ॥
 सम्म-दंसण-वर-वइर-दढ-रूढ-गाढावगाढ-पेढस्स ।
 धम्म-वर-रयण-मंडिय, चामीयर-मेहलागस्स ॥ 12 ॥
 णिय-मूसिय-कणय-सिलाय-लुज्जल-जलंत-चित्तकूडस्स ।
 णदण-वण-मणहर-सुरभि-सील-गधुद्धु-मायस्स ॥ 13 ॥
 जीवदया-सुदर-कद-रुद्धरिय-मुणिवर-मइद-इण्णस्स ।
 हेउ-सय-धाउ-पगलत, रयण-दित्तोसहि-गुहस्स ॥ 14 ॥
 सवर-वर-जल-पगलिय-उज्झर-प्पविराय-माणहारस्स ।
 सावग-जण-पउर-रवंत-मोर-णच्चत-कुहरस्स ॥ 15 ॥
 विणय-णयपवर-मुणिवर, फुरत-विज्जुज्जलत-सिहरस्स ।
 विविह-गुण-कप्प-रुक्खग, फलभर-कुसुमाउल-वणस्स ॥ 16 ॥
 णाण-वर-रयण-दिप्पत, कत-वेरुलिय-विमल-चूलस्स ।
 वदामि विणय-पणओ, सघ-महामंदर-गिरिस्स ॥ 17 ॥
 गुण-रयणुज्जल कडय, सील-सुगधि-तव-मडि-उद्देस ।
 सुय-बारसग-सिहर, सघ-महामदर वदे ॥ 18 ॥

णगर-रह-चक्क-पउमे, चंदे सूरे समुद्द-मेरुम्मि।

जो उवमिज्जइ सययं, तं संघ-गुणायरं वंदे।।19।।

वंदे उसभं अजियं, संभव-मभिणंदण-सुमइ-सुप्पम-सुपासं।

ससि-पुप्फदंत सीयल-सिज्जंसं वासुपुज्जं च।।20।।

विमल-मणंतं च धम्मं संति, कुंथुं अरं च मल्लिं च।

मुनिसुव्वय णमि णेमिं, पासं तह वद्धमाणं च।।21।।

पढमित्थ इंदभूर्इ, बीए पुण होइ अग्गिभूइत्ति।

तइए य वाउभूर्इ, तओ वियत्ते सुहम्मे य।।22।।

मडिय-मोरियपुत्ते, अकंपिए चेव अयलभाया य।

मेयज्जे य पहासे, गणहरा हुंति वीरस्स।।23।।

णिव्वुइ-पह-सासणयं, जयइ सया सव्व-भाव-देसणयं।

कुसमय मय-णासणयं, जिणिंद-वर-वीर-सासणय।।24।।

सुहम्मं अग्गिवेसाण, जम्बूणामं च कासवं।

पभवं कच्चायणं वंदे, वच्छं सिज्जं-भवं तहा।।25।।

जसभदं तुंगयिं वंदे, संभूयं चेव माढरं।

भद्वबाहुं च पाइण्णं, थूलभदं च गोयमं।।26।।

एलावच्चसगोत्तं, वदामि महागिरि सुहत्थिं च।

तत्तो कोसियगोत्तं, बहुलस्स सरिव्वयं वंदे।।27।।

हारिय-गुत्तं साइं च, वंदिमो हारियं च सामज्जं।

वंदे कोसियगोत्तं, संडिल्लं अज्जजीयधरं।।28।।

ति-समुद्द-खाय-कित्तिं, दीव-समुद्देषु गहिय-पेयाल।

वंदे अज्जसमुद्दं, अक्खुभिय-समुद्द-गंभीर।।29।।

भणगं करगं झरग, पभावगं णाण-दंसण-गुणाणं।

वंदामि अज्जमंगुं, सुय-सागर-पारगं धीरं।।30।।

वदामि अज्जधम्मं, तत्तो वंदे य भद्वगुत्तं च।

तत्तो य अज्जवइरं, तव-णियम-गुणेहिं वइरसमं।।31।।

वंदामि अज्ज-रक्खिय-खमणे, रक्खिय-चरित्त सव्वस्से।
 रयण-करडग-भूओ, अणुओगो रक्खिओ जेहि ।।32।।
 णाणम्मि दंसणम्मि य, तवविणए णिच्च-काल-मुज्जुत्तं।
 अज्जं णंदिलखमण, सिरसा वंदे पसण्णमण ।।33।।
 वड्डुउ वायगवंसो, जसवंसो अज्ज-णागहत्थीण।
 वागरण-करण-भंगिय, कम्मप्पयडी-पहाणाण ।।34।।
 जच्चजण-घाउ-सम-प्पहाण, मुद्धिय-कुवलय-णिहाण।
 वड्डुउ वायगवसो, रेवइ-णक्खत्त-णामाण ।।35।।
 अयलपुरा णिक्खते, कालिय-सुय-अणुओगिए धीरे।
 बंभद्दीवग-सीहे, वायग-पय-मुत्तमं पत्ते ।।36।।
 जेसिं इमो अणुओगो, पयरइ अज्जावि अड्ड भरहम्मि।
 बहु-णयर-णिग्गय-जसे, ते वदे खदिलायरिए ।।37।।
 तत्तो हिमवंत-महंत-विक्कमे, धिइ-परक्कम-मणते।
 सज्झाय-मणंतधरे, हिमवंते वदिमो सिरसा ।।38।।
 कालिय-सुय-अणुओगस्स, धारए धारए य पुव्वाणं।
 हिमवत खमासमणे, वंदे णागज्जुणायरिए ।।39।।
 मिउ-मद्दव-सपण्णे, आणुपुव्वि वायगत्तण पत्ते।
 ओह-सुय-समायारे, णागज्जुण-वायए वदे ।।40।।
 गोविदाणं पि णमो, अणुओगे विउल-धारिणिदाणं।
 णिच्चं खंतिदयाण, परूवणे दुल्लभिदाण ।।41।।
 तत्तो य भूयदिण्णं, णिच्चं तवसजमे अणिविण्णं।
 पडियजण-सम्माण, वंदामो सजम-विहिण्णू ।।42।।
 वर-कणग-तविय चंपग, विमउल-वर-कमल-गब्भ-सरिवण्णे।
 भविय-जण-हियय-दइए, दया-गुण-विसारए धीरे ।।43।।
 अड्ड भरह-प्पहाणे, बहुविह-सज्झाय-सुमुणिय-पहाणे।
 अणुओगिय-वर-वसभे, णाइल-कुल-वस-णदीकरे ।।44।।

जग भूय-हियप्पगम्भे, वंदेऽहं भूयदिण्णमायरिए।

भव-भय-वुच्छेय-करे, सीसे णागज्जुण-रिसीणं ॥45॥

सुमुणिय-णिच्चाणिच्चं, सुमुणिय-सुत्तत्थधारयं वंदे।

सब्भावुब्भावणया तत्थं, लोहिच्च-णामाणं ॥46॥

अत्थ-महत्यक्खाणिं, सुसमण-वक्खाण-कहण-णिव्वाणिं।

पयईए महुरवाणिं, पयओ पणमामि दूसगणिं ॥47॥

तव-णियम-सच्च-संजम, -विणयज्जव-खंति मद्दव-रयाणं।

सील गुण-गद्धियाणं, अणुओग-जुग-प्पहाणाणं ॥48॥

सुकुमाल-कोमल-तले, तेसिं पणमामि लक्खण-पसत्थे।

पाए पावयणीणं, पडिच्छय-सयएहि पणिवइए ॥49॥

जे अण्णे भगवंते, कालिय-सुय-आणुओगिए धीरे।

ते पणमिऊण सिरसा, णाणस्स परूवणं वोच्छं ॥50॥

सेलघण, कुडग, चालणि, परिपुण्णग, हस महिस, मेसे य।

मसग, जलूग, बिराली, जाहग, गो, भेरी, आभीरी ॥51॥

सा समासओ तिविहा पण्णत्ता, तंजहा-जाणिया, अजाणिया,

दुव्वियड्डा। जाणिया जहा-

खीरमिव जहा हंसा, जे घुट्ठंति इह गुरुगुण समिद्धा।

दोसे य विवज्जंति, त जाणसु जाणियं परिसं ॥52॥

अजाणिय जहा-

होइ पगइमहुरा, मियछावय-सीह-कुक्कुडय भूआ।

रयणमिव असंठविया, अजाणिया सा भवे परिसा ॥53॥

दुव्वियड्डा तहा-

ण य कत्थइ णिम्माओ, ण य पुच्छइ परिभवस्स दोसेणं।

वत्थिव्व वायपुण्णो, फुट्टइ गामिल्लय वियड्डो ॥54॥

सूत्र - 1 णाणं पंचविहं पण्णत्तं तंजहा-आभिणिबोहिय णाणं,
सुयणाण, ओहिणाणं, मणपज्जव णाणं, केवलणाण ॥

सूत्र - 2 त समासओ दुविह पण्णत्तं, तजहा-पच्चक्खं च परोक्ख च ॥

सूत्र - 3 से किं तं पच्चक्ख ? पच्चक्ख दुविहं पण्णत्त, तजहा-इन्दिय-पच्चक्ख, णोइन्दिय-पच्चक्ख च ॥

सूत्र - 4 से किं त इन्दिय-पच्चक्ख ? इन्दिय-पच्चक्खं पंचविह पण्णत्तं, तंजहा-सोइन्दिय-पच्चक्ख, चक्खिन्दिय-पच्चक्खं, घाणिन्दिय-पच्चक्खं, जिब्भिन्दिय-पच्चक्ख, फासिन्दिय-पच्चक्खं, से तं इन्दिय-पच्चक्खं ॥

सूत्र - 5 से किं तं णोइन्दिय-पच्चक्ख ? णोइन्दिय-पच्चक्खं तिविहं पण्णत्त, तजहा-ओहिणाण-पच्चक्खं मणपज्जव-णाण-पच्चक्खं, केवलणाण-पच्चक्खं ॥

सूत्र - 6 से किं तं ओहिणाण-पच्चक्खं ? ओहिणाण-पच्चक्खं दुविह पण्णत्त, तंजहा-भवपच्चइयं च खओवसमिय च ॥

सूत्र - 7 से किं तं भवपच्चइय ? भवपच्चइय दुण्ह, तजहा-देवाण य णेरइयाणं य ॥

सूत्र - 8 से किं त खओवसमियं ?

खओवसमियं दुण्हं, तंजहा-मणुस्साण य, पंचिदिय-तिरिक्ख-जोणियाणं य । को हेऊ खाओवसमियं ? खओवसमिय तयावरणिज्जाण कम्माण उदिण्णाण खएणं अणुदिण्णाण उवसमेणं ओहिणाणं समुप्पज्जइ ॥

सूत्र - 9 अहवा गुणपडिवण्णस्स अणगारस्स ओहिणाणं समुप्पज्जइ । त समासओ छव्विह पण्णत्तं, तजहा-आणुगामियं, अणाणुगामियं, वड्डमाणयं, हीयमाणय, पडिवाइयं, अपडिवाइयं ।

सूत्र - 10 से किं तं आणुगामिय ओहिणाण ? आणुगामियं ओहिणाणं दुविह पण्णत्तं, तंजहा-अंतगय च, मज्झगय च ।

से किं तं अंतगय ? अंतगय तिविहं पण्णत्तं, तजहा-पुरओ अंतगय, मग्गओ अंतगय, पासओ अंतगयं ।

ओहिणाणं अप्पसत्थेहि अज्झवसाय-द्वाणेहिं वट्टमाणस्स वट्टमाण-
चरित्तस्स संकिलिस्स-माणस्स संकिलिस्समाण-चरित्तस्स सब्बओ
समंता ओही परिहायइ । से त्तं हीयमाणयं ओहिणाण ॥

सूत्र - 14 से किं त पडिवाइ ओहिणाण ? पडिवाइ ओहिणाण
जहण्णेण अंगुलस्स-असखिज्जइ भागं वा सखिज्जइ भाग वा,
वालग्गं वा, वालग्ग-पुहुत्तं वा, लिक्ख वा लिक्ख-पुहुत्तं वा, जूय वा
जूय-पुहुत्तं वा, जवं वा जवपुहुत्त वा, अगुलं वा अंगुल-पुहुत्त वा, पाय
वा पायपुहुत्तं वा, विहत्थिं वा विहत्थिपुहुत्तं वा, रयणि वा रयणिपुहुत्त
वा, कुच्छि वा कुच्छिपुहुत्तं वा, धणु वा धणुपुहुत्तं वा, गाउयं वा
गाउयपुहुत्त वा, जोयणं वा जोयणपुहुत्तं वा, जोयण-सयं वा जोयणसय-
पुहुत्त वा, जोयण-सहस्स वा जोयण-सहस्सपुहुत्तं वा, जोयणलक्ख
वा, जोयण-लक्खपुहुत्तं वा, जोयणकोडि वा जोयण-कोडिपुहुत्त वा,
जोयण-कोडाकोडिं वा, जोयण-कोडाकोडि-पुहुत्तं वा, जोयण-सखिज्ज
वा जोयण संखिज्जपुहुत्त वा, जोयण-असंखेज्ज वा जोयण
असंखेज्ज-पुहुत्तं वा उक्कोसेण लोगं वा पासित्ता णं पडिवइज्जा ।
से त्तं पडिवाइ ओहिणाण ॥

सूत्र - 15 से कि तं अपडिवाइ ओहिणाणं ? अपडिवाइ-
ओहिणाणं जेण अलोगस्स एगमवि आगास-पएसं जाणइ पासइ,
तेण परं अपडिवाइ ओहिणाणं । से त्तं अपडिवाइ-ओहिणाणं ॥

सूत्र - 16 तं समासओ चउव्विहं पण्णत्तं, तजहा-दव्वओ,
खित्तओ, कालओ, भावओ । तत्थ दव्वओ णं ओहिणाणी जहण्णेण
अणताइं रुविदव्वाइ जाणइ पासइ, उक्कोसेणं सब्वाइं रुविदव्वाइ
जाणइ पासइ ।

खित्तओ ण ओहिणाणी जहण्णेणं अंगुलस्स असंखिज्जइ
भाग जाणइ पासइ, उक्कोसेणं असंखिज्जाइ अलोगे लोगप्पमाण-
मित्ताइं खण्डाइं जाणइ पासइ ।

कालओ णं ओहिणाणी जहण्णेणं आवलियाए असखिज्जइ
भागं जाणइ पासइ उक्कोसेण असंखिज्जाओ उस्सपिणीओ
अवसपिणीओ अईय-मणागयं च काल जाणइ पासइ ।

भावओ ण ओहिणाणी जहण्णेण अणते भावे जाणइ पासइ,
उक्कोसेण वि अणते भावे जाणइ पासइ । सव्वभावाण-मणत-भाग
जाणइ पासइ ।।

ओही भव पच्चइओ, गुण पच्चइओ य वण्णिओ दुविहो ।

तस्स य बहू विगप्पा, दव्वे खित्ते य काले य ।।63 ।।

णेरइय-देव-तित्थकरा य, ओहिस्सऽबाहिरा हुति ।

पासति सव्वओ खलु, सेसा देसेण पासति ।।64 ।।

से त्तं ओहिणाण पच्चक्खं

सूत्र — 17 से किं त मणपज्जव णाण ? मणपज्जव णाणे ण
भते ! कि मणुस्साणं उप्पज्जइ अमणुस्साण ?

गोयमा ! मणुस्साण, णो अमणुस्साणं ।

जइ मणुस्साणं किं संमुच्छिम मणुस्साण गब्भवक्कतिय-
मणुस्साणं ?

गोयमा ! णो संमुच्छिम मणुस्साणं, गब्भवक्कतिय-मणुस्साणं
उप्पज्जइ ।

जइ गब्भवक्कतिय मणुस्साण कि कम्मभूमिय गब्भवक्कतिय
मणुस्साण, अकम्मभूमिय गब्भवक्कतिय मणुस्साण, अतरदीवग
गब्भवक्कतिय मणुस्साण ?

गोयमा ! कम्मभूमिय-गब्भवक्कतिय-मणुस्साण, णो अकम्मभूमिय
गब्भवक्कतिय मणुस्साण, णो अंतरदीवग-गब्भवक्कतिय मणुस्साण ।

जइ कम्मभूमिय गब्भवक्कतिय मणुस्साण, किं संखिज्ज वासाउय
कम्मभूमिय गब्भवक्कतिय मणुस्साण, असखिज्ज वासाउय कम्मभूमिय
गब्भवक्कतिय मणुस्साण ?

संखेज्ज वासाउय कम्मभूमिय गब्भवक्कंतिय मणुस्साण, णो संजया-संजय-सम्मदिट्ठि-पज्जत्तग सखेज्ज-वासाउय कम्मभूमिय-गब्भवक्कतिय मणुस्साणं ।

जइ सजय सम्मदिट्ठि पज्जत्तग सखेज्ज वासाउय-कम्मभूमिय-गब्भवक्कतिय मणुस्साण, किं पमत्त संजय-सम्मदिट्ठि पज्जत्तग-सखेज्ज वासाउय कम्मभूमिय गब्भवक्कंतिय मणुस्साण, अपमत्त संजय-सम्मदिट्ठि पज्जत्तग-संखेज्ज वासाउय कम्मभूमिय गब्भवक्कंतिय मणुस्साणं ?

गोयमा ! अपमत्त संजय सम्मदिट्ठि पज्जत्तग-सखेज्ज-वासाउय कम्मभूमिय गब्भवक्कंतिय मणुस्साण णो पमत्त सजय सम्मदिट्ठि पज्जत्तग-संखेज्ज वासाउय कम्म-भूमिय गब्भवक्कंतिय मणुस्साण ।

जइ अपमत्त संजय सम्मदिट्ठि पज्जत्तग-संखेज्ज-वासाउय-कम्मभूमिय गब्भवक्कंतिय मणुस्साणं किं इड्ढिपत्त अपमत्त सजय सम्मदिट्ठि पज्जत्तग-संखेज्ज-वासाउय-कम्मभूमिय गब्भवक्कंतिय मणुस्साण, अणिड्ढिपत्त अपमत्त संजय सम्मदिट्ठि पज्जत्तग सखेज्ज वासाउय कम्म-भूमिय गब्भवक्कतिय मणुस्साणं ?

गोयमा ! इड्ढिपत्त अपमत्त संजय-सम्मदिट्ठि पज्जत्तग-सखेज्ज वासाउय-कम्मभूमिय-गब्भवक्कंतिय-मणुस्साणं णो अणिड्ढिपत्त अपमत्त संजय सम्मदिट्ठि पज्जत्तग-सखेज्ज वासाउय-कम्मभूमिय गब्भवक्कंतिय मणुस्साणं, मणपज्जव णाण समुप्पज्जइ ।।17।।

सूत्र — 18 तं च दुविहं उप्पज्जइ तजहा—उज्जुमई य, विउलमई य । तं समासओ चउव्विहं पण्णत्त, तजहा—दव्वओ, खित्तओ, कालओ भावओ ।

तत्थ दव्वओ णं उज्जुमई अणते अणत पएसिए खंधे जाणइ पासइ, तं चेव विउलमई अब्भहियतराए विउलतराए विसुद्धतराए वितिमिरतराए जाणइ पासइ ।

खित्तओ णं उज्जुमई य जहण्णेण अंगुलस्स असंखेज्जय भागं उक्कोसेणं अहे जाव इमीसे रयणप्पभाए पुढवीए उवरिम हेड्डिल्ले खुड्डग-पयरे उड्डं जाव जोइसस्स उवरिम तले, तिरिय जाव अतो मणुस्स खित्ते अड्डाइज्जेसु दीवसमुद्देसु पण्णरससु कम्मभूमिसु तीसाए अकम्म भूमिसु छपण्णाए अंतर दीवगेसु सण्णि-पचिन्दियाण पज्जत्तयाण मणोगए भावे जाणइ पासइ, तं चेव विउलमई अड्डाइज्जेहि मंगुलेहि अब्भहियतरागं विउलतरागं विसुद्धतराग वितिमिरतराग खेतं जाणइ पासइ ।

कालओ णं उज्जुमई जहण्णेण पलिओवमस्स-असंखिज्जय भागं उक्कोसेण वि पलिओवमस्स असंखिज्जय-भाग अतीय-मणागय वा कालं जाणइ पासइ, तं चेव विउलमई अब्भहियतरागं विउलतराग विसुद्धतरागं वितिमिरं तरागं जाणइ पासइ ।

भावओ णं उज्जुमई अणते भावे जाणइ पासइ, सब्बभावाणं अणतभागं जाणइ पासइ, तं चेव विउलमई अब्भहिय तराग विउल तरागं विसुद्धतराग वितिमिरतराग जाणइ पासइ ।

मणपज्जव णाणं पुण, जण मण परिचिन्तियत्थ पागडण ।

माणुस्स खित्त णिबद्धं गुणपच्चइयं चरित्तवओ ॥६५॥

से तं मणपज्जव णाणं ॥१८॥

सूत्र - १९ से किं तं केवलणाणं ? केवलणाणं दुविह पण्णत्त तजहा-भवत्थ केवलणाणं च सिद्ध केवलणाणं च ।

से किं तं भवत्थ केवलणाण ? भवत्थकेवलणाण दुविह पण्णत्त तजहा-सजोगि भवत्थ केवलणाण च अजोगि भवत्थ केवलणाण च ।

से कि त सजोगि भवत्थ-केवलणाण ? सजोगि भवत्थ केवलणाणं दुविहं पण्णत्तं, तजहा-पढमसमय-सजोगि भवत्थ केवलणाणं च अपढमसमय-सजोगि भवत्थ केवलणाण च, अहवा

चरमसमय सजोगि, भवत्थ केवलणाण च अचरमसमय स जोगिभवत्थ केवलणाण च , से त्त सजोगि भवत्थ केवलणाण ।

से कि त अजोगि भवत्थ केवलणाण ? अजोगि भवत्थ केवलणाण दुविहं पण्णत्त, तजहा-पढम समय अजोगि भवत्थ केवलणाण च, अपढम समय अजोगि भवत्थ केवलणाणं च, अहवा चरम समय अजोगि भवत्थ केवलणाण च, अचरम समय अजोगि भवत्थ केवलणाण च, से त्त अजोगि भवत्थ केवलणाण, से त्त भवत्थ केवलणाण ।।19।।

सूत्र - 20 से कि त सिद्ध केवलणाण ? सिद्ध केवलणाण दुविहं पण्णत्त, तंजहा-अणंतर सिद्ध केवलणाण च परम्पर सिद्ध केवलणाण च ।

सूत्र - 21 से किं तं अणतर सिद्ध केवलणाण ? अणतर सिद्ध-केवलणाणं पण्णरस-विहं पण्णत्त, तजहा-तित्थ सिद्धा, अतित्थ सिद्धा, तित्थयर सिद्धा, अतित्थयर सिद्धा, सयबुद्ध सिद्धा, पत्तेयबुद्ध सिद्धा, बुद्धबोहिय सिद्धा, इत्थिलिग सिद्धा, पुरिसलिग सिद्धा, णपुसगलिग सिद्धा, सलिग सिद्धा, अण्णलिग सिद्धा, गिहिलिग सिद्धा, एगसिद्धा, अणेग सिद्धा, से त्त अणतर सिद्ध केवलणाण ।

सूत्र - 22 से कि त परम्पर सिद्ध केवलणाण ? परम्पर सिद्ध-केवलणाण अणेगविह पण्णत्त, तंजहा-अपढम समय सिद्ध केवलणाण दुसमय सिद्ध केवलणाण, तिसमय सिद्ध केवलणाण, चउसमय सिद्ध केवलणाण जाव दससमय सिद्ध केवलणाणं, सखिज्ज समय सिद्ध केवलणाणं, असखज्जि समय सिद्ध केवलणाण, अणत समय सिद्ध केवलणाण, से त्त परम्पर सिद्ध केवलणाण, से त्त सिद्ध केवलणाण ।

त समासओ चउव्विह पण्णत्त, तजहा-दव्वओ, खित्तओ, कालओ, भावओ । तत्थ दव्वओ ण केवलणाणी सव्व दव्वाइ जाणइ पासइ ।

खित्तओ णं केवलणाणी सव्वं खित्तं जाणइ पासइ। कालओ ण केवलणाणी सव्वं कालं जाणइ पासइ। भावओ णं केवलणाणी सव्वे भावे जाणइ पासइ।

अह सव्व दव्व परिणाम, भावविण्णत्ति कारणमणंत।

सासय-मप्पडिवाई, एगविहं केवलणाणं ॥66॥

केवलणाणेण ऽत्थे, णाउ जे तत्थ पण्णवणजोगे।

ते भासइ तित्थयरो, वइजोग सुयं हवइ सेसं ॥67॥

सूत्र - 23 से तं केवलणाणं, से तं णोइन्दिय पच्चक्खं, से त पच्चक्खणाणं।

सूत्र - 24 से किं तं परोक्खणाणं ? परोक्खणाण दुविह पण्णत्तं, तंजहा-आभिणिबोहिय णाण परोक्खं च, सुयणाण परोक्खं च। जत्थ आभिणिबोहिय णाणं तत्थ सुयणाणं, जत्थ सुयणाण तत्थ आभिणिबोहिय णाणं, दोऽवि एयाइं अण्णमण्ण-मणुगयाइं, तहवि पुण इत्थ आयरिया णाणत्तं पणवयति-अभिणिबुज्झइत्ति आभिणि-बोहियणाणं, सुणेइत्ति सुयणाणं, मइपुव्वं जेण सुयं, ण मई सुयपुव्विया।

सूत्र - 25 अविसेसिया मई, मई-णाणं च मई-अण्णाणं च। विसेसिया सम्मदिट्ठिस्स मई मइणाणं। मिच्छदिट्ठिस्स मई मइ अण्णाण। अविसेसियं सुयं सुयणाणं च सुय अण्णाणं च। विसेसिय सुय सम्मदिट्ठिस्स सुयं सुयणाणं, मिच्छदिट्ठिस्स सुयं सुय अण्णाणं।

सूत्र - 26 से किं तं आभिणिबोहिय णाणं ? आभिणिबोहिय णाणं दुविहं पण्णत्तं, तंजहा-सुय णिस्सियं च, अस्सुय णिस्सिय च।

से किं तं अस्सुय णिस्सियं ? अस्सुय णिस्सियं चउव्विहं पण्णत्तं, तंजहा-

उप्पत्तिया, वेणइया, कम्मिया, परिणामिया।

बुद्धी चउव्विहा वुत्ता, - पंचमा णोवलब्भइ ॥68॥

पुव्व-मदिट्ठ-मस्सुय-मवेइय, तक्खण विसुद्ध-गहियत्था।

अव्वाहय-फ़लजोगा, बुद्धी उप्पत्तिया णाम ॥69॥

भरहसिल, मिंढ, कुक्कुड, तिल, बालुय, हत्थि, अगड, वणसण्डे ।
 पायस, अइया, पत्ते खाडहिला, पंचपियरो य ॥70॥
 भरह सिल, पणिय, रुक्खे, खुड्डग, पड, सरड, काय उच्चारे ।
 गय, घयण, गोल, खंभे, खुड्डग, मग्गित्थि, पइ, पुत्ते ॥71॥
 महुसित्थ, मुद्दि, अंके य, गाणए, भिक्खू, चेडगणिहाणे ।
 सिक्खा य, अत्थसत्थे, इच्छा य महं, सयसहस्से ॥72॥
 भरणित्थरण समत्था, तिवग्ग सुत्तत्थ गहिय पेयाला ।
 उभओ लोगफलवई, विणयसमुत्था हवइ बुद्धी ॥73॥
 णिमित्ते, अत्थे सत्थे य लेहे, गणिए य, कूव, अस्से य ।
 गद्दभ, लक्खण, गंठी, अगए, रहिए य, गणिया य ॥74॥
 सीया साडी दीहं च, तणं अवसव्वयं च कुंचस्स ।
 णिव्वोदय य गोणे, घोडग पडण च रुक्खाओ ॥75॥
 उवओग दिट्ठसारा, कम्म-पसंग-परिघोलण-विसाला ।
 साहुक्कार फलवई, कम्मसमुत्था हवइ बुद्धी ॥76॥
 हेरणिणए, करिसए, कोलिय, डोवे य, मुत्ति, घय, पवए ।
 तुण्णाए, वड्डइ य, पूयइ, घड, चित्तकारे य ॥77॥
 अणुमाण हेउ-दिट्ठंत साहिया, वयविवाग परिणामा ।
 हिय णिस्सेयस फलवई, बुद्धी परिणामिया णाम ॥78॥
 अभए सिट्ठि कुमारे, देवी उदिओदए, हवइ राया ।
 साहू य णन्दिसेणे, धणदत्ते, सावग, अमच्चे ॥79॥
 खमए, अमच्चपुत्ते, चाणक्के, चेव थूलभद्दे य ।
 णासिक सुंदरिणंदे, वइरे, परिणामिय बुद्धीए ॥80॥
 चलणाहण, आमण्डे, मणी य, सप्पे य, खग्गि, थूभिन्दे ।
 परिणामिय बुद्धीए, एवमाई उदाहरणा ॥81॥

से किं त सुय णिस्सियं ?

सुय णिस्सियं चउव्विहं पण्णत्तं, तंजहा—उग्गहे, ईहा, अवाओ,
 धारणा ।

सूत्र - 27 से किं तं उग्गहे ?

उग्गहे दुविहे पण्णत्ते, तंजहा-अत्थुग्गहे य वजणुग्गहे य।

सूत्र - 28 से किं तं वजणुग्गहे ?

वंजणुग्गहे चउव्विहे पण्णत्ते, तंजहा-सोइन्दिय वजणुग्गहे, घाणिन्दिय वंजणुग्गहे जिंभिन्दिय वंजणुग्गहे फासिन्दिय वजणुग्गहे। से तं वंजणुग्गहे।

सूत्र - 29 से किं तं अत्थुग्गहे ?

अत्थुग्गहे छव्विहे पण्णत्ते। तंजहा-सोइन्दिय अत्थुग्गहे, चक्खिन्दिय अत्थुग्गहे, घाणिन्दिय अत्थुग्गहे, जिंभिन्दिय अत्थुग्गहे, फासिन्दिय अत्थुग्गहे णोइन्दिय अत्थुग्गहे।

सूत्र - 30 तस्स ण इमे एगद्धिया णाणाघोसा णाणावंजणा पंच णामधिज्जा भवति, तंजहा-ओणेहणया, उवधारणया, सवणया, अवलम्बणया, मेहा। से त्त उग्गहे।

सूत्र - 31 से किं तं ईहा ?

ईहा छव्विहा पण्णत्ता। तजहा-सोइन्दिय ईहा, चक्खिन्दिय , घाणिन्दिय ईहा, जिंभिन्दिय ईहा, फासिन्दिय ईहा, णोइन्दियईहा, ण इमे एगद्धिया णाणाघोसा णाणावंजणा पंच णामधिज्जा , तंजहा-आभोगणया, मग्गणया, गवेसणया, चिता, वीमसा। से त्त ईहा।

सूत्र - 32 से किं तं अवाए ?

अवाए छव्विहे पण्णत्ते। तजहा-सोइन्दिय अवाए, चक्खिन्दिय अवाए, घाणिन्दिय अवाए, जिंभिन्दिय अवाए, फासिन्दिय अवाए, णोइन्दिय अवाए, तस्स णं इमे एगद्धिया णाणाघोसा णाणावजणा पंच णामधिज्जा भवंति, तजहा-आउट्टणया, पच्चाउट्टणया, अवाए, बुद्धी, विण्णाणे। से त्तं अवाए।

सूत्र - 33 से किं तं धारणा ?

धारणा छविहा पण्णत्ता, तंजहा—सोइन्दिय धारणा, चक्खिन्दिय धारणा, घाणिन्दिय धारणा, जिब्भिन्दिय धारणा, फासिन्दिय धारणा, णोइन्दिय धारणा ।

तीसे ण इमे एगद्धिया णाणाघोसा णाणावजणा पंच णामधिज्जा भवंति, तंजहा—धारणा, साधारणा, ठवणा, पइट्टा, कोट्टे से त्त धारणा ।

सूत्र — 34 उग्गहे इक्क समइए, अतोमुहुत्तिया ईहा, अंतो-मुहुत्तिए अवाए, धारणा संखेज्ज वा काल असंखेज्जं वा काल ।

सूत्र — 35 एव अट्टावीसइ विहस्स आभिणिबोहिय णाणस्स वंजणुग्गहस्स परूवणं करिस्सामि, पडिबोहग दिट्ठतेण मल्लग दिट्ठतेण य ।

से किं त पडिबोहग दिट्ठतेणं ?

पडिबोहग दिट्ठतेणं से जहा णामए केइ पुरिसे कचि पुरिस सुत्त पडिबोहिज्जा, अमुगा अमुगत्ति । तत्थ चोयगे पण्णवय एवं वयासी—किं एगसमय पविट्टा पुग्गला गहण-मागच्छति ? दुसमय पविट्टा पुग्गला गहण-मागच्छंति ? जाव दससमय पविट्टा पुग्गला गहण-मागच्छति ? सखिज्ज समय पविट्टा पुग्गला गहणमागच्छति ? असखिज्ज समय पविट्टा पुग्गला गहण-मागच्छति ?

एव वयंत चोयग पण्णवए एव वयासी—णो एगसमय पविट्टा पुग्गला गहण-मागच्छति, णो दुसमय पविट्टा पुग्गला गहण-मागच्छति, जाव णो दससमय पविट्टा पुग्गला गहण-मागच्छति, णो सखिज्ज समय पविट्टा पुग्गला गहण-मागच्छंति, असंखिज्ज समय पविट्टा पुग्गला गहण मागच्छति, से त पडिबोहग दिट्ठतेण ।

से कि त मल्लग दिट्ठतेण ?

मल्लग दिट्ठतेण से जहाणामए केइ पुरिसे आवाग सीसाओ मल्लग गहाय तत्थेग उदगबिन्दू पक्खेविज्जा, से णट्टे, अण्णेऽवि पक्खित्ते सेवि णट्टे एव पक्खि प्पमाणेसु पक्खि प्पमाणेसु

उदगबिन्दू जे णं तं मल्लगं रावेहिइत्ति, होही से उदगबिन्दू जे णं तंसि मल्लगंसि ठाहिति, होही से उदगबिन्दू जे णं तं मल्लगं भरिहिति, होही से उदगबिन्दू जे णं तं मल्लगं पवाहेहिति ।

एवामेव पक्खिप्पमाणेहिं पक्खिप्पमाणेहिं अणंतेहिं पुग्गलेहिं जाहे तं वंजणं पूरियं होइ, ताहे 'हुं' ति करेइ । णो चेव णं जाणइ के वेस सदाइ ? तओ ईहं पविसइ, तओ जाणइ अमुगे एस सदाइ तओ अवायं पविसइ, तओ से उवगयं हवइ, तओ णं धारण पविसइ, तओ णं धारेइ संखिज्जं वा कालं, असंखिज्जं वा कालं ।

से जहाणामए केइ पुरिसे अव्वत्तं सदं सुणिज्जा, तेणं सदोत्ति उग्गहिए, णो चेव णं जाणइ के वेस सदाइ ? तओ ईहं पविसइ, तओ जाणइ-अमुगे एस सदे, तओ णं अवायं पविसइ तओ से उवगयं हवइ, तओ धारणं पविसइ, तओ णं धारेइ संखेज्जं वा कालं असंखेज्जं वा कालं ।

से जहाणामए केइ पुरिसे अव्वत्तं रूवं पासिज्जा, तेणं 'रूव' ति उग्गहिए, णो चेव णं जाणइ 'के वेस रूव' ति ? तओ ईहं पविसइ, तओ जाणइ अमुगे एस रूवेत्ति, तओ अवायं पविसइ, तओ से उवगयं हवइ, तओ धारणं पविसइ, तओ णं धारेइ संखेज्ज वा कालं, असंखेज्जं वा कालं ।

से जहाणामए केइ पुरिसे अव्वत्तं गंधं अग्घाइज्जा तेणं गंधत्ति उग्गहिए, णो चेव णं जाणइ 'के वेस गंधे' ति ? तओ इहं पविसइ, तओ जाणइ 'अमुगे एस गंधे', तओ अवायं पविसइ, तओ से उवगय हवइ, तओ धारणं पविसइ, तओ णं धारेइ संखेज्जं वा काल असंखेज्जं वा काल ।

से जहाणामए केइ पुरिसे अव्वत्तं रसं असाइज्जा, तेणं 'रसो' ति उग्गहिए, णो चेव णं जाणइ 'के वेस रसो' ति । तओ ईहं पविसइ, तओ जाणइ-'अमुगे एस रसे' । तओ अवायं पविसइ, तओ

से उवगयं हवइ, तओ धारणं पविसइ, तओ णं धारेइ संखिज्ज वा कालं असखिज्जं वा काल ।

से जहाणामए केइ पुरिसे अव्वत्तं फासं पडिसंवेइज्जा तेणं 'फासे' ति उग्गहिए, णो चेव णं जाणइ 'के वेस फासओ' ति ? तओ ईहं पविसइ, तओ जाणइ-'अमुगे एस सुफासे', तओ अवायं पविसइ, तओ से उवगयं हवइ, तओ धारणं पविसइ, तओ णं धारेइ संखेज्जं वा कालं असखेज्जं वा कालं ।

से जहाणामए केइ पुरिसे अव्वत्तं सुमिणं पासिज्जा, तेणं 'सुमिणे' ति उग्गहिए, णो चेव णं जाणइ 'के वेस सुमिणे' ति, तओ ईहं पविसइ, तओ जाणइ-'अमुगे एस सुमिणे' तओ अवायं पविसइ, तओ से उवगयं हवइ, तओ धारणं पविसइ, तओ ण धारेइ संखेज्जं वा कालं, असंखेज्ज वा कालं ।

से त मल्लग दिट्ठंतेण ।

सूत्र - 36 तं समासओ चउव्विहं पण्णत्त, तंजहा-दव्वओ, खित्तओ, कालओ, भावओ ।

तत्थ दव्वओ ण आभिणिबोहिय णाणी आएसेणं सव्वाइं दव्वाइं जाणइ, णं पासइ ।

खेत्तओ णं आभिणिबोहिय णाणी आएसेणं सव्वं खेत्तं जाणइ, ण पासइ ।

कालओ णं आभिणिबोहिय णाणी आएसेणं सव्वं कालं जाणइ, ण पासइ ।

भावओ णं आभिणिबोहिय णाणी आएसेणं सव्वे भावे जाणइ, ण पासइ ।

उग्गह ईहाऽवाओ य, धारणा एवं हुंति चत्तारि ।

आभिणिबोहिय णाणस्स, भेयवत्थू समासेणं ।।82।।

अत्थाण उग्गहणम्मि, उग्गहो तह वियालणे ईहा ।

ववसायम्मि अवाओ, धरण पुण धारण बिति ।।83।।

उग्गह इक्कं समयं, ईहावाया मुहुत्तमद्ध तु।
 काल-मसंखं संखं च, धारणा होइ णायव्वा॥१८४॥
 पुहं सुणेइ सद्धं, रूवं पुण पासइ अपुहं तु।
 गंधं रसं च फासं च, बद्ध पुह वियागरे॥१८५॥
 भासा-समसेढीओ, सद्धं जं सुणइ मीसियं सुणइ।
 वीसेणी पुण सद्धं, सुणेइ णियमा पराघाए॥१८६॥
 ईहा अपोह वीमंसा, मग्गणा य गवेसणा।
 सण्णा सई मई पण्णा, सव्वं आभिणिबोहिय॥१८७॥
 से त आभिणिबोहिय णाण परोक्ख। से तं मइणाण।
 सूत्र - ३७ से किं तं सुयणाण परोक्खं ?

सुयणाण परोक्खं चोदसविहं पण्णत्तं, तजहा-अक्खर-सुय,
 अणक्खर-सुय, सण्णि-सुयं असण्णि-सुयं, सम्म-सुयं, मिच्छ-सुयं,
 साइयं, अणाइयं, सपज्जवसियं अपज्जवसियं, गमियं, अगमिय,
 अंगपविट्ठं, अणंगपविट्ठं।

सूत्र - ३८ से किं तं अक्खर-सुयं ?

अक्खर-सुयं तिविहं पण्णत्तं, तंजहा- सण्णक्खरं, वजणक्खर,
 लद्धि-अक्खरं।

से कि त सण्णक्खर ?

सण्णक्खर अक्खरस्स संटाणागिई, से तं सण्णक्खर।

से किं तं वंजणक्खरं ?

वंजणक्खरं अक्खरस्स वंजणाभिलावो, से तं वजणक्खर।

से किं त लद्धिअक्खरं ?

लद्धि-अक्खर अक्खर लद्धियस्स लद्धि-अक्खर समुप्पजइ,
 तंजहा-सोइदिय-लद्धि-अक्खरं, चक्खिदिय-लद्धि-अक्खरं, घाणिंदिय-
 लद्धि-अक्खरं, रसणिंदिय-लद्धि-अक्खरं, फासिंदिय-लद्धि-अक्खर,
 णोइंदिय-लद्धि-अक्खरं। से तं लद्धि-अक्खर से त अक्खरसुयं।

से किं त अणक्खरसुय ?

अणक्खरसुय अणेगविह पण्णत्त, तजहा —

ऊससिय णीससियं, णिच्छूढं खासिय च छीय च ।

णिस्सिधिय-मणुसार, अणक्खर छेलियाईय । ॥४४॥

से त अणक्खरसुय ।

सूत्र — ३९ से किं त सण्णिसुय ?

सण्णिसुय तिविहं पण्णत्त, तजहा—कालिओवएसेण, हेऊवएसेणं,

दिट्ठिवाओवएसेणं ।

से कि त कालिओवएसेणं ?

कालिओवएसेण जस्स ण अत्थि ईहा, अवोहो, मग्गणा, गवेसणा,

चिता, वीमसा, से णं सण्णीत्ति लब्भइ । जस्स ण णत्थि ईहा,

अवोहो, मग्गणा, गवेसणा, चिता, वीमसा, से ण असण्णीत्ति लब्भइ,

से तं कालिओवएसेण ।

से कि त हेऊवएसे णं ।

हेऊवएसेणं जस्सण अत्थि अभिसघारण-पुव्विया करणसत्ती

से ण सण्णीत्ति लब्भइ । जस्स णं णत्थि अभिसघारणपुव्विया करणसत्ती

से ण असण्णीत्ति लब्भइ । से त हेऊवएसेण ।

से किं त दिट्ठिवाओवएसेण ?

दिट्ठिवाओवएसेण सण्णिसुयस्स खओवसमेण सण्णी लब्भइ ।

असण्णिसुयस्स खओवसमेण असण्णी लब्भइ । से त दिट्ठिवाओवएसेण ।

से त सण्णिसुय, से त असण्णिसुय ।

सूत्र — ४० से कि त सम्मसुय ?

सम्मसुयं ज इम अरहतेहि भगवतेहि उप्पण्ण णाण दसण

धरेहि तेलुक्क णिरिक्खय महिय पूइएहि तीय पडुप्पण्ण मणागय

जाणएहि संव्वण्णूहि सव्वदरिसीहि पणीय दुवालसग गणिपिडग ।

तजहा—आयारो, सूयगडो, ठाण, समवाओ, विवाहपण्णत्ती, णायाधम्म

कहाओ, उवासग दसाओ, अंतगड दसाओ, अणुत्तरोववाइय दसाओ, पण्हावागरणाइं, विवागसुयं, दिड्विवाओ। इच्चेयं दुवालसंगं गणिपिडगं चोदस पुव्विस्स सम्मसुयं। अभिण्ण दस पुव्विस्स सम्मसुयं, तेण पर भिण्णेसु भयणा। से तं सम्मसुयं।

सूत्र - 41 से किं मिच्छासुयं ?

मिच्छासुयं जं इमं अण्णाणिएहिं मिच्छादिड्विएहिं, सच्छद बद्धि मइविगप्पियं। तंजहा- भारहं, रामायणं, भीमासुरुक्खं, कोडिल्लय, सगड भदियाओ, खोडग (घोडग) मुहं, कप्पासियं, णागसुहुम, कणगसत्तरी, वइसेसियं, बुद्धवयणं, तेरासियं, काविलियं, लोगायय, सट्ठित्तं, माढरं, पुराणं, वागरणं, भागवयं, पायंजली, पुस्सदेवय, लेहं, गणियं, सउणरुयं, णाडयाइं।

अहवा बावत्तरि कलाओ, चत्तारि य वेया संगोवंगा। एयाइ मिच्छ दिड्विस्स मिच्छत्त परिग्गहियाइं मिच्छासुयं एयाइं चेव सम्मदिड्विस्स सम्मत्त परिग्गहियाइं सम्मसुयं। अहवा मिच्छदिड्विस्स वि एयाइं चेव सम्मसुयं, कम्हा ? सम्मत्त हेउत्तणओ जम्हा ते मिच्छदिड्विया तेहिं चेव समएहिं चोइया समाणा केइ सपक्ख दिड्विओ चयंति। से तं मिच्छासुयं।

सूत्र - 42 से किं तं साइयं सपज्जवसियं, अणाइयं अपज्जवसियं च ?

इच्चेइयं दुवालसंगं गणिपिडगं वुच्छित्ति-णयइयाए साइयं सपज्जवसियं, अवुच्छित्ति-णयइयाए अणाइयं अपज्जवसियं। त समासओ चउव्विहं पण्णत्तं, तंजहा-दव्वओ, खित्तओ कालओ, भावओ।

तत्थ दव्वओ णं सम्मसुयं एगं पुरिसं पडुच्च साइयं सपज्जवसिय, बहवे पुरिसे य पडुच्च अणाइयं अपज्जवसियं।

खेत्तओ णं पंच भरहाइं पंचेरवयाइं पडुच्च साइयं सपज्जवसिय, पंच महाविदेहाइं पडुच्च अणाइयं अपज्जवसियं।

कालओ ण उस्सप्पिणिं ओसप्पिणिं च पडुच्च साइय सपज्जवसियं, णो उस्सप्पिणिं, णो ओसप्पिणिं च पडुच्च अणाइय अपज्जवसियं ।

भावओ णं जे जया जिण पण्णत्ता भावा आघविज्जंति, पण्णविज्जंति, परूविज्जति, दसिज्जंति, णिदसिज्जति उवदसिज्जंति, तथा ते भावे पडुच्च साइय सपज्जवसियं खाओवसमियं पुण भाव पडुच्च अणाइयं अपज्जवसिय । अहवा भव सिद्धियस्स सुय साइयं सपज्जवसिय च, अभव सिद्धियस्स सुय अणाइयं अपज्जवसिय च ।

सव्वागास-पएसग्ग सव्वागास-पएसेहिं अणत-गुणिय पज्जवक्खर णिप्फज्जइ । सव्वजीवाणं पि य ण अक्खरस्स अणतभागो, णिच्चुग्घाडिओ । जइ पुण सोऽवि आवरिज्जा तेणं जीवो अजीवत्त पाविज्जा । सुट्ठुवि मेह समुदए, होइ पभा चन्दसूराण । से त साइयं सपज्जवसिय, से तं अणाइयं अपज्जवसियं ।

सूत्र — 43 से किं त गमियं ? गमियं दिड्ढिवाओ । से किं तं अगमिय ? अगमियं कालियं सुयं । से त गमियं । से तं अगमियं । अहवा तं समासओ दुविहं पण्णत्तं, तंजहा—अंगपविट्ठ, अंगबाहिरं च ।

से किं तं अंगबाहिर ? अंगबाहिरं दुविहं पण्णत्त, तजहा—आवस्सयं च, आवस्सय-वइरित्तं च ।

से कि त आवस्सय ? आवस्सयं छव्विहं पण्णत्तं, तंजहा—सामाइय, चउवीसत्थओ, वंदणय, पडिक्कमण, काउस्सग्गो, पच्चक्खाण, से त आवस्सयं ।

से कि त आवस्सय वइरित्तं ? आवस्सय-वइरित्त दुविहं पण्णत्तं, तजहा—कालिय च, उक्कालिय च ।

से कि तं उक्कालिय ? उक्कालियं अणेगविहं पण्णत्तं, तजहा—दसवेआलिय, कप्पियाकप्पिय, चुल्लकप्प-सुय, महाकप्प-सुयं, उववाइयं, राय पसेणियं, जीवाभिगमो, पण्णवणा, महापण्णवणा, पमायप्पमाय,

णंदी, अणुओग-दाराइं, देविदत्थओ, तंदुल-वेयालियं, चंदा-विज्जयं, सूर-पण्णत्ती, पोरिसि-मण्डलं, मण्डल-पवेसो, विज्जाचरण-विणिच्छओ, गणिविज्जा, ज्ञाण-विभत्ती, मरण-विभत्ती, आय-विसोही, वीयराग-सुय, संलेहणा-सुयं, विहार-कप्पो, चरणविही आउर-पच्चक्खाणं, महापच्चक्खाणं, एवमाइ। से तं उक्कालियं।

से कि त कालियं ?

कालिय अणेगविहं पण्णत्तं तजहा—उत्तरज्जयणाइ, दसाओ, कप्पो, ववहारो, णिसीहं, महाणिसीह, इसि-भासियाइं, जम्बूदीव-पण्णत्ती, दीवसागर-पण्णत्ती, चंदपण्णत्ती खुड्डिया विमाण पविभत्ती, महल्लिया-विमाण पविभत्ती, अग-चूलिया, वग्ग-चूलिया, विवाह-चूलिया, अरुणोववाए, वरुणोववाए गरुलोववाए, धरणोववाए, वेसमणोव-वाए, वेलधरोव-वाए, देविंदोव वाए, उट्टाण-सुए, समुट्टाण-सुए, गागपरियावणियाओ, णिरयाव-लियांओ, कप्पियाओ, कप्पवडिसियाओ, पुप्फियाओ, पुप्फ-चूलियाओ, वण्ही-दसाओ, { आसीविस भावणाणं, दिट्ठिविसभावणाणं सुमिणभावणाणं, महासुमिणभावणाण, तेयग्गिसग्गाण } एवमाइयाइं चउरासीइं पइण्णग-सहस्साइं भगवओ अरहओ उसहसामिस्सा आइ-तित्थयरस्स, तथा सखिज्जाइं, पइण्णग सहस्साइं मज्झिमगाणं जिणवराण चोदस पइण्णग सहस्साइं भगवओ वद्धमाण सामिस्स। अहवा जस्स जत्तिया सीसा उप्पत्तियाए, वेणइयाए, कम्मियाए, पारिणामियाए, चउव्विहाए बुद्धीए उववेया, तस्स तत्तियाइं पइण्णग-सहस्साइं, पत्तेयबुद्धा वि तत्तिया चेव। से तं कालिय। से तं आवस्सय वइरित्तं। से तं अणंगपविट्ठं।

सूत्र — 44 से कि तं अंगपविट्ठं ?

अंगपविट्ठं दुवालसविहं पण्णत्त, तजहा—आयारो, सूयगडो, ठाण, समवाओ, विवाह-पण्णत्ती, गायाधम्म-कहाओ, उवासग-दसाओ, अतगड-दसाओ, अणुत्तरोववाइय-दसाओ, पण्हा-वागरणाइं, विवागसुय,

दिट्टिवाओ ।

सूत्र – 45 से किं तं आयारे ?

आयारे ण समणाण णिग्गथाण आयार-गोयर-विणय-वेणइय-सिक्खा-भासा अभासा-चरण-करण जाया माया वित्तीओ आघविज्जंति, से समासओ पचविहे पण्णत्ते, तंजहा-णाणायारे, दसणायारे, चरित्तायारे, तवायारे, वीरियायारे ।

आयारे ण परित्ता वायणा, सखेज्जा, अणुओगदारा, सखिज्जा वेढा, सखेज्जा सिलोगा, सखिज्जाओ णिज्जुत्तीओ, सखिज्जाओ सगहणीओ, सखिज्जाओ पडिवत्तीओ ।

से ण अंगड्डयाए पढमे अगे, दो सुयक्खधा, पणवीस अज्झयणा, पचासीइ उद्देसण काला, पंचासीइ समुद्देसण काला । अट्टारस पयसहस्साइ पयग्गेण, सखिज्जा अक्खरा, अणंता-गमा, अणता-पज्जवा, परित्ता-तसा, अणंता-थावरा । सासय कड णिबद्ध- णिकाइया जिणपण्णत्ता भावा आघविज्जति पण्णविज्जति, परुविज्जति, दसिज्जति णिदसिज्जंति, उवदसिज्जति । से एव आया, एव णाया, एव विण्णाया, एव चरण-करण-परुवणा आघविज्जइ । से तं आयारे ।

सूत्र – 46 से किं तं सूयगडे ?

सूयगडे ण लोए सूइज्जइ, अलोए-सूइज्जइ, लोयालोए-सूइज्जइ, जीवा सूइज्जंति, अजीवा-सूइज्जइ, जीवाजीवा सूइज्जति, ससमए सूइज्जइ, परसमए सूइज्जइ, ससमय-परसमए सूइज्जइ ।

सूयगडे णं असीयस्स किरियावाइयस्स, चउरासीईए अकिरियावाईणं, सत्तट्टीए अण्णाणिय वाईण बत्तीसाए वेणइय वाईणं, तिण्ह तेसट्टाण पासडिय-सयाण बूह किच्चा ससमए ठाविज्जइ ।

सूयगडे णं परित्ता वायणा, सखिज्जा अणुओगदारा, सखेज्जा वेढा, सखेज्जा सिलोगा, संखिज्जाओ णिज्जुत्तीओ, संखिज्जाओ सगहणीओ, सखिज्जाओ पडिवत्तीओ ।

से णं अगड्डयाए बिइए अगे, दो सुयक्खंधा, तेवीस अज्झयणा, तित्तीसं उद्देसणकाला, तित्तीसं समुद्देसण काला छत्तीस पयसहस्साइं पयग्गेणं । सखिज्जा अक्खरा, अणता-गमा, अणंता-पज्जवा, परिता-तसा, अणंता-थावरा । सासय कड णिबद्ध णिकाइया जिण पण्णत्ता भावा आघविज्जंति, पण्णविज्जंति परूविज्जंति, दसिज्जति, णिदंसिज्जंति, उवदंसिज्जंति । से एवं आया, एवं णाया, एवं विण्णाया, एवं चरण-करण-परूवणा आघविज्जइ । से तं सूयगडे ।

सूत्र - 47 से कि तं ठाणे ?

ठाणे णं जीवा ठाविज्जति, अजीवा ठाविज्जंति, जीवाजीवा ठाविज्जंति, ससमए ठाविज्जइ, परसमए ठाविज्जइ, ससमय-परसमए ठाविज्जइ, लोए ठाविज्जइ, अलोए ठाविज्जइ, लोयालोए ठाविज्जइ ।

ठाणे णं. टंका, कूडा, सेला, सिहरिणो, पब्भारा, कुण्डाइ, गुहाओ, आगरा, दहा, णईओ आघविज्जंति । ठाणे णं एगाइयाए एगुत्तरियाए वुड्डीए दसट्टाणग-विवड्ढियाणं भावाणं परूवणा आघविज्जइ । ठाणे ण परिता वायणा, संखेज्जा अणुओगदारा, संखेज्जा वेढा, संखेज्जा सिलोगा, संखेज्जाओ णिज्जुत्तीओ, संखेज्जाओ संगहणीओ, सखेज्जाओ पडिवत्तीओ ।

से णं अंगड्डयाए तइए अंगे, एगे सुयक्खंधे, दस अज्झयणा एगवीसं उद्देसण काला, एकवीसं समुद्देसण काला, बावत्ता पयसहस्सा पयग्गेणं, संखेज्जा अक्खरा, अणंता-गमा, अणंता-पज्जवा, परिता-तसा, अणंता-थावरा । सासय कड णिबद्ध णिकाइया जिण पण्णत्ता भावा आघविज्जंति, पण्णविज्जति, परूविज्जंति, दंसिज्जति, णिदंसिज्जंति, उवदंसिज्जंति । से एवं आया एवं णाया, एवं विण्णाया एवं चरण-करण-परूवणा आघविज्जइ । से तं ठाणे ।

सूत्र - 48 से किं त समवाए ?

समवाए णं जीवा समासिज्जंति, अजीवा समासिज्जति

जीवाजीवा समासिज्जति, ससमए समासिज्जइ, परसमए समासिज्जइ, ससमय-परसमए समासिज्जइ । लोए समासिज्जइ अलोए समासिज्जइ लोयालोए समासिज्जइ । समवाए णं एगाइयाण एगुत्तरियाण ठाणसय-विवड्डियाण भावाणं परूवणा आघविज्जइ, दुवालस-विहस्स य गणिपिडगस्स पल्लवगे समासिज्जइ ।

समवायस्स णं परित्ता वायणा, सखिज्जा अणुओगदारा, सखिज्जा वेढा, संखिज्जा सिलोगा, सखिज्जाओ णिज्जुत्तीओ सखिज्जाओ सगहणीओ, सखिज्जाओ पडिवत्तीओ ।

से णं अगट्टयाए चउत्थे अगे, एगे सुयक्खधे, एगे अज्झयणे, एगे उद्देसणकाले, एगे समुद्देसणकाले । एगे चोयाल-सयसहस्से पयग्गेणं, सखेज्जा अक्खरा, अणता-गमा, अणता-पज्जवा, परित्ता-तसा, अणता-थावरा । सासय कड णिबद्ध णिकाइया जिण पण्णत्ता भावा आघविज्जति, पण्णविज्जति, परूविज्जंति, दंसिज्जति, णिदंसिज्जति, उवदसिज्जति । से एव आया, एवं णाया, एवं विण्णाया, एवं चरण-करण-परूवणा आघविज्जइ । से त समवाए ।

सूत्र — 49 से किं त विवाहे ? विवाहे ण जीवा विआहिज्जति, अजीवा विआहिज्जति, जीवाजीवा विआहिज्जति, ससमए विआहिज्जइ, परसमए विआहिज्जइ, ससमए-परसमए विआहिज्जइ, लोए विआ-हिज्जइ, अलोए विआहिज्जइ, लोयालोए विआहिज्जइ ।

विवाहस्स ण परित्ता वायणा, सखिज्जा अणुओगदारा, सखिज्जा वेढा, सखिज्जा सिलोगा, सखिज्जाओ णिज्जुत्तीओ, सखिज्जाओ सगहणीओ, सखिज्जाओ पडिवत्तीओ ।

से ण अगट्टयाए पंचमे अंगे, एगे सुयक्खधे, एगे साइरेगे अज्झयणसए, दस उद्देसग सहस्साइ, दस समुद्दे-सग-सहस्साइ । छत्तीस वागरण सहस्साइ, दो लक्खा अट्टासीई पयसहस्साइ पयग्गेण सखिज्जा अक्खरा, अणत गमा, अणता पज्जवा, परित्ता तसा,

अणंता थावरा । सासय कड णिबद्ध णिकाइया जिण पण्णत्ता भावा, आघविज्जंति, पण्णविज्जंति, परुविज्जंति, दसिज्जंति, णिदंसिज्जंति उवदंसिज्जंति । से एवं आया, एवं णाया, एवं विण्णाया, एवं चरण-करण-परुवणा आघविज्जइ । से त विवाहे ।

सूत्र - 50 से किं तं णायाधम्म कहाओ ? णायाधम्म कहासु णं णायाणं णगराइं, उज्जाणाइं, चेइयाइं, वणसण्डाइं, समोसरणाइं, रायाणो, अम्मापियरो, धम्मायरिया, धम्मकहाओ, इहलोइयपरलोइया इड्ढि-विसेसा, भोग परिच्चाया, पव्वज्जाओ परिआया, सुय परिग्गहा, तवोवहाणाइ, संलेहणाओ, भत्त पच्चक्खाणाइं, पाओव गमणाइं, देवलो गमणाइं, सुकुल-पच्चायाइओ, पुण-बोहिलाभा, अत-किरियाओ य आघविज्जति ।

दस धम्मकहाणं वग्गा, तत्थ णं एगमेगाए धम्मकहाए पंच-पंच अक्खाइया सयाइं, एगमेगाए अक्खाइयाए पंच-पंच उवक्खाइया सयाइं, एगमेगाए उवक्खाइयाए पंच-पच अक्खाइया-उवक्खाइया सयाइं, एवमेव सपुव्वावरेणं अद्दुट्ठाओ कहाणग-कोडिओ हवति त्ति समक्खायं ।

णायाधम्म कहाण परित्ता वायणा संखिज्जा अणुओगदारा, संखिज्जा वेढा, संखिज्जा सिलोगा, संखिज्जाओ णिज्जुत्तीओ, संखिज्जाओ संगहणीओ, संखिज्जाओ पडिवत्तीओ ।

से णं अंगट्ठयाए छट्ठे अंगे, दो सुयक्खधा, एगूणवीसं अज्झयणा, एगूणवीसं उद्देसणकाला, एगुणवीसं समुद्देसणकाला । संखेज्जा पयसहस्साइं पयग्गेणं, संखेज्जा अक्खरा, अणंता गमा, अणता पज्जवा, परित्ता तसा, अणंता थावरा । सासय कड णिबद्ध णिकाइया जिण पण्णत्ता भावा आघविज्जंति पण्णविज्जति परुविज्जति दंसिज्जति णिदंसिज्जंति, उवदंसिज्जंति । से एवं आया, एवं णाया, एवं विण्णाया, एवं चरण-करण-परुवणा आघविज्जइ । से तं णायाधम्म-कहाओ ।

सूत्र - 51 से कि त उवासगदसाओ ? उवासग दसासु ण समणोवासयाण णगराइ, उज्जाणाइ, चेइयाइ, वणसण्डाइ, समोसरणाइ, रायाणो, अम्मापियरो, धम्मायरिया, धम्मकहाओ इहलोइय परलोइया इड्ढि-विसेसा, भोग परिच्चाया, पव्वज्जाओ, परिआगा, सुय परिग्गहा, तवोवहाणाइ, सीलव्वय-गुणवेरमण-पच्चक्खाण-पोसहोववास-पडिवज्जणया, पडिमाओ, उवसग्गा, सलेहणाओ, भत्तपच्चक्खाणाइ, पाओव गमणाइ, देवलोग गमणाइं, सुकुल पच्चायाईओ, पुण-बोहिलाभा, अत किरियाओ य आघविज्जति ।

उवासग दसाण परित्ता वायणा, संखेज्जा अणुओगदारा, सखेज्जा वेढा, सखेज्जा सिलोगा, संखेज्जाओ णिज्जुत्तीओ, सखेज्जाओ सगहणीओ, संखेज्जाओ पडिवत्तीओ ।

से णं अगट्टयाए सत्तमे अगे एगे सुयक्खधे, दस अज्झयणा, दस उद्देसणकाला, दस समुद्देसण काला । सखेज्जा पयसहस्सा पयग्गेण, सखेज्जा अक्खरा, अणंता-गमा, अणंता-पज्जवा, परित्ता-तसा, अणता-थावरा । सासय कड णिबद्ध णिकाइया जिण पण्णत्ता भावा आघविज्जति पण्णविज्जति परूविज्जति दसिज्जति, णिदसिज्जति, उवससिज्जति । से एव आया, एव णाया, एव विण्णाया, एव चरण-करण-परूवणा आघविज्जइ, से त उवासगदसाओ ।

सूत्र - 52 से किं तं अंतगड दसाओ ? अतगड दसासु ण अतगडाणं णगराइ, उज्जाणाइ, चेइयाइ, वणसण्डाइं समोसरणाइ, रायाणो, अम्मापियरो, धम्मायरिया, धम्मकहाओ, इहलोइय परलोइया इड्ढि-विसेसा, भोग परिच्चाया, पव्वज्जाओ, परिआगा, सुय परिग्गहा, तवोवहाणाइ, सलेहणाओ, भत्त-पच्चक्खाणाइं पाओव गमणाइं, अत किरियाओ, आघविज्जति ।

अतगड दसासु ण परित्ता वायणा, सखिज्जा अणुओगदारा, सखेज्जा वेढा, सखेज्जा सिलोगा, सखेज्जाओ णिज्जुत्तीओ, सखेज्जाओ सगहणीओ, सखेज्जाओ पडिवत्तीओ ।

से णं अंगड्डयाए अड्डमे अंगे, एगे सुयक्खधे, अड्ड वग्गा, अड्ड उद्देसणकाला, अड्ड समुद्देसणकाला । संखेज्जाइं पयसहस्साइं पयग्गेण, संखेज्जा अक्खरा, अणंता-गमा, अणंता-पज्जवा, परित्ता-तसा अणता-थावरा । सासय कड णिबद्ध णिकाइया जिणपण्णत्ता भावा आघविज्जंति, पण्णविज्जति, परुविज्जंति, दंसिज्जंति, णिदसिज्जंति, उवदंसिज्जंति । से एवं आया, एवं णाया, एव विण्णाया, एवं चरण-करण-परुवणा आघविज्जइ । से तं अंतगड दसाओ ।

सूत्र — 54 से किं तं अणुत्तरोव-वाइय-दसाओ ? अणुत्तरोव-वाइयदसासु णं अणुत्तरोववाइयाणं णगराइं उज्जाणाइं, चेइयाइं, वणसण्डाइं, समोसरणाइं, रायाणो, अम्मापियरो धम्मायरिया, धम्मकहाओ, इहलोइय परलोइया इड्ढि-विसेसा, भोग-परिच्चाया, पव्वज्जाओ, परिआगा, सुय-परिग्गहा, तवोवहाणाइं, पडिमाओ, उवसग्गा, संलेहणाओ, भत्त-पच्चक्खाणाइं पाओव गमणाइं, अणुत्तरोव-वाइयत्ति उववत्ती, सुकुल पच्चायाइं, अपुणबोहि लाभा, अतकिरियाओ, आघविज्जंति ।

अणुत्तरोव-वाइय-दसासु णं परित्ता वायणा, संखेज्जा अणुओगदारा, संखेज्जा वेढा, संखेज्जा सिलोगा, संखेज्जाओ णिज्जुत्तीओ, संखेज्जाओ संगहणीओ, संखेज्जाओ पडिवत्तीओ ।

से णं अंगड्डयाए णवमे अंगे, एगे सुयक्खधे, तिण्णि वग्गा, तिण्णि उद्देसण-काला, तिण्णि समुद्देसणकाला । संखेज्जाइं, पयसहस्साइं पयग्गेणं, संखेज्जा अक्खरा, अणंता-गमा, अणंता-पज्जवा, परित्ता-तसा, अणंता-थावरा । सासय कड णिबद्ध णिकाइया जिणपण्णत्ता भावा आघविज्जंति, पण्णविज्जंति, परुविज्जंति, दंसिज्जंति, णिदंसिज्जंति, उवदंसिज्जंति । से एवं आया, एव णाया, एवं विण्णाया, एवं चरण-करण-परुवणा आघविज्जइ । से तं अणुत्तरोववाइय दसाओ ।

सूत्र - 55 से किं तं पण्हा वागरणाइं ? पण्हावागरणेसु ण अट्ठुत्तर पसिणसयं, अट्ठुत्तर अपसिणसय, अट्ठुत्तर पसिणापसिणसय, तजहा-अंगुड्ड-पसिणाइं, बाहु-पसिणाइ, अद्दाग-पसिणाइं, अण्णे वि विचित्ता विज्जाइसया, णाग-सुवण्णेहि सद्धि दिव्वा सवाया आघविज्जति ।

पण्हावागरणाणं परित्ता वायणा, संखेज्जा अणुओगदारा, संखेज्जा वेढा, संखेज्जा सिलोगा, संखेज्जाओ णिज्जुत्तीओ, संखेज्जाओ सगहणीओ, संखेज्जाओ पडिवत्तीओ ।

से ण अंगड्डयाए दसमे अगे, एगे सुयक्खंधे, पणयालीसं अज्झयणा, पणयालीसं उद्देसणकाला, पणयालीस समुद्देसणकाला । संखेज्जाइ पयसहस्साइं, पयग्गेणं संखेज्जा अक्खरा, अणता-गमा, अणता-पज्जवा, परित्ता-तसा, अणता-थावरा । सासय कड णिबद्ध णिकाइया जिणपण्णत्ता भावा आघविज्जति, पण्णविज्जति, परुविज्जति, दंसिज्जंति, णिदसिज्जंति, उवदसिज्जति । से एव आया, एव णाया, एवं विण्णाया, एवं चरण-करण-परुवणा आघविज्जइ । से त पण्हावागरणाइं ।

सूत्र - 56 से किं तं विवाग-सुयं ? विवाग-सुए ण सुकड दुक्कडाण कम्माण फलविवागे आघविज्जइ, तत्थ ण दस दुह-विवागा, दस सुह-विवागा ।

से किं तं दुह-विवागा ? दुह-विवागेसु ण दुह-विवागाणं णगराइ, उज्जाणाइं, वणसण्डाइ, चेइयाइ, समोसरणाइं, रायाणो, अम्मा-पियरो, धम्मायरिया, धम्म-कहाओ इहलोइय परलोइया इड्ढि-विसेसा णिरय गमणाइं, संसारभव पवचा दुह-परम्पराओ, दुकुल पच्चायाईओ, दुल्लह बोहियत्त आघविज्जइ । से तं दुहविवागा ।

से किं तं सुहविवागा ? सुह-विवागेसु ण सुहविवागाणं णगराइ, उज्जाणाइ, वणसण्डाइं, चेइयाइ, समोसरणाइं, रायाणो, अम्मा-पियरो,

धम्मायरिया, धम्म-कहाओ, इहलोइय परलोइया, इड्ढि-विसेसा, भोगपरिच्चागा, पव्वज्जाओ, परियागा, सुय-परिग्गहा, तवोवहाणाइ, संलेहणाओ, भत्त-पच्चक्खाणाइं, पाओव-गमणाइ, देवलोग-गमणाइं, सुह परम्पराओ, सुकुल पच्चायाईओ, पुण-बोहिलाभा, अंत-किरियाओ, आघविज्जति ।

विवाग सुयस्स णं परित्ता वायणा, संखेज्जा अणुओगदारा, संखेज्जा वेढा, संखेज्जा सिलोगा, सखेज्जाओ णिज्जुत्तीओ, संखिज्जाओ संगहणीओ, सखिज्जाओ पडिवत्तीओ ।

से णं अंगड्डयाए इक्कारसमे अंगे, दो सुयक्खधा, वीसं अज्झयणा, वीसं उद्देसणकाला, वीसं समुद्देसणकाला । सखिज्जाइं पयसहस्साइ, पयग्गेणं संखेज्जा अक्खरा, अणता-गमा, अणता पज्जवा, परित्ता-तसा, अणंता-थावरा । सासय कड णिबद्ध णिकाइया जिण पण्णत्ता भावा आघविज्जंति, पण्णविज्जंति, परुविज्जंति, दसिज्जति, णिदसिज्जति, उवदंसिज्जंति ।

से एवं आया, एवं णाया, एवं विण्णाया, एव चरण करण परुवणा आघविज्जइ । से तं विवागसुयं ।

सूत्र - 57 से किं तं दिड्ढिवाए ? दिड्ढिवाए णं सव्वभाव परुवणा आघविज्जइ, से समासओ पंचविहे पण्णत्ते, तंजहा-परिक्कमे, सुत्ताइं, पुव्वगए, अणुओगे, चूलिया ।

से कि त परिक्कमे ? परिक्कमे सत्तविहे पण्णत्ते, तजहा-सिद्ध सेणिया परिक्कमे, मणुस्स सेणिया परिक्कमे, पुट्टसेणिया परिक्कमे, ओगाढसेणिया परिक्कमे, उवसंपज्जण सेणिया-परिक्कमे, विप्पजहण सेणिया परिक्कमे, चुयाचुय सेणिया परिक्कमे ।

से किं तं सिद्धसेणिया परिक्कमे ? सिद्धसेणिया परिक्कमे चउद्दस विहे पण्णत्ते, तंजहा-माउगा-पयाइं, एगड्डिय-पयाइ, अट्ट-पयाइ, पाढो-आगास पयाइं केउ-भूयं, रासि बद्धं, एगगुणं, दुगुणं, तिगुणं,

केउ भूय, पडिग्गहो, ससार पडिग्गहो, णदावत्त, सिद्धावत्त, से तं सिद्धसेणिया-परिकम्मे ।

से कि तं मणुस्स सेणिया परिकम्मे ? मणुस्स-सेणिया परिकम्मे चउदस विहे पण्णत्ते, तजहा—माउया पयाइं, एगद्विय पयाइ, अइ पयाइ, पाढोआगास पयाइं, केउभूय, रासिबद्ध, एगगुण, दुगुणं, तिगुण, केऊभूयं, पडिग्गहो, ससार पडिग्गहो, णदावत्त, मणुस्सावत्तं । से तं मणुस्स-सेणिया परिकम्मे ।

से कि तं पुट्टसेणिया परिकम्मे ? पुट्टसेणिया परिकम्मे इक्कारस विहे पण्णत्ते, तजहा—पाढोआगास पयाइं, केउभूयं, रासिबद्धं, एगगुणं, दुगुण, तिगुणं, केउभूयं, पडिग्गहो, ससार पडिग्गहो, णदावत्त, पुट्टावत्त । से त पुट्टसेणिया परिकम्मे ।

से कि त ओगाढ सेणिया परिकम्मे ? ओगाढ सेणिया परिकम्मे इक्कारसविहे पण्णत्ते, तजहा—पाढोआगास पयाइ, केउभूय, रासिबद्धं, एगगुण, दुगुण, तिगुणं, केउभूय, पडिग्गहो, संसार पडिग्गहो, णदावत्त, ओगाढावत्तं । से त ओगाढसेणिया परिकम्मे ।

से कि त उवसपज्जण सेणिया परिकम्मे ? उवसपज्जण सेणिया-परिकम्मे इक्कारसविहे पण्णत्ते, तंजहा—पाढोआगास पयाइं, केउभूय, रासिबद्ध, एगगुणं, दुगुणं, तिगुण, केउभूय, पडिग्गहो, संसार पडिग्गहो, णदावत्त, उवसपज्जणावत्त । से तं उवसपज्जण सेणिया परिकम्मे ।

से किं त विप्पजहण-सेणिया-परिकम्मे ? विप्पजहण-सेणिया-परिकम्मे इक्कारसविहे पण्णत्ते, तंजहा—पाढोआगासपयाइ, केउभूय, रासिबद्ध, एगगुण, दुगुण, तिगुण, केउभूय, पडिग्गहो, ससार-पडिग्गहो, णदावत्त, विप्पजहणावत्त । से तं विप्पजहण-सेणिया-परिकम्मे ।

से किं त चुयाचुय-सेणिया-परिकम्मे ? चुयाचुय-सेणिया-परिकम्मे इक्कारसविहे पण्णत्ते, तजहा—पाढोआगास पयाइ, केउभूय, रासिबद्धं,

एगगुणं, दुगुणं, तिगुणं, केउभूयं, पडिग्गहो, संसारपडिग्गहो, णंदावत्त, चुयाचुयवत्तं । से तं चुयाचय-सेणिया-परिकम्मे । छ चउक्क-णइयाइ, सत्त तेरासियाइं । से तं परिकम्मे ।

से किं तं सुत्ताइ ? सुत्ताइं बावीसं पण्णत्ताइं, तंजहा-उज्जु-सुय, परिणया-परिणयं, बहुभंगियं, विजय-चरियं, अणं-तरं, परम्पर, आसाण, संजूहं, संभिण्णं, आहव्वायं, सोवत्थियावत्त, णंदावत्त, बहुलं, पुट्टापुट्ट, वियावत्तं, एवंभूयं, दुयावत्तं, वत्तमाणपयं, समभिरूढं, सव्वओ-भद, पस्सासं, दुप्पडिग्गहं ।

इच्चेइयाइं बावीसं सुत्ताइं छिण्णच्छेय णइयाणि ससमय सुत्त परिवाडीए, इच्चेइयाइं, बावीसं सुत्ताइं अच्छि-ण्णच्छेय णइयाणि आजीविय सुत्त परिवाडीए, इच्चेइयाइं बावीसं सुत्ताइं तिग-णइयाणि तेरासिय सुत्त परिवाडीए इच्चेइयाइं बावीस सुत्ताइं चउक्क णइयाणि ससमय सुत्त परिवाडीए, एवामेव सपुव्वावरेण-अट्टासीई सुत्ताइ भवंतीत्ति-मक्खायं । से तं सुत्ताइं ।

से किं तं पुव्वगए ?

पुव्वगए चउदसविहे पण्णत्ते, तंजहा - उप्पायपुव्वं, अग्गाणीय, वीरियं, अत्थिणत्थि-प्पवायं, णाण-प्पवायं, सच्च-प्पवाय, आय-प्पवाय, कम्म-प्पवायं, पच्चक्खाण-प्पवायं (पच्चक्खाणं) विज्जाणु-प्पवाय, अवंझं, पाणाऊ, किरिया विसालं, लोकबिदु सारं । उप्पाय-पुव्वस्स ण दस-वत्थू, चत्तारि-चूलियावत्थू पण्णत्ता । अग्गाणीय पुव्वस णं चोदस्स-वत्थू, दुवालस-चूलियावत्थू पण्णत्ता । वीरिय-पुव्वस्स णं अट्टवत्थू अट्टचूलियावत्थू पण्णत्ता । अत्थिणत्थि-प्पवाय-पुव्वस्स ण अट्टारस वत्थू, दस चूलियावत्थू पण्णत्ता । णाण-प्पवाय-पुव्वस्स ण वारस वत्थू पण्णत्ता । सच्चप्पवाय पुव्वस्स णं दोण्णि वत्थू पण्णत्ता । आयप्पवाय पुव्वस्स णं सोलस वत्थू पण्णत्ता । कम्मप्पवाय-पुव्वस्स ण तीसं वत्थू पण्णत्ता । पच्चक्खाण पुव्वस्स णं वीसं वत्थू पण्णत्ता । विज्जाणुप्पवाय

पुव्वस्स ण पण्णरस वत्थू पण्णत्ता । अवंझपुव्वस्स णं बारस वत्थू पण्णत्ता । पाणाउ पुव्वस्स णं तेरस वत्थू पण्णत्ता । किरिया -विसाल-पुव्वस्स णं तीसं वत्थू पण्णत्ता । लोकबिदुसार-पुव्वस्स ण पणवीसं वत्थू पण्णत्ता ।

दस, चोदस, अद्द, अद्धारस, बारस, दुवे य, वत्थूणि ।

सोलस, तीसा, वीसा, पण्णरस, अणुप्पवायम्मि ।।89 ।।

बारस इक्कारसमे ? बारसमे तेरसेव वत्थूणि ।

तीसा पुण तेरसमे, चोदसमे पण्णवीसाओ ।।90 ।।

चत्तारि, दुवालस, अद्द चेव दस चेव चुल्लवत्थूणि ।

आइल्लाण चउण्हं, सेसाण चूलिया-णत्थि ।।91 ।।

से तं पुव्वगए (3)

अनुयोग

से किं तं अणुओगे ? अणुओगे दुविहे पण्णत्ते, तंजहा — मूलपढ-माणुओगे, गंडियाणुओगे य ।

से किं त मूलपढमाणुओगे ? मूलपढमाणुओगे णं अरिहंताण भगवताणं पुव्वभवा, देवलोग गमणाइं, आउ, चवणाइं, जम्मणाणि, अभिसेया, रायवर-सिरीओ, पव्वज्जाओ, तवाइं य उग्गा, केवल-णाणुप्पयाओ, तित्थ-पवत्तणाणि य, सीसा, गणा, गणहरा, अज्जापवत्तिणीओ सघस्स-चउव्विहस्स जं च परिमाण, जिण मणपज्जव ओहिणाणी, सम्मत्तसुय णाणिणो य, वाई, अणुत्तरगई य, उत्तर-वेउव्विणो य मुणिणो, जत्तिया सिद्धा, सिद्धिपहो जह देसिओ, जच्चिर च काल, पाओवगया, जे जहिं जत्तियाइं भत्ताइ अणसणाए छेइत्ता अतगडे, मुणिवरुत्तमे, तिमिरओघ विप्पमुक्के मुखसुहमणुत्तर च पत्ते, एवमण्णे य एवमाइ भावा मूलपढमाणुओगे कहिया । से त मूलपढमाणुओगे ।

• से कि त गण्डियाणुओगे ? गण्डियाणुओगे कुलगर गण्डियाओ,

निष्कामर गण्डियाओ, चक्रवृद्धि गण्डियाओ, दसार गण्डियाओ, नल्लदेव गण्डियाओ, वासुदेव गण्डियाओ, गणधर गण्डियाओ, भद्रबाहु गण्डियाओ, तलोकम्म गण्डियाओ, हरिवंस गण्डियाओ, उरसपिणी गण्डियाओ, ओंसापिणी गण्डियाओ, चित्तंतर गण्डियाओ, अमर णर निरय निरय गड-गमण-विविह परियट्टणाणु ओगेसु एवमाइयाओ गण्डियाओ अणविज्जति, पण्णविज्जति । से तं गण्डियाणुओगे, से तं अणुओगे ।

से तं च चूलियाओ ? चूलियाओ आइल्लाणं चउण्हं पुव्वाणं, चूलियाओ, सराड पुव्वाइं अचूलियाइं । से तं चूलियाओ ।

द्विडियायसरा ण परिता वायणा, संखेज्जा अणुओगदारा, संखेज्जा-जडा, संखेज्जा सिलोगा, संखेज्जाओ पडिवत्तीओ, संखेज्जाओ पिञ्जुतीओ, संखेज्जाओ रांगहणीओ ।

से ण उणद्धयाए वारसामे अगे, एगे सुयक्खंधे, चोदस-पुव्वाइं, संखेज्जा तथु, संखेज्जा चूलवत्थू, संखेज्जा-पाहुडा, संखेज्जा पाहुड-पाहुडा, संखेज्जाओ पाहुडियाओ, संखेज्जाओ पाहुड-पाहुडियाओ । संखेज्जाइं पया-सहरसाइ पयग्गेणं, संखेज्जा अक्खरा, अणंता-गमा, अणंता-मज्जया, परिता-तरा, अणंता-थावरा । सासय कड पिबद्ध णाज्या जिण पण्णता भावा आघविज्जंति पण्णविज्जति, पसविज्जंति, दसिज्जति, पिदंसिज्जति, उवदंसिज्जति । से एवं आया, एवं णाया, एवं विण्णाया, एवं चरण करण-परुवणा आघविज्जंति । से तं दिट्ठियाए ।। 12 ।।

सूत्र - 58 इच्चेइयम्मि दुवालसंगे गणिपिडगे अणंता-भावा, अणंता-अभावा, अणंता-हेऊ, अणंता अहेऊ, अणंता-कारणा, अणंता अकारणा, अणंता जीवा, अणंता अजीवा, अणंता भवसिद्धिया, अणंता अभवसिद्धिया, अणंता सिद्धा, अणता असिद्धा पण्णता-

भाव-मभावा हेऊ-महेऊ, कारण-मकारणे चेव ।
जीवाजीवा भवियमभविया, सिद्धा असिद्धा य ।। 92 ।।

इच्चेइयं दुवालसंगं गणिपिडग तीए काले अणता जीवा आणाए विराहिता चाउरन्तं संसार कन्तारं अणुपरियट्टिसु। इच्चेइयं दुवालसंगं गणिपिडग पडुप्पण्णकाले परित्ता जीवा आणाए विराहिता चाउरन्तं संसारकन्तार अणुपरियट्टंति। इच्चेइयं दुवालसंगं गणिपिडग अणागए काले अणता जीवा आणाए विराहिता चाउरन्तं संसार कन्तार अणुपरियट्टिस्सति।

इच्चेइयं दुवालसंगं गणिपिडगं तीए काले अणता जीवा आणाए आराहिता चाउरन्तं संसारकन्तारं वीइवइंसु। इच्चेइयं दुवालसंगं गणिपिडग पडुप्पण्णकाले परित्ता जीवा आणाए आराहिता चाउरन्तं संसार कन्तारं वीईवयति। इच्चेइयं दुवालसंगं गणिपिडगं अणागए काले अणंत जीवा आणाए आराहिता चाउरन्तं संसार कन्तारं वीईवइस्सति।

इच्चेइयं दुवालसंगं गणिपिडगं ण कयाइ णासी, ण कयाइ ण भवइ, ण कयाइ ण भविस्सइ। भूवि च, भवइ य, भविस्सइ य। धुवे, णियए, सासए, अक्खए, अव्वए, अवट्टिए, णिच्चे।

से जहाणामए पचत्थिकाए ण कयाइ णासी, ण कयाइ णत्थि, ण कयाइ ण भविस्सइ। भूवि च, भवइ य, भविस्सइ य, धुवे, णियए, सासए अक्खए, अव्वए, अवट्टिए, णिच्चे। एवामेव दुवालसंगं गणिपिडगं ण कयाइ णासी, ण कयाइ णत्थि, ण कयाइ ण भविस्सइ। भूवि च, भवइ य, भविस्सइ य, धुवे, णियए, सासए, अक्खए, अव्वए, अवट्टिए, णिच्चे।

से समासओ चउत्विहे पण्णत्ते, तंजहा—दव्वओ, खित्तओ, कालओ, भावओ।

तत्थ-दव्वओ णं सुयणाणी उवउत्ते सव्वदव्वाइं जाणइ पासइ।

खित्तओ णं सुयणाणी उवउत्ते सव्व खेतं जाणइ पासइ।

कालओ णं सुयणाणी उवउत्ते सव्वं कालं जाणइ पासइ।

भावओ णं सुयणाणी उवउत्ते सव्वे भावे जाणइ पासइ।

इच्चेइयं दुवालसग गणिपिडगं तीए काले अणंता जीवा आणाए विराहिता चाउरन्तं संसार कन्तारं अणुपरियट्टिसु । इच्चेइयं दुवालसग गणिपिडग पडुप्पण्णकाले परिता जीवा आणाए विराहिता चाउरन्तं संसारकन्तारं अणुपरियट्टंति । इच्चेइयं दुवालसग गणिपिडगं अणागए काले अणता जीवा आणाए विराहिता चाउरन्त संसार कन्तारं अणुपरियट्टिस्सति ।

इच्चेइयं दुवालसंग गणिपिडगं तीए काले अणता जीवा आणाए आराहिता चाउरन्तं संसारकन्तारं वीइवइंसु । इच्चेइयं दुवालसंगं गणिपिडग पडुप्पण्णकाले परिता जीवा आणाए आराहिता चाउरन्त संसार कन्तार वीइवयंति । इच्चेइयं दुवालसग गणिपिडगं अणागए काले अणत जीवा आणाए आराहिता चाउरन्तं संसार कन्तारं वीइवइस्सति ।

इच्चेइयं दुवालसंगं गणिपिडगं ण कयाइ णासी, ण कयाइ ण भवइ, ण कयाइ ण भविस्सइ । भूविं च, भवइ य, भविस्सइ य । धुवे, णियए, सासए, अक्खए, अब्बए, अवट्टिए, णिच्चे ।

से जहाणामए पंचत्थिकाए ण कयाइ णासी, ण कयाइ णत्थि, ण कयाइ ण भविस्सइ । भूवि च, भवइ य, भविस्सइ य, धुवे, णियए, सासए अक्खए, अब्बए, अवट्टिए, णिच्चे । एवामेव दुवालसंगं गणिपिडगं ण कयाइ णासी, ण कयाइ णत्थि, ण कयाइ ण भविस्सइ । भूवि च, भवइ य, भविस्सइ य, धुवे, णियए, सासए, अक्खए, अब्बए, अवट्टिए, णिच्चे ।

से समासओ चउत्विहे पण्णत्ते, तंजहा—दव्वओ, खित्तओ, कालओ, भावओ ।

तत्थ-दव्वओ णं सुयणाणी उवउत्ते सव्वदव्वाइं जाणइ पासइ ।
 खित्तओ णं सुयणाणी उवउत्ते सव्वं खेत्त जाणइ पासइ ।
 कालओ ण सुयणाणी उवउत्ते सव्वं कालं जाणइ पासइ ।
 भावओ ण सुयणाणी उवउत्ते सव्वे भावे जाणइ पासइ ।

अक्खर सण्णी सम्मं, साइय खलु सपज्जत्तिये च।
 गमियं अंगपविट्ठं, सत्तवि एए सपडिपुच्छइ ॥१॥
 आगम-सत्थग्गहणं, जे बुद्धि गुणेहि अह्मि विरु।
 विंति सुयणाण लम्मं, तं पुव्व-विरारया वीरा ॥२॥
 सुस्सूसइ पडिपुच्छइ, सुणेइ गिण्हइ य ईहए यत्तं ॥३॥
 तत्तो अपोहए वा, धारेइ करेइ वा सम्म ॥४॥
 मूअं हुंकारं वा, वाढक्कारं पडिपुच्छ वीमंसा।
 तत्तो पसंग-पारायणं च, परिणिट्ठ सत्तमए ॥५॥
 सुत्तत्थो खलु पढमो, वीओ णिज्जुत्ति मीसिओ भणित्ठे।
 तइओ य णिरवसेसो, एस विही होइ अणुत्तोमे ॥६॥

से तं अंग अंगपविट्ठं । से तं सुयणाण । से त परोक्षणा
 तं णंदी ।

॥ णंदीसत्तं समत्तं ॥

श्री ऋषभदेव भगवान् शिलोका

सरसत सांवण तुज पायेजी लागु, जाणु तो तुमिं गर्भजे
 रीषभदेवजी रा केंसुं शिलोको, एकण चित करने सम्म
 लोको ॥१॥ नगरी यनीता भली वीराजें, जिणमें तो सम्म न
 छाजे । माता मोरादेजी गर्भज धरीयो, ज्यांरी तो कुरा भगव
 अवतारीया ॥२॥ जनम्या कंवरजी जुगत्या सुख पावे, कौरव
 मिल सागे नवरावे । छप्पन कंवारी मिल मोछय कीनो, नाम
 जिनेश्वर दिनो ॥३॥ दिन-दिन कंवरजी हुमा छे भाग्य भ
 ने दादोजी वंठा । वीर लाख पूरय में कंवरजी हुमा सुमप
 रा दिना छे दुदा ॥४॥ परन्या सुगंगला छे अर्ध शत

जनम्या जोडा भाई। भरतजी सग बिरामी जाई, बाहुबल संग
 सुन्दरी बाई।।5।। रीषभ जिनेश्वर मन मे विचारे, जुगल्यारे धर्म
 करणो जी न्यारो। जोडा पलटाइने लगन लिखाओ, भरत बाहुबल
 सारा परणावो।।6।। तीजो तो आरो उतरतो आयो, कल्पवृक्ष तो
 ईसडी फुरमावे। मै थारी मनस्या पूर्ण करस्या, थे मारा धणी होय
 कर बैठा।।7।। इसडी बाता तो हमने नही रे सुहावे, जुगल्या तो
 जाय नाम ने केवे। थे मांरो न्याव कीजो महाराजा, मनसा पूरण
 दीजो जी ताजा।।8।। नाम राजा तो मुखसुं फुरमावे रीषभ कने
 थारो न्याव करावो। रीषभजी आप कचेडी मे आवे, नाम राजा तो
 इसडी फुरमावे।।9।। जुगल्यारो न्याव तुहीज कीजे, मारे ताई तो
 आवण मत दीजो। न्याव पृथ्वी रो बराबर कीजो, लोक सारो ने
 दिलासा दिजो।।10।। पृथ्वी उपर तो उद्योत किजो, हुक्म पिता रो
 तुरन्त उटावो। जुगल्या साराने धंधो भोलायो सार फेरी ने चावल
 नीपजावो।।11।। हुवा चावल ने जुगल्या ने दिना, पाणी पिवोने
 चावल खाओ। इसडी बातां सुं सारा सुख पावो, कोरा काचा से
 जुगल्या दुख पावे।।12।। नाके अग्नि मे आप गटकावे जुगल्या तो
 जाय रीषभजी ने केवे, इसडी बातां सु हम तो सारा दुख पावां,
 रीषभजी आप कलश बणावे।।13।। माटी रा कलशा अगनी मे
 पकावे, चावल पानी रो मेल बतावे। इसडी बाता सुं सारो सुख पावे,
 अबे भगवन्तजी सदा नचीता।।14।। त्रेसठ लाख पूरब बिच मे जी
 बीता, जीव दया रा मोटा उपकारी। संसार जाणे काची जी काया,
 तपकर सोसी आपरी काया।।15।। प्रभाते उठी लागा माताजी रे
 पावो, माताजी माने आज्ञा दिरावो, आज्ञा देवो तो दिक्षा मे लेसा,
 जैन धर्म रो उद्योत करसां।।16।। आदि जिनेश्वर अरिहन्त कहवा
 सा, माताजी थारो दूध उजवाला। आज्ञा माता रो सुख वे ज्यू
 किजी, पलक-पलक मे माने काई पूछो।।17।। आज्ञा लेयने बारे जी

शरण चारुइ मांगलिक कारी ।। 30 ।। नव कडासु गुणों नोकरवाली,
 एकण चित होय ने सामायिक ठाओ । भव भवरा पातक दूर गमावो,
 भगवन्तरो वरण कैसो बखांणो ।। 31 ।। रत्नारी रास अमी चंदन
 जीऊं, जाणो वृषन लंछण ने कंचन बखांणो । घज्जा कलश ने
 रतनागर दुदो, गज गन्तो गेवर सिंधु ज्युं गुंजो ।। 32 ।। इसडी वातां
 तो माता सुण लीनी, पुत्र बांदनरी त्यारीजी कीनी । भरत ने कहवो
 नगरी सिणगारो, बन्दु अरिहन्त ने रीषम हमारो ।। 33 ।। माताजी
 मननें हर्ष बदाई, हाथी रे ऊपर करी भारी सजाई । चढीया माता
 नोरादेवीजी नंगल गावे, समोशरण सुनेडा जी आवे ।। 34 ।। देखी
 सायबी पुत्र की भारी, मुगत जावण री कीधी छे त्यारी । धिगाधिग
 जीवड़ा हियोड़ा फुटा, किणरा माता ने किणराजी देटा ।। 35 ।।
 कीणरा नाइने किणरी नोजाई, किणरी बाई ने किणरी जी जाई ।
 भव जीवां थी पातक रंगराचो, घर के कुचुंबो मुंगती को ताजो ।। 36 ।।
 नातां मोरादेजी केवल उपजायो, गज होदे वैठा मुगत सिवाया ।
 रीषन जिनेश्वर ब्यारज कीनो, मका में जायने पांवडा घरीया ।। 37 ।।
 आदम बाबारी जोत सवाई, बाहुवल कने जावे दवाई । बाहुवल कीदी
 बान्दणा की त्यारी पुत्र पोता ने सेना सिणगारी ।। 38 ।। पो उटे
 भगवन्तरा दर्शन कुं जासां, पुत्र पोता ने लेसा जी साथे । रीद्ध सायबी
 गणीजी लेसां, पो उटे बाहुवल दर्शन कुं आवे ।। 39 ।। आदम-आदम
 कर गणा पुकारे, चरणां रे आगे धूप खेवावे । मका रे माये चोतले
 करावे, पगल्यां ऊपर रतन जड़ावे ।। 40 ।। मका रे माये पगल्या छे
 भारी, मुसलमान की डी जावण की त्यारी, भरतजी स्या भरत खंड
 माई, बाहुवल सय मकारे मायी ।। 41 ।। भरत की स्याही प्रथमां सुं
 पुंजे, बाहुवली की स्याही पगलीया सुं पुंजे । आप भगवन्तजां मुक्ति
 सिधाया, जैन धर्म में मोटी छे दैया ।। 42 ।। ज्यांरा तो गुण रिख
 केवलचदजी गाया, भरत खंतर म धिचरता आया, समत रगणीसे



पेकखवि निरुवम रूव जास, जण जपे किचिये ।
 एकाकी किल भित्त इत्थ, गुण मेल्या सचिय ।
 अहवा निच्चय पुव्व जम्म, जिणवर इण अचिय ।
 रभा पउमा गउरी गग, रतिहा विधि वंचिय ॥5॥
 नय बुध नय गुरु कविण कोय, जसु आगल रहियो ।
 पच सया गुण पात्र छात्र, हीडे परवरियो ।
 करय निरतर यज्ञ करम, मिथ्यामति मोहिय ।
 अणचल होसे चरम नाण, दसणह विसेहिय ॥6॥

॥ वस्तु ॥

जबूदीव जुबूदीव भरह वासमि, खोणीतल मंडण ।
 मगह देस सेणिय नरेसर,
 वर गुव्वर गाम तिहां, विप्प वसे वसुभूइ सुन्दर ।
 तसु पुहवि भज्जा, सयल गुण गण रूव निहाण ।
 ताण पुत्त विज्जानिलो, गोयम अतिहि सुजाण ॥7॥

॥ भास ॥

चरम जिणेसर केवलनाणी, चौविह संघपइट्टाजाणी ।
 पावापुर सामी सपत्तो, चउविह देवनिकायहि जुत्तो ॥8॥
 देवहि समवसरण तिहा, कीजे, जिण दीठे मिथ्यामति छीजे ।
 त्रिभुवन गुरु सिहासन वैठा, ततखिण मोह दिगत पइट्टा ॥9॥
 क्रोध मान माया मद पूरा, जाये नाठा जिम दिन चोरा ।
 देव दुदुमि आगासे बाजी, धरम नरेसर आव्यो गाजी ॥10॥
 कुसुम वृष्टि विरचे तिहा देवा, चउसठ इन्द्रज मांगे सेवा ।
 चामर छत्र सिरोवरि सोहे, रूवहि जिनवर जग सहु मोहे ॥11॥
 उपसम रसभर वर वरसंता, जोजन वाणि वखाण करता ।
 जाणिवि वर्द्धमान जिन पाया, सुर नर किन्नर आवइ राया ॥12॥
 कतसमोहिय जलहलकंता, गयणविमाणहि रणरणकंता ।

पेक्खवि इन्द्रमूइ मन चिंते, सुर आवे अम यइ हुवंते ।
 तीर तरंडक जिन ते वहता, समवसरण पुहता गहगहि
 तो अमिमाने गोयम जंपे, इण अवत्तर कोपें तणु कपे ।
 नूढा लोक अजाण्युं बोले, सुर जाणंता इम काई डोढं
 मो आगल कोई जाण मणीजे, मेरु अवर किम उपमा

॥ वस्तु ॥

वीर जिणवर वीर जिणवर नाण सम्पन्न, पावापुर सुर
 पत्त नाह संसार तारण, तिहिं देवइ निम्महिय,
 समवसरण बहु सुक्ख कारण,
 जिणवर जग उज्जोय करै, तेजहि कर दिनकर ।
 सिंहासण सामी ठव्यो, हुओ तो जय जयकार ॥१६॥

॥ भास ॥

तो चढियो घणमाण गजे, इन्द्रमूइ भूदेव तो,
 हुंकारो करी संचरिय, कवणसुजिणवर देवतो ।
 जोजन भूमि समवसरण, पेक्खवि प्रथनारंम तो,
 दस दिस देखे विबुधवधू आवंति सुररंम तो ॥१७॥
 मणिमय तोरण दंड ध्वज, कोसीसे नवघाट तो,
 वइर विवर्जित जंतुगण, प्रातिहारिज आठ तो ।
 सुर नर किन्नर असुरवर, इंद्र इंद्राणी राय तो,
 चित्त चमविकय चिंतवै, सेवंता प्रमु पाय तो ॥१८॥
 सहस्रकिरण सामी वीरजिण, पेखिय रूप विशाल तो;
 एह असंभव संभव ए, साचो ए इंद्रजाल तो ।
 तो बोलावइ त्रिजग गुरु, इंद्रमूइ नामेण तो,
 श्री मुख संस्तय सामी सवे, फेडे वेद पएण तो ॥१९॥
 मान मेलि मद ठेलि करी भगतिहिं नाम्यो सीस तो ।
 पंच सयासुं व्रत लियो ए, गोयम पहिलो सीस तो ।

बंधव संजन सुणिवि करी अगनिभूइ आवेय तो,
 नाम लेई आमास करे, ते पण प्रतिबोधेय तो ॥20॥
 इण अनुक्रम गणहर रयण, थाप्या वीर इग्यार तो,
 तो उपदेशे भुवन गुरु, संयमशुं व्रत वारतो।
 बिहुं उपवासे पारणो ए, आपणपे विहरंत तो,
 गोयन संजन जग सयल, जय जयकार करंत तो ॥21॥

॥ वस्तु ॥

इन्द्रभूइ इन्द्रभूइ चढियो बहुमान हुंकारे करि कपत्ते
 समवसरण पहुतो तुरंत तो, जे जे सत्ता सामि सवे,
 चरमनाह फेडे फुरंत तो, बोधिवीज सजाय नने,
 गोयम भवहि विरत्त, दिक्खा लेई सिक्खा सही,
 गणहर पय संपत्त ॥22॥

॥ भास ॥

आज हुयो सुविहाण, आज पचेलिमां पुण्य भरो,
 दीठा गोयम सामि, जो निय नयणे अमिय झरो,
 समवसरण मझार, जे जे संसय ऊपजे ए,
 ते ते पर उपगार कारण पूछे मुनि पवरो ॥23॥
 जिहां जिहां दीजे दीख, तिहां तिहां केवल उपजेए,
 आप कने अणहुंत, गोयम दीजे दान इन।
 गुरु ऊपर गुरु भक्ति, सामी गोयम ऊपनिय,
 इणिछल केवलनाण, रागज राखे रंग भरे ॥24॥
 जो अष्टापद सेल, वंदे चढि चउवीस जिण,
 आतम लखिवसेण, चरन सरीरी सो य मुनि।
 इस देसणा निसुणेह, गोयम गणहर संचरिय,
 तापस पन्नरत्तएण, तो मुनि दीठो आवतो ए ॥25॥
 तप सोसिय निय अंग-अम्हां संगति न उपजे ए,

किम चढसे दृढकाय, गज जिम दीसे गाजतो ए,
 गिरुओ ए अभिमान, तापस जो मन चिंतवे ए।
 तो मुनि चढियो वेग, आलंबवि दिनकर किरण ॥26 ॥
 कंचण मणि निष्पन्न दंडकलस ध्वजवड सहिय,
 पेखवि परमाणन्द, जिणहर भरतेरस महिय।
 निय निय काय प्रमाण, चहुँ दिसि सठिय जिणह बिम्ब,
 पणमवि मन उल्लास, गोयम गणहर तिहा वसिय ॥27 ॥
 वयर सामीनो जीव, तिर्यक जृंभक देव तिहां।
 प्रतिबोध्या पुडरीक, कंडरिक अध्ययन भणी।
 वलता गोयम सामि, सवितापस प्रतिबोध करे,
 लेई आपण साथ, चाले जिम जूथाधिपति ॥28 ॥
 खीर खांड घृत आण, अमिय वूठ अगुठ ठवे,
 गोयम एकण पात्र करावे, पारणो सवे।
 पच सया शुभ भाव, उज्ज्वल भरियो खीर मिसे।
 साचा गुरु संयोग, कवल ते केवल रूप हुआ ॥29 ॥
 पञ्च सया जिणणाह, समवसरण प्राकारत्रय,
 पेखवि केवल नाण, उप्पन्नो उज्जोय करे।
 जाणे जणवि पीयूष गाजती घन मेघ जिम,
 निसुणेवि, नाणी हुआ पंचसया ॥30 ॥

॥ वस्तु ॥

इण अनुक्रम इण अनुक्रम नाण संपन्न पन्नरसे,
 उप्पन्न परिवरिय, हरिदुरिय जिणणाह वंदइ।
 जाणेवि जगगुरु वयण, तिहि नाण अप्पाण निंदइ।
 चरम जिणेसर इम भणे, गोयम म करिस खेह,
 छेह जाय आपण सही, होस्या तुल्ला बेव ॥31 ॥

॥ भास ॥

सामियो ए वीर जिणन्द, पूनमचन्द जिम उलसिय,
विहरियो ए भरहवासम्मि, वरस बहुत्तर संवसिय ।
ठवतो ए कणय पउमेण, पाय कमल संघै सहिय,
आवियो ए नयणानंद, नयर पावापुर सुरमहिय ।।32।।
पेसियो ए गोयम सामि देवसर्मा प्रतिबोध करे,
आपणो ए तिसला देवि, नंदन पुहतो परमपए ।
वलतो ए देव आकाश, पेखवि जाण्यो जिण समए,
तो मुनि ए मन विखवाद, नाद भेद जिम ऊपनो ए ।।33।।
इण समे ए सामिय देखि, आप कनांसु टालिया ए,
जाणतो ए तिहुअण नाह, लोक विवहार न पालियो ए ।
अतिभलो ए कीधलो सामि जाण्यो केवल मागसे ए,
चिन्तव्यो ए बालक जेम, अहवा केडे लागसे ए ।।34।।
हुँ किम ए वीर जिणद, भगतिहि भोले भोलव्यो ए,
आपणो ए अविचल नेह, नाह न संपइ साचव्यो ए,
साचो ए वीतराग, नेह न हेजे लालियो ए ।
तिणसमे ए गोयम चित्त, राग वैरागे वालियो ।।35।।
आवतो ए जो उल्लट्ट, रहितो रागे साहियो ए,
केवल ए नाण उप्पन्न, गोयम सहिज ऊमाहियो ए ।
तिहुअण ए जय जयकार केवल महिमा सुर करे ए,
गणधरू ए करय बखाण, भविया भव जिम निस्तरे ए ।।36।।

॥ वस्तु ॥

पढम गणहर पढम गणहर बरस पच्चास गिहवासे सवसिय,
तहा बरस सजम विभूसिय, सिरि केवल नाण पुण,
बार बरस तिहुअण नमंसिय ।

राजगृही नयरी उद्यो वाणवड़ बरसाउ,
सामी गोयम गुणनिलो, होसे सिवपुर ठाउ ॥३७॥

॥ भास ॥

जिम सहकारे कोयल टहुके, जिम कुसुमावन परिमल महके,
जिम चन्दन सोगंध निधि, जिन गंगाजल लहरिया लहके,
जिम कणयाचल तेजे झलके, तिम गोयम सोभाग निधि ॥३८॥
जिम मानसरोवर निवसे हंसा, जिम सुरतरु वर कणयवतंसा,
जिम महुयर राजीव बनें, जिम रयणायर रयणे विलसे,
जिम अंबर तारागण विकसे, तिम गोयम गुरु केवल घनें ॥३९॥
पूनम निसि जिम ससियर सोहे, सुरतरु महिमा जिम जग मोहै,
पूरब दिस जिम सहसकरो, पञ्चानन जिम गिरिवर राजे,
नरवई घर जिम मयगल गाजे, तिम जिनसासन मुनि पवरो ॥४०॥
जिम सुर तरुवर सोहे साखा, जिम उत्तम मुख मधुरी भाषा,
जिम वन केतकि महमहे ए, जिम भूमिपति भुयबल चमके,
जिम जिन मन्दिर घण्टा रणके, गोयम लखे गहगह्यो ए ॥४१॥
चिन्तामणि कर चढियो आज, सुरतरु सारे वंछित काज,
कामकुम्भ सहु वशि हुआ ए, कामगवी पूरे मन कामी,
अष्ट महासिद्धि आवे धामी, सामी गोयम अणुसरो ए ॥४२॥
पणवक्खर पहिलो पमणीजे, माया बीजो श्रवण सुणीजे,
श्रीमती सोमा संभवए, देवां धुर अरिहंत नमीजे,
विनयपहु उवझाय थुणीजे, इण मंत्रै गोयम नमो ए ॥४३॥
पर घर वसतां कांइ करीजे, देस देसांतर कांइ भमीजे,
कवण काज आयास करो, प्रह उठी गोयम समरीजे,
काज समगल ततखिण सीजे, नव निधि विलसे तिहां घरे ए ॥४४॥
चउदह सय बारोत्तर वरसे, गोयम गणहर केवल दिवसे,
कियो कवित्त उपगार परो, आदिहिं मंगल ए पमणीजे,

चौबीसी

मनवा छोड रे राग न द्वेष, खमाले सुध भाव से ।
आया पक्खी पर्व महान, खमाले सुध भाव से ॥
ऋषभ अजित संभव अभिनन्दन सुमति पद्म सुपार्श्व ।
चन्दा प्रभुजी सुविधि शीतलजी श्री हस वासु पूज्य राज ।
विमल अनत धर्म शान्ति जिन खमाले सुध भाव से ।
कुंथु अर मल्लि जाण, मुनि सुव्रत नमि नेम जी ।

पारस महावीर धीरे—खमाले

श्री मदिर युगमदिर स्वामी, बाहु सुबाहु सुजात ।
विशाल वज्र चदाननजी, चन्द भुजंग स्वाम ।
ईश्वर नेम वीर सेनजी, महाभद्र देव अजीत नाथ ।
महाविदेह में चौथो आरो, विचर रहा जिनराज जी ।
मैं तो रहती भरत क्षेत्र मे, कैसे काटूला कर्म आठ ।
इन्द्र अग्नि वायुभूतिजी, व्यक्त सुधर्मा साथ ।
पांच-पाच से शिष्य तारे, दिक्षा लेने बण गया नाथ ।
मडी मौरी अकम्प अचलजी, मेतारज श्रीप्रभास ।
ग्यारही गणधर वीर प्रभु रा ब्राह्मण कुल अवतार ।
ब्राह्मी सुन्दरी राजुल चन्दना, ध्यान धरी चितलाय ।
कौशल्या सीता अतिद द्रोपदी साहु बहु सुखदाय ।
चेलना प्रभावति मृगावति सुलसा सुभद्रा
शिवा प्रभा दमयति नलपति नार ।
हु.सि.ऊ.चौ.श्री जगनाना जाप जपो सुबह शाम ।
करे निरन्तर राम राज्य केसर चावे आठो याम ।

पंच परमेष्ठि

तर्ज : जरा समाने.. .

जरा श्रद्धा से सुमिरन करीये, यह महामंत्र नवकार है ।
शुद्ध मन से करे जा उपासना, उस व्यक्ति का बेडा पार है ॥ 1 ॥
दर्शन ज्ञान अनन्त शुद्ध रूप से जाग रहा अर्हन्त ॥
यथाख्यात चारित्र शक्ति गुण पूर्ण रूप से राग रहा ।
जो अरिहन्त पद के धार है, उन्हे बार-बार मेरा नमस्कार है ॥ 1 ॥
अष्ट कर्म बन्धन से जिनको सदा काल विसराम मिलता सिद्ध ।
आव्याबाध सुख और अटल, अवगाहन अक्षय धाम मिला ॥
इसलिए तो सिद्ध श्रेयकार है, उन्हे बार-बार मेरा नमस्कार है ॥ 2 ॥
आठ सम्पदाओ से जिनका, जीवन अंग में राज रहा आचार्य ।
सद वचनो से सकल संघ, पर समता शासन छाज रहा ।
छत्तीस गुणो के धार हैं, उन्हें बार-बार मेरा नमस्कार है ॥ 3 ॥
लोकोत्तर दीपक प्रकाश, मोक्ष मार्ग सब पाते हैं ॥
पच प्रकारा चार चरणा, विधि करते और करवाते ॥
जिनशासन के खेवनहार है, उन्हे बार-बार मेरा नमस्कार है ॥ 4 ॥
वीतराग श्रुत चरण करण के, नय प्रमाण से ज्ञाता है ॥
जिनक चरण कमल मे रह कर, धर्म बोध जग पता है ॥
जो उपाध्याय उर हार है, उन्हे बार-बार मेरा नमस्कार है ॥ 5 ॥
सम्यक दर्शन युक्त जगत मे, पच महाव्रत पाल रहे ।
सदा श्रमण निर्ग्रन्थ धर्म मे, जीवन अपना ढाल रहे ।
जो सचे साधु अणगार है, उन्हे बार-बार मेरा नमस्कार है ॥ 6 ॥
सर्व श्रेष्ठ मंगलो मे मगल, सब मत्रो मे मत्र महान प्रधान ।
सब सूत्रो मे सूत्र सार यह, सब धर्मो मे धर्म प्रधान ।
सब पापो का नाशनहार है, उन्हे बार-बार मेरा नमस्कार है ॥ 7 ॥



पंच परमेष्ठि महा मंत्र में, जिनका मन रम जाता है।
 लौकिक और लोकोत्तर सब, संकटों से वह बच जाता है।
 हो जाता सुमेरु भव पार है, उन्हें बार-बार मेरा नमस्कार है।।8।।

: मेरी भावना :

जिसने राग द्वेष कानादिक जीते, सब जग जान लिया।
 सब जीवों को मोक्ष मार्ग का, निस्पृह हो उपदेश दिया।
 बुद्ध वीर जिन हरिहर ब्रह्मा, या उसको स्वर्धीन कहां।
 नक्ति भाव से प्रेरित हो यह, वित्त उसी में लीन रहो।।1।।

विषयों की आशा नहीं जिनके, साम्य भाव धन रखते हैं।
 निज-पर के हित-साधन में जो, निरादिन तत्पर रहते हैं।
 स्वार्थत्याग की कठिन तपस्या, बिना खेद जो करते हैं।
 ऐसे ज्ञानी सावु जगत् के, दुःख समूह को हरते हैं।।2।।

रहे सदा सत्संग उन्हीं का, ध्यान उन्हीं का नित्य रहे।
 उन्हीं जैसी चर्या में यह, वित्त सदा अनुरक्त रहे।
 नहीं सताऊँ किसी जीव को, झूठ कभी नहीं कहा करूँ।
 परबन वनिता पर न लुभाऊँ, संतोषामृत पिया करूँ।।3।।

ऊहंकार का भाव न रखूँ, नहीं किसी पर क्रोध करूँ।
 देख दूसरों की बढ़ती कां, कभी न ईर्या-नाद धरूँ।।
 रहे भावना ऐसी मेरी, सरल सत्य व्यवहार करूँ।
 बने जहाँ तक इस जीवन में, औरों का उपकार करूँ।।4।।

मैत्री-भाव जगत् में मेरा, सब जीवों से नित्य रहे।
 दीन दुःखी जीवों पर मेरे, उर से करुणा-स्रोत बहे।
 दुर्जन-कूर-कुमार्ग रतों पर, क्षोभ नहीं मुझको आवे।
 साम्य-भाव रखूँ मैं उन पर, ऐसी परिणति हा जावे।।5।।

अटल सत्य

इस संसार का कोई भी मनुष्य निश्चयपूर्वक यह नहीं क सकता कि जो कुछ होना है वह अनादिकाल से नियत है। सब कुछ नियत है तो उस नियत काम के हो जाने के बाद संसार में कुछ रहेगा ही नहीं। अनेकों घटनाएँ नियत नहीं हैं। अनेक प्रकार से हमारी जिन्दगी में घटती रहती है तथा संसार बढ़ाती रहती है। इसी से संसार चलता रहता है। वास्तव मे को व्यवहारवादी होना चाहिए। व्यवहारवाद ही संसार है और अनुकम्पा की जननी है। यही धर्म यही अटल सत्य है।

XX

